

近代中國史料叢刊第十八輯  
沈雲龍主編

湘綺樓箋啓

王闈運撰

文海出版社印行

王

生

八

湘

箋

卷

綺

啟

先

凡

宣統庚戌上海國  
學扶輪社重刊

W2130/13

湘綺樓箋啟卷一目錄

長沙湘潭王聞運字壬父著

張文心十一啟

龍希蟠一啟

唐藝渠一啟

教金甫一啟

楊石泉二啟

劉印渠一啟

張參贊一啟

徐受衡四啟

徐章京一啟

于晦若一啟

連希白一啟

朱香蓀一啟



董研樵一啟

譚文卿一啟

李小泉二啟

陳懷庭一啟

左季高二啟

李少荃四啟

易笏山三啟

王一梧一啟

裴樾岑八啟

宋芸子三啟

周自菴二啟

王鼎臣一啟

陳伯屏一啟

易中碩二啟

丁康侯一啟

鄧直牧一啟

王理安一啟

瞿子玖一啟

朱竹石一啟



湘綺樓箋啟卷第一

長沙湘潭王闓運

與張世兄

前聞將至鄂中故未奉問昨見省鈔乃儼然逐隊李石之門豈有說邪東野世丈亦入都長涂川資何出闓運鄉居衣食足供十口手寫九經已得四矣春花滿庭間復弦酒蕭然自喜不知前之為夢也桂陽州將修志搜以闓運充乏當於四月携家一游兩三月便還廩所浮家泛宅何必江湖此實至樂在不知明日事耳仁兄意致高穆可以相聞

不奉款曲又已兩稔屢得永州書詢音問通否慚無以答也仁兄坐卡如官何子

咏城陵委員詩云見人俗做無規矩坐卡如斯况做官遂無冷銅之分取得家屬相攜琴書不廢亦足以浮

沈送老矣州縣况味前已略嘗益民者少損已者多幸有文史自娛可終身不署補也闓運滯於衡城商訂圖志所獲無幾曠日已深去歲家叔父病亡三涉省會藉見諸友獨少良規頗懷感念之意因春寄訊聊代萱蘇君山新茶真者可為致一二兩假者亦致一二斤以慰渴思專問同福不具

前書薦孫世兄竟未奉報益鋪遞浮沈山居深遠相思之意寄於想望而已聞雅政無傳百廢具舉留賢自助遂騁二龍都梁之芳與塗歌共遠何意山城得此佳會甚羨且妒也聞運於十月至應陽故城主於席氏料檢圖志并已畢功東安武岡境間有奇石謂之蕭巖相傳為壓湖南一山自宋時知武岡軍周裕游馬磨厓題名歷五六百年人罕游探今冬月晴煊又值吾輩咸會近地已函告東丈尅日同游吾兄按圖行鄉正茲巖主人宜定良辰招二鄧南迎永州之騎西會故人之約留飲三日刻名賦詩為一時勝事專書奉約即候復章

得書知欲坐而致人惜蕭巖之無緣也從東安盧洪至貴州輿橋越領有三日程天殊未能晴又已入人地行止遂不自制還必歲除矣聞運作思歸引時更有詩云湘綺樓中他夜雪好將鴛瓦當油衣自此誓不雪中孤行若迫以時日必逢雨雪俗所云犯祝神者甚可畏也明春當偕妻女同來以此間尚有小小筆札事圖志已畢矣專此奉復順頌夫人同福兩郎並佳邪

中秋日得手書及張生膏火銀十六元敬悉政成年豐兼訪遺文得篋中藏彙將付手民備攷覽甚善甚善從衡陽來者說尹不去口足徵此邦醅樸過於武岡抑

亦仁兄學術日進月異而歲不同也聞運塵中碌碌思前游已復邈然若得遂補  
臨承仍當携家南上山川有緣必果斯願矣軍志甫成十篇尚有短篇七首未就  
思於九月畢工沂湘一別為出山入川之計刻下正冗迫也八月廿日大兒幸得  
一子請報嫂夫人謝照轎之光湯餅俟補設耳

昨夜偶思秦人歸成風樾欲見秦與魯莊親密樾及其妻交情至深即所以起築  
臺於秦之為秦國也桓元年見越十二年見鄭越鄭二國皆於昭公見世乃見之  
僖廿年見隨直至哀元年乃再見知春秋前後相通國名邑名不可同也因改箋  
說別紙呈政皆出老兄之啟誘以後務乞隨時見誨為幸

去臘得賜書以亡室告終承憐薄弱撰文垂遠將託哀華拜頌崩摧感何如矣望  
溪尔輕下筆簡文乃肯誅劉語不虛增光昭泉下謹刊入家譜用志鴻施賢嫂夫  
人當已卜宅志銘無愧述德為難籌度經年懼辱來命昨積雨經月夜出沂湘獨  
坐舟中忽有所感還家援筆頃刻而成雖體格不高風骨頗振掃除門面直書情  
性有悼詩所未及者生平合作也淑儷固宜美銘亦亡室靈魂不忘閨友若或啟  
之不然無此韻也老兄好行善事食報亦宜但久獨神傷恐非逝者之願若聞運

之頑質計一死足報賢與不肖當思俯企東洲拘窘藉息奔馳兩兒將有浙行諸女並從衡寓因呈拙藁不遑贅言

前得還書情文並斐新秋感念遙想漣清垂老安居自然離索人之分也深思佚我自娛而已施惠鄉里亦消遣之一端而動或乘時不如其已唯勤教誨來者與之庶乎无咎耳聞運老心猶童不忘游樂苦無負託坐為五女所累乃知古人貴男正自有道待幼者嫁畢已七十矣此女新許雋丞為兒婦雋已七十又癡於我也亡妻墓銘篆蓋未榻先寄一分呈覽今年遂無所作唯公羊疑義初通二條容俟年終將應改者編鈔寄上以補刻本之漏酷熱猶未減久疏筆研荒矣髮哉起居如何暇仍答示

比年時聞起居嫻未通書亦實無可言也昨知携孫未游欣承健喜既至上海咫尺漢湘秋末潮平洞庭風利不十日程耳何不重游湘東下榻東州作數夕快談弟十年來頗有長進亦驗兄閒居所得非僅誇杖履優游也暮年頽唐者多少壯朋交不復相思存者晨星乃如參商如吾兩人益不可得亦未知弟之薄於故舊耶抑諸公道不同也相見時當快吐此鬱鬱耳專書奉迎不復多及

文心世仁兄先生道席前月得復書適以春游訪李若農於袁州往還二旬未及作報比歸復得手教及寄到鶴茗清映心目喜慰無量承示刪改莊敘謹即如所箴涂易之聞運平昔不攻宋學以不相為謀之道懲辨生末學之言凡所著述未涉唐後緣論禪悟順筆及之遂荷指正焉有不懌者乎穀梁申義於前年鈔呈由郭筠仙轉達奈何中沒今並補上彼係手書此則傳寫耳比年作書箋廿九篇已成近又作詩補箋及禮記箋初命生徒初稿多發古義有可觀覽惟獨學無友鮮啟憤悱學之不講是吾憂也屢學使頗勤懇於學政昨以搶替致烏合市人連折民屋以知此處事之難非倭學可辦仁兄殷殷於近思無亦致精於聖道益儒聖之分門久矣所索碑榻俟考後寄呈經策本無藍本策間有孫芝房窮論一冊可駭大政至經史疑義多是陳言以敷衍了之無異條對也近日經學將興貞郎尚宜留意聞運兩兒材志驚劣一無可言乘郵奉問起居不具自強不息老而幼學每得來書輒自皇悚滄海橫流之時乃有此山澤耆儒麻覽古今如出一轍老兄當知消息可搜集一傳弟為敘之勝於表章道逸足以警惕凶庸也但區區老翁不踰繩尺求志達道孔所未見弟踴躍其間不願同游他日



一  
二  
僕亦附名則寬屈耳承別示養心方頗有老態弟尚不須違此人生適意安能自  
養以求生乎今夏早熱氣為所奪及涼冷遂懈怠矣頗欲東游以振之好自珍頤  
預備暢談

### 致龍高平

希蟠仁兄先生道席正月至宅中聞已治辦刻期出作選人心頗不以為然然成  
事不說遂不諫也今已半年尚未成行殆有所裴回而待朋友之決定邪聞運不  
言計無有不面諛而後言者請試論之夫官者無止境而遺者有幸否以令長為  
致身之資則已末矣以弦歌為三徑之資則未可料矣今居省城視昔居省城時  
何如何憂其不足乎為貧而仕非兄志也直以才智應發久間不試思欲一顯其  
神明之譽特不知出遇僻地逢惡長官將一無所施或補大缺遷高官將欲罷不  
能五十之年僕僕形役此有官癖者為宜而以老兄之初志又未屑與悠悠者浮  
沈矣吾輩才德有限必無富貴令名並集一身之事以近事論之味滌李霞皆艱  
苦成名筠仙最逸猶卧矛桿眉生棄家乃得徐海杏農高名困於張李庸齋上德  
被謗廣東彌之九傷辛眉坐嘯申夫再劾閩運長歌出處之分校然如此將欲與

官瑞為列而先冒良吏之名或欲與陸期陳軫並驅而今有理問之第語曰知止不殆兄其止乎斷事最難幸無謂進退綽綽也真寒沈陰起居珍重

致唐郎中

前聞太夫人壽辰適已過期闕於遺祝又聞慈躬微恙旋已有痊幸甚幸甚昨得程春翁書並寄到惠函及潤筆三百元具徵孝思無窮損已揚親之美欽喜惟倍但碑銘例有人事行狀不以利終先公於閩運忘年雅契同事廿齡大德遺聞素所仰悉故稍加詮次即已斐然若因而受謝弗彰公道既使閩運有傷廉之譏又傷先公知人之雅抑令人疑賢兄弟私願榮親喜于聞譽故不敢承領非自外也狀版早交春翁宅中李次公碑文尚未寄到尚須諸兄函索之茲附呈奏稿六本並所寄三百元統希察入閩運以丁宮保前歲久要於十月內軍志告成即行買舟入蜀游期久暫未定媿口尚寄城中明年秋試鑄兄當送考來省否酌兄何日之官樊口事以平淡了之鄂中今無事也

致教郎中

去秋復上一函計達清鑒仲冬泝峽西上除夕前日屆於成都比見丁公果如所

論謬以講席相處初以三年宿諾意其求友之喬聲不圖千里尋師乃作擔簠之  
來教遠巡三讓固執一辭便欲告歸實為駭聽今年二月移入館中以佔畢之荒  
儒對卿雲之後輩其為不稱亮荷深知唯孝達初立不易未經整飭以閨運硜硜  
之性蒙諸生抑抑之謙將廢者于是更與未備者俄而悉補甫及一月已有可觀  
用報鄉先生使知蜀材之盛也珂里人來具言老伯大人高年矍鑠令弟秀發恂  
恂聞之欣頌仁兄秋官久次美譽益章著述當增暇幸錄示閨運去年撰成湘軍  
事志十七篇於長沙開彫今尚未得清本及至貴省工課頗繁當俟夏間方能理  
業媿屬仍居鄉里恐江湖之險又作客不宜有所顧牽錦里之留因茲難久意欲  
得三數高足分習三科然後改院長為學長不借材於異地乃為佳耳聞孝達有  
次子出後其兄者年近舞勺饒有父風聞運有第四女生于戊辰性稍聰敏授以  
經義粗能理會伏冀仁兄近加訪察為我相攸若許相當便煩掌牒復書來日再  
可問名緣此未通函孝達希留意幸甚幸甚春寒來久伏惟萬福

致楊總督

自送行旌旋登平乘卿雲屯于隴阪客思託於沱潛雖雍梁同方而行程俱驚入

蜀以後官訟紛紜親覩風波難安旅夢又初開講席日有課程昕鼓宵鐙靡違他  
矣側聞籌策兼總留臺翊贊之勤勞於昔歲以至重大之事曾無合力之人文卿  
又復翩然季文真成騎虎非樸忠妙略難為一日謀也每一思之頭須為白况躬  
綜其成者乎穉帥之蒞華陽原可安於厝火乃思危遠慮遂為淺識所驚已既徒  
勞人亦受咎兩星為之退舍百姓頗亦騷然今方欲善其謀亦有才難之歎耳聞  
運謬居祭酒職位儒官諸生業勤差以道責家從弟少而失教壯不自安求託旌  
轅冀加鈐約得其長安來信深感推愛之恩昨奉惠書始驚天逝本無裹革之志  
乃承掩骼之仁兼賜遠詢許謀歸葬聞運竊以為延陵贏博蒙叟烏鳶處處可埋  
達人有例但此弟曾無妻子其弟妹為之主持若不迎喪恐於禮未盡未敢專決  
仍還書舍間謀之惟示以附使致柩則萬不敢當俟定議後當由其胞妹婿陳同  
知嘉績就近照護耳存衣便可施作佛事以免交代之煩陳令從張朗帥在阿克  
蘇先亦在大營文案可代聞運辨此也先此奉復敬頌道安不勝悲仰之意

石泉先生尚書節下正月奉賜復時以寵畀益隆投艱不易未敢依世俗稱賀而  
相距遠闊又無以助贊海嶽故稽遲候欽企彌增西極盛秋德威丕著甚頌甚幸

湘陰學行宜為第一名相乃政府目以外行利方為圓良不易易蔭公亦稱病欲退沅帥似不西來偉人穹官猶之不遇如閩運等反為達人矣蜀游因循三年冬初決去近撰公羊春秋已成寫定後再寄呈正舍親趙秀才一函乞留意安交敬頌鈞祺不具

致劉總督

前歲奉別遂闕通牋側聞滇黔人士傳道威德不動聲色安於泰山凡在知交孰不稱頌比者連章示意頗念明農朝廷注意西陲竟不得謝竊以為大臣任事高下在心但益國家豈知俗例絲針雖利未若龍淵如以寮屬而遷歸何異假梯階而自進總督而不得行意今古所無公自道多而術少耳閩運於去歲撰次軍志已畢遂為西遊初擬由蜀秦關隴還循黑水而南以圖良覲及至華陽穉公留主講席諸生已集勢不可辭好為人師古賢所患但上下牽綴去留不得自如以負嘉招慚於通訊今因驛使輒報行踪梁益同州承風在近僕有所見尚當續啟先此奉達敬啟道安惟譽鑒不具

致張參贊

正月寄上一牋言蜀中金鹽煤火之利思效鹿茸之義方以無報為怪昨得家書  
乃知有竊變石故智者竟致浮沈然比時風波駭人恐賢者亦隨俗裏足今者霜  
臺隼射復攬威神部議重申兩星退舍所有餘意頗再明之蓋聞才智之士患不  
遇時家有龍淵乃議割割仁兄思精才敏非僅以文德營務為富貴之極階而小  
試輒罷但能卷退良以張劉力弱沈李交疏不階尺水終於蠖屈筠公泥佛不保  
自身三數東行無成而返而又諱其逐鹿高語卧龍以閩運之深交尚未傾其情  
懷此在高才坐廢懷寶迷邦無與他人不宜勸進然閩運終不能已者誠以近今  
能者無多惜其冉冉也蜀通三藏地界英俄他日蔡州當今鞏洛富強之計久闕  
未舒督府宏謨鄙人奇計小用小效大叩大鳴思慕恢廓之風願商兵食之略幸  
承聞退可作峽游秋水向平無辭一訪縱令無補聊作看山若可經營何難展布  
昔陶朱無心將相而必致千金諸葛但食一升而樂窺火井人生要在發舒其意  
豈以言利為諱求官為卑乎湘人得志東南入蜀者率皆驚下由顧霞凡近不足  
提倡故也君家松公不迎玄德則與五斗妖人同於草木何必狃於熟路唯識淮  
網仰望幼丹交通崇宇以為百步王乎閩運既託業談經更無進取之理若夫瞻

言百里遠慮十年子牟魏闕之思仲連圍城之志非智者不可與道也今日先謀興利以裕國本奏調擢用自在他時亦非僅區區海關酬參贊之勞耳書至且宜深思以副所期有可與談者亦可示之蜀中夏涇院內多忙然燭作書敬頌雙福

致徐通贊

伯澄先生侍郎閣下興平快聚幾欲忘歸江湖之人復知闕下之樂以主持風雅如東海之納川也漕渠秋清游人欣慨南衡北斗俱在天涯獨寐獨興勞於轉轂非有翰墨豈代護蘇但浮雲西驅龍門難望勝游招致亦憶歸人今寄上近作詩一篇并補注書大傳敘一首聊當面謁見寂寥之遠致期奇賞之獎成驛便將書以榮空谷短牋奉謝敬頌安和不宣

在里中竟未相見上牋亦未得復旋聞詣闕企仰何極春明榜放正鴻臚奏第之時桃李公門比四裁為勝也聞運今歲以湘中將撰軍志携妾入城寓居鳳凰臺饒秀野之趣惟此書端緒頗亂傳述異同私論官書均當兼采聞髮捻方略八百卷已用洋人活版印行未知曾刷否部可購致否或須求借方得頃書詢叔鴻弟乞其代辦僅須大力者方可問津則求我公為覓全部以資攷證若必須借鈔曠

日殫功以求簿錄即亦不必勞費以官書本不盡精詳且此志又不資公家言也  
如有買則不妨多價以辦事未宜惜錢此亦莊生所謂兩行者耳前款已交芸伯  
轉呈太先生遲滯為罪春深惟起居自珍不宣

受蘅先生台席在龍宅復牋未審遂將京票出京行五十里乃悟之益信辭受久  
暫俱有前定大惠不虛頌也五日別故李將軍七日見今李將軍送往迎來歡情  
不沫談新話舊老境漸臻細詢興居同深晝暮九日遂同舟東汎仍以月半為歸  
期春分後可看家園海棠但不能游五頂耳此間果有攀留之說而情意殷拳反  
怨我不早出土各有志固不為留然又撞高帽一頂矣與我好者為好人其學識  
實亦大進廿八年不見彼此俱上天也富貴長進極難誠為偉器知公愛奇故悉  
以聞近見豹岑否亦求致意謝未相待至湘復當有書奉聞

北行展會泥更瞻雲南城寄居春能煖雪五旬之聚千載所難寒食還家征衣未  
澈祇以買山未得近市仍喧心緒靡甯手書久曠想韓榴照眼杜葛承恩既肅臺  
綱即司堂印雍容華貴延望欽遲閣運糧聚無多轍環將老既過假年之望聊尋  
大易之門但爻象絲頭文言簡奧勢窮鑽仰時復行游近欲營碧浪湖亭以為野



懋即題檀施用志桃投俟夏水平隄勘工定議再當寄呈圖說求紀端由至於會館之鴻規募金之鳩集除雪公千五而外多露臺百十之家不識諸藩作何登答儻有見委請俟來年若肯視小成似宜拙速益拓大為易淹久恐難也首夏已燠日長增思輒憑驛使敬頌台安雲薛露恩來時續當奉報唯昭察不宣

致徐章京

去歲為劫剛作牋懇一事誤由票號遞呈經時未得復示知未達耳十試已畢利鈍如何吾弟留京積歲今秋必宜邁返京官能銷磨心志在都者懶於他事不知行樂受苦立德建功外間別有天地久而悔之兩無及矣聞運去年復有會試之意行至長沙為省人所留今携妾暫居龍泉精舍方議排比歷年軍事以述實迹其中最難考者各小營起撤日月如募勇五百或三百即有營官有餉項隨生隨滅人視之無關輕重而當時具有經畫最足以考證節鎮之材否而三江兩湖閩浙齊豫川廣雲貴山西直隸俱有湘人為將者或他人為將而湘人為勇此十六省案卷豈能徧查惟報銷清冊易於稽覈同治三年雖奉旨免報其細冊仍送貴部備查鏡初言軍機處方略館能手一二人均吾與弟相知好故去冬諄託並望

回示以便寄上使費及筆札之資恐須吾弟面託前送但鈔湘營開立及遣散日月人數將弁籍貫餘皆不用若冊內並無兵勇籍貫及兵勇細數則並不用欵彼虛假帳目以省勞神此閩運等再四籌度選賢而公舉吾弟之意亦非以京官清苦為此調劑之法也又平定髮捻方略若干卷已用洋字印行廠店必有可購並聞方略館有人常與遇從其書既已印行必非祕書何處有買有借有討務求賜一實音以憑設法近有人云須全鈔者則費力曠時以求此無著之語即可不要矣且方略頒行而曰無處可覓豈人情哉凡事非內行則處處荆棘一遇能者咄嗟立辦已函求太先生為吾弟之助措弁還日迅賜確信

與于兵部

臨行遠送周至款深承寵非常惟有悲仰次日明發勃海波平三日無風遂入江口小有洶蕩不廢安眠見贈三器有備無患皆蒙愛覆以致平安行裝瑣細一無所失在上海逢劉伯固得一鄉丁護行自此翩然無煩遠屢矣停逆旅時遂大風雨春寒曉坐得小詩四韻錄呈吟賞貴欲知我者喜聞聞適也上陵美美春樹當羨萬里相思與雲俱遠有朋相問求致拳拳敬頌危安紙相未解僭紅為罪羊涇

卷一  
逆旅上

致連散秩

希白仁弟殿帥爵前奉送行旌修已逾夏福門嘉禮未及申賀旋聞田君言已駐  
萬縣同舟東汎錦帆安穩璧海順流垂佩君門定逢新寵甚幸甚頌令兄已至駐  
所謙從平安成都近無譌言但惜黎公之去耳實心任事者不可多得蜀中積弊  
又深游公之徒奉行良吏未足挽頽波也俄事必無他慮而廷議為正論所劫致  
謀邊汙思之歎恨亦未知兩宮真憂勞求賢而不可得耶或以今所用為賢而姑  
徇輿誦耶故雖有所懷不敢自獻昔荆王三別莊駕一嚇九重萬里忠憤徒深每  
遇北風何能不歎聞運濫居祭酒忽已二年山中信來促望還棹以去臘方歸今  
冬當留渡歲明年秋汎定戒扁舟為日尚遲可隨時通候也專此手復敬頌台安  
惟荃察不具

致朱典史

香蓀仁兄先生道席長沙快聚歸夢猶歡秋風復涼佳期未踐桂香招隱霞露道  
賢當乎此時無任吟想邇來集會論何文政廷璋一案致勞神蛇金剛之倫左袒

右袒吾等局外不逞私議試以尊意報我無若鄭尚書屈殺張文祥也衡陽圖志  
寂寥無甚可觀須十一月乃得刊竟近撰周易尚書并成尚書實古今之名作尚  
有未通者須良友講論俟之來年耳人便奉牋祇頌多福

致董兵備

研樵仁兄年先生節下前歲道中奉寄二函已入鑒否復聞分守鞏秦不得近聚  
又彼中荒冷當此時艱難撫馭勤勞未展驥足京都敲韻雅會難追唯勉勳名以  
樹邊略亦足壯詩情也閩運還山苦為州縣圖志所累筆墨塵冗無異簿書久欲  
奉牋因忙遂輟新年湘上舟中偶得小詩奉懷附錄呈覽如有佳問由文卿兄可  
達

自疏嘉問靡日不懷昨得寄書知閩運去春一牋經秋始達天水復札八月乃來  
情思常新日月逾邁念此何堪別也節下巡備列城同人有應官瘠土之歎及觀  
所示方將移風易俗講德興賢無快望於台司有設施於荒徼高致遠度於此不  
凡乃覺六朝文人所懷浮淺唐宋學者唯卹已私進德宏謨敢不敬賀閩運隴蜀  
之望在覽光儀人事牽纏迄未命駕東安圖志已畢尚未刊青寄上衡陽縣書聊

供瀏鑿新詩一首藉達相思張子衡志圖閩臬何心吟詠得君一貶已為褒矣文卿開府因仕致貧貧也非病未可退也有狂友李雨蒼手書諳諳約閩運游河北妾年三十無可戀留亦以舊交晨星新知不續便恐獨立天壤無與為言終當一出馳驅萬里但進仕之意絕於乙亥矣節鎮紛移獨不能違君於近地殷勤跋涉自覺偏勞僕月內布按楚越則所禱祀者耳杜祠記俟思之未可率爾來示不及家事嫗屬已至秦否入秋向寒惟珍衛崇愛為頌

致譚總督

文卿先生尚書仁兄節下今春在京師逢驛還西即欲附箋問安適將南旋總總未暇請疾愈堅皇界益隆俄夷新有違言旌節必無移理悵望隴阪我思如何伊犁設守本左支謬計遺此艱大以勞鴻畫然不過口舌焦勤耳屯兵待餉則切近之憂方今除借帳逐無籌餉之法此則當軸之過疆臣不能代籌大賢決去似可微發其端願朝廷無務虛名而受實敝凡邊防皆無益而有害自古無知之者由不通經術耳兵不戢必自焚此理粗淺亦無人肯玩味漢唐強而宋明弱我朝兼之至今日情見效覩而猶用李張一和一戰以自勞敝肉食者真不可謀耶丁文

誠頗有獨見曾草密疏請罷海防閩運以其賒人得罪勸其請對面陳故不果上由今思之亦一恨也若節下之地位恐亦不可言此能引退則可言矣遠道區區聊備采擇閩運自蜀還負累三竿方謀洋財而敝縣志書久稽汗青又當留辦亦賠錢嘔氣之舉羊質虎皮勢不得辭詩能窮人文能貧人故曰多文以為富言文外無所有也然此不足慮不文則富矣時局如此窮將及我則可憂也久闕通候因匡君還奉問起居伏唯寬心自頤為國解憂不任企禱

致李制臺

小泉先生尚書大公祖節下九月廿一日得賜書及寄惠官刻書三部循覽來教文美誼高以宏獎之心寓樂儀之訓雖薄植護聞未足承荷然九九之見一一之吹因事量材通於為政以茲宣德敢不拜嘉聞登雁峰延望江漢秋清鏡吹霜肅戟門載路依仁還轅保福幸甚幸甚閩運八年閉戶一出求書經史研尋斐然有述比已寫定易書棧說忘蒐治公羊春秋他日謹當繕本呈鑒或資過庭之訓昨檢所寄文選重出一函想侍史偶差致以二部為一此多上冊則彼少下函僅係架藏無難更換今謹奉上希飭查明將下函補發以成全璧如無從考索即希別

賜一部重為瑣瀆無任悚惶復謝嘉儀恭叩侍福

致陳鄞縣

去歲從賢從處聞太姻伯母之喪今年元旦在石門山中得力臣郵至赴函彼時皆以為靈輿當還伺日會葬無庸寄唁今夏文臺旋乃聞已厝浙江則怠慢後期之愆專在閩運死辜死辜伏惟客居涼獨練時增感奈何奈何閩運久愧索居幸多暇日今秋以大兒當議昏携媵居省城百日雖知交寥落而俗冗仍煩北風戒霜仍還所住謹因郭意兄舟便附呈萬錢聊助孝齋冀思親自寬臨啟忭馳

致左中堂

季高十三丈中堂去歲由里第附上一函計達鈞察西征籌筆明習敵情昨讀大疏不減充國黃升劉退見用人之至公知公晚年殊進也腹裏事益形沓泄閩運惟有閉戶讀書以永朝夕族子樹枏前從成道臺差委有年人頗勤慎今以卑官託於宏懷微賤不能自達用介一言俾謁庭下伏惟兼納並采門無棄材或留供驅策或試以州縣必能恪恭所職兢業自勉否則與以一札使隨肅帥窺關塞之情亦器使之雅意也湘中人材日復寥寥峴時兩公進退維谷大吏方整官綱以

誠頗有獨見曾草密疏請罷海防閩運以其賒人得罪勸其請對面陳故不果上由今思之亦一恨也若節下之地位恐亦不可言此能引退則可言矣遠道區區聊備采擇聞運自蜀還負累三竿方謀洋財而敝縣志書久稽汗青又當留辦亦賠錢嘔氣之舉羊膺虎皮勢不得辭詩能窮人文能貧人故曰多文以為富言文外無所有也然此不足慮不文則富矣時局如此窮將及我則可憂也久闕通候因匡君還奉問起居伏唯寬心自頤為國解憂不任企禱

致李制臺

小泉先生尚書大公祖節下九月廿一日得賜書及寄惠官刻書三部循覽來教文美誼高以宏獎之心寓樂儀之訓雖薄植謏聞未足承荷然九九之見一一之吹因事量材通於為政以茲宣德敢不拜嘉聞登雁峰延望江漢秋清鏡吹霜肅戟門載路依仁還轅保福幸甚幸甚閩運八年閉戶一出求書經史研尋斐然有述比已寫定易書牋說方蒐治公羊春秋他日謹當繕本呈鑒或資過庭之訓昨檢所寄文選重出一函想侍史偶差致以二部為一此多上册則彼少下面僅係架藏無難更換今謹奉上希飭查明將下面補發以成全璧如無從考索即希別



賜一部重為瑣瀆無任悚惶復謝嘉儀恭叩侍福

致陳郵縣

去歲從賢從處聞太姻伯母之喪今年元旦在石門山中得力臣郵至赴函彼時皆以為靈輿當還伺日會葬無庸寄唁今夏文臺旋乃聞已厝浙江則怠慢後期之愆專在閭運死辜死辜伏惟客居涼獨練時增感奈何奈何閭運久愧索居幸多暇日今秋以大兒當議昏携媿居省城百日雖知交寥落而俗冗仍煩北風戒霜仍還所住謹因郭意兄舟便附呈萬錢聊助孝齋冀思親自寬臨啟忭馳

致左中堂

季高十三丈中堂去歲由里第附上一函計達鈞察西征籌筆明習敵情昨讀大疏不減充國黃升劉退見用人之至公知公晚年殊進也腹裏事益形沓泄閭運惟有閉戶讀書以永朝夕族子樹枏前從成道臺差委有年人頗勤慎今以卑官託於宏幪微賤不能自達用介一言俾謁庭下伏惟兼納並采門無棄材或留供驅策或試以州縣必能恪恭所職兢業自勉否則與以一札使隨肅帥窺關塞之情亦器使之雅意也湘中人材日復寥寥峴時兩公進退維谷大吏方整官綱以

臨民士視嘉道公卿有其隔膜無其雅望思之令人不怡想公方勞心於西略顧不料善地不如惡地耳本欲相訪道遠憚行輒先以書達

季高十三丈節下自乙丑從保定上書論吳生必敗公事未得復書其後閻運以三月歸家七月入山至今四年絕不與世事相聞友朋來問或及時事大抵皆數月以前陳言鄉中人以為新聞耳故以節下之馳驅勤勞擘畫貞樸皆無得而稱焉筠兄書謠告封事乃知吾丈蓋真欲謀國而非以官爵徇人者又屢聞雨蒼保之孟星言公每與人言輒慮賢才不登而自歎衰老孤立何大臣深思之賢乎閻運行天下見王公大人衆矣皆無能求賢者滌丈收人材不求人材節下用人材不求人材其餘皆不足論此以胡文忠之明果向道尚不足知人材何從而收之用之故今世真能求賢者閻運是也而又在下賤不與世事性嬾求進力不能推薦豪傑以此知天下必不治也待天子臨軒而朝無休休相臣當依之旁求恆不若夾帑之訪問為易則積弊已深矣今姑以節下用人論之嚴受菴才氣跣地欲以死發其狂令得備一卒死鋒刃將百人償其志等死也而故斬之使發狂疾自縊而死豈閩粵營哨諸弁猶勝受菴乎此節下欲成全人材而反天枉人材者一

也鄧保之一善論說文人本非吏材而節下使之為營務作府道卒又不悅而遣之豈保之先則勝受菴而後則不若壽山乎節下欲獎拔人材而又不鑒別人材者二也孟辛負氣好奇其銳敏不多得節下既賞之矣而不留之不調之欲其自投而後收之此欲籠絡人材而卒坐失人材者三也蔣撫楊督皆以薦起蔣則麤官楊乃陰鷲均不得終席視滌丈所舉之李沈既不及之比於毛憚物論反甚焉節下徒知文人之非遠器而不知辯士之非遠模徒知馬謖之違節度而不知魏延之非馴擾此欲別拔人材而不知遏抑人材之由者四也委克菴以關中留壽山于福建一則非宏通之選一則為客氣之尤節下久與游而不知是不智也無以易之是無賢也將兵十年讀書四紀居百寮之上受五等之封不能如周公朝接百賢亦不如淳于之日進七士而焦勞于旦暮目營于四海恐仍求士而士益裏足耳聞運自不欲以功名見視當世要事若存乎蓬艾之間既非節下諸公所札調能來亦非諸公所肯薦自代有賢無賢何與人事特以聞節下之勤懇傷所望之未逢涉筆及之聊為啟予耳比以桂陽人士相要修志偶思節下久未相聞命兒子錄兵志序一篇以質有道不可空寄一文當作書申敬意之所及輒復論

之又聞人言節下頗怪閩運不以前輩相推此則重視閩運而自待輕也今推節下者衆矣尚須求也附益之乎如閩運者尚不怪節下不以賢人見師也節下久不聞侃侃之言或亦感區區之意知我罪我閩運無與焉臨啟不勝所懷

致李中堂

少荃先生中堂閣下十日從公備承接逮授餐下榻仰費指搗雖快傾遲深慚汶瀆家事未了不獲留依勃海揚舲猶憑威寵到家悠忽遂已改時久曠謝牋當荷鑒念想安神清暑佐治延薰長日蕭嚴中外禔福幸甚幸甚長沙積雨二使初臨官士失職以覲新猷惜豹岑之不待耳閩運歸田無宅舍業而嬉俟冬初遣嫁第六女後仍當游客比日筠仙暫遣代館而講舍悶熱殆難過夏卑溼之國場雨溽蒸延望海天彌羨清福臨啟不勝區區企禱之懷

少荃先生中堂閣下自奉丙舍來書後久未貢牋風波震驚獨當危撼赤烏几几隱若長城既非侯嬴之所能佐又非馮煖之所能安東望海雲屏營而已國是未定論帥無人幸劉軍猶一交鋒他日必不潰敗蓋整軍經武幾二十年乃得此效非老於兵者不能也二張之比塞陸殆猶不及乃昔則望風而謀奔潰今得成列

而抗顏行事半功倍誰之力與今或遂以為口舌之功或又責其言行相踐皆扣槃捫燭之談耳側聞明公猶持老謀不輕言戰此則趙充國之所以報主葛丞相之欲制東行名臣純忠固宜如此策士觀變竊有請焉今言戰者未必戰言和者未能和詩曰發言盈庭誰敢執其咎又曰巧言如流俾躬處休當官而行臨事無讓盡其分所當為亦不必排羣言而申卓見也胡咏芝之嘔氣大曾滌公之嘔氣長公今兼之尚何言哉若有可驅使者比得信往返已無所及非閻運不來問訊也區區之忱輒因驛問崇勳續得通候為幸

少荃先生中堂節下相望寥廓久闕牋記屢聞傳道垂念之意尤為悚荷明公身繫安危獨當其難古今殆無其比今年在湘與筠仙論俄事筠仙示與公往復之書閻運比東筠仙云君所言滿紙浮詞昔嘗謂君於夷務勝李公今定知不及也蓋以十八條為不妨許諾在朝唯公一人在野唯閻運一人惜不獲面見證其歸宿耳往在都門承欲以紅氈白帖見傲及今又廿年既不獲作後輩聊復稱知音矣悠悠之論又何足惜然竊有參者公之官宰相矣其職疆臣也疆臣握兵不可言和而增防二軍果足以犄角耶抑終於備而不用似不如明言除禁撤防坦然

相與以防之終不用則不如不防也今之計在經略南洋悉置領事官收故民之心而壯中國之氣鐵甲火輪游歷海島既不用戰而可習兵比之機器同文固有實用即較之招商舡政規模亦遠此真宰相之事也省防費以供游資又足以弭釁而示信如此乃真和矣和戎者聖朝之美事古來之通典非如石晉趙宋之和也公宜以規畫南洋自任而以洋稅專供資用較之鎮衛東門功烈廣狹可坐計而知矣閩運久閉陳軫之口而息阮籍之駕偶因穉公要為蜀游荏苒遂二年方事之亟不敢通書左右今歲暮海凍休役之時恐此頌揚之言不登米湯之簿謹因北風恭叩興居敬賀年喜手奏不莊

唁二李

筱泉尚書廬次昨聞鈔報驚奉太夫人不諱遠惟孝慕側息旁皇全福隆名耆年少荃中堂敬 榮祿凡在海內莫不欽瞻 聖主自有慰詞非愚賤所復能譬勸也唯四方觀禮敬乃勝哀勉率諸郎以副喁望閩運自去秋喪其次子一家之學無可復傳臘日還家閉門守靜祇以卜宅未就不獲扶服躬詣徽帷謹上挽詞一聯恭述先德不罄頌贊責微忱區區之懷當荷鑒照敬慰巨孝伏維將禮勝喪臨啟懸遲

致易藩臺

笏山仁兄同年侍者自別三載竟絕音問亦不知手版呈書苦樂如何聞運時一來城唯見門前白馬壯健猶昔耳鄰居戴蓉軒秀才去年物故妻子無以自存屈指時賢唯高義必加存恤屬陳母令聞運必致其意戴氏所望於君者不至甚賒而煩我一通書有以知拙書之賤銀錢之貴也乞飭賢子酌送若干戴氏幸甚秋深惟起居自珍不宣

笏山仁兄同年先生節下貴署三節向有致送敝院酒脯米燭人事有交情者增以加羞珍異聞運受公儀而辭私贈自有書院以來未之有改也節下既嘉貺泐然乞訪查舊例或新政刪除之故以釋羣儒之議謹以奉聞

昨諫設醴遠承補餽足徵虛懷待士之雅感荷感荷唯禮經節制過時不補祭居三重無反於初况於投贈而可索得乎家父求車見譏聖史以前告者懼代者遂去餼羊耳謹仍使返璧若至年間彼此不去者自可拜領嘉惠也又來貺二分一送監院一送主講或疑公欲以屬吏相待不齒之賓師之列聞運以為必誤解人事二字所致監院向無犒賜未敢代留必欲餉之自可徑送今並以奉繳敬頌

台安

致王祭酒

益吾仁兄祭酒節下東行專候使旌而不知揚州駕考泊舟江都唯識一載春林秋暮途窮不能問鹽商生活明日即發至淮安乃知星輅當俟冬初心到淮陰乞食之地亦不可居遂渡故黃登岱頂直指歷亭矣意非不誠緣猶未至悵望如何比想按部勤勞校文愉樂諸生著撰當有成帙者聞運於羣經皆有所箋唯爾雅最精而未遑鈔集有弟子周道洽亦稱敏悟屢促其及時成書亦未能也僕門下有能集古今注說者乞飭鈔一分見與以酬三箋之值京華間住便可下已意以發新聞此願定當辭耶涕南名士多今為黃水濁流所清未得出訪寄居丁夫人墓廬以待會葬乃後訪合肥觀七耶觀帝京元夕之盛遵海而南使車飄留無常行客盤纏有限未必能相見也輪船上有何人託致一書特為郵達鈔呈泰山詩二篇鈴下小史有能和者否張朗齋名為不識丁而今有聞運為之氓山東未可輕也晴來日久煖於湘上所居桐葉未凋羈情頓釋知念輒聞敬叩道安不具

致裴船政

湘綺樓箋啟

卜口



別後驚於征途未及牋報久聞三峽奇秀又加以香孫贊揚及至其間殊失所望  
盛名難副豈獨論文惟濫豫一孤石差為不負此游耳雲安連陸半月山行除夕  
前宵稅駕白兔而二使星已前至蜀不獨按問東鄉至乃注意丁公牽連僕妾道  
員中丁勞唐州縣中田李並登白簡加以醜詞語甚含沙情同舞劍蓋由自恃廉  
儉少所匡繩致此紛紜足以沮撓雖怨輕樊口終必消彌而揆以情勢義當引退  
聞運好勸人去官又當據所見矣尊經講席虛懸二年諸生住齋者至百餘人恐  
不能不稍為料理嚴武自去杜甫自留亦大非求友之本志將俟欽件稍定生徒  
上學時為之粗立規條或勉留一歲僕主人留鎮仍不改弦近有見聞豈容默爾  
便當辭師居友聊盡所長忠告數疏古人所歎更不能久待也貧叟先生頗關情  
於舊僚幸以告之西陲新有覆師南中久無消息駟郵不速他無新聞成都花果  
蕃廣穀蔬早熟地和物阜最便間居惜舟道艱遲移家不易新春多暇伏想安和  
見香孫時乞為誦此

前聞新命以為不日當蒞敬州遂至遂巡又過半歲伏惟海瀕清暑道養彌和數  
載以來眠食佳否公事之餘何以遣日甚念甚念聞運德不稱名凶咎疊至城宅

焚蕩山居未就頗有負債暫避天津而教學已疲精神稍鈍不欲復居講席則亦不能素餐以今歲黃牛聊俟過危明春當入雲湖終老矣一切眷屬會有別離將與世疏不能不感連年北行有無限繫戀即無邊瀟灑也知音在遠我勞如何敝縣志昨始成工秋初刷印當即奉上感公至意幸得有成然非壽等喬松豈能見其殺竹故先寄拙序以慰前情在此又寫成墨子一本兼携有兒女課讀殊不寂寞寓在吳楚公所暫亦未至甚熱若入伏煩蒸尚欲往西山消夏否則且位為佳耳久宜通問因循便過三月實為迅速輪便尚得再啟

去歲奉復書與少荃同讀共歎情文未幾即聞傳說不如意事並言從者勤勞意興索寞見僚屬輒默無言竊意得道甚深內外交養朝命夕冰必非善測旋由閩藩寄達一言及敝縣志書一部還信云旌節已邁昨見恩旨知許還鄉幸甚幸甚遂初可喜淮上秋清時物尤美山梁水蘄或犯清齋霜筍霧菌必多文宴親戚情話何減朋友之樂耶聞運今歲小築山莊幸可容郝檢點書籍粗皆卒業明歲六十便可伏休惟山妻病困懼將先我幼子蠢劣非復芝蘭然四美難并少安已足幸此生差無負也湖南清絕公所不忘若命駕來相當送君還里手此奉候補寄

志書

樾岑仁兄先生節下到家遲半日遂隔旌麾陵雪西行玉珂紅旆比之朔風冰馬  
按轡燕徐別是川原一景而閩運亦以其日阻風昭山洲渚間悽惻荒涼時復吟  
詠人生情境事過皆佳想達人乃能領會也新撫至任聲望自高雖俗論可蚩而  
王貢彈冠古人佳話惜才地所限愛助如毛冀盡展鴻謨以綏邊服而已湘軍志  
已有實錄本非史筆而好議者因此緣飾談柄紛紛不止如桂志刊謬僅思白簡  
便當削毀原藁以免怨尤然恨晚矣儒生喜事赴蹈如飴閩運少慕虛舟老慚鳴  
雁何為而為此殊堪哂也思賢一席筠老非不勝任直以不能居館故以相委而  
散省學規不容挈眷閩運方自教女必不可離且左督於鹽務必有所改置西商停  
捐議早萌芽若朝入夕罷見嗤婦孺故要挾三端意欲託詞昨見曾威毅云彼已  
力言不可以辭館之實被驅逐之名為幸已多咄然而止因荷詢及輒以相聞亡  
子童戲相從盡傳已業未竟之緒方欲付之奄忽摧傷何但天祝自去秋以後久  
輟研覃而蠶絲未終蟬蟬振鬣新春復至舊習難除仍當閉戶山居聊以卒歲蜀  
裝頗餘千兩合前產遂可得百畝之田昨至會見一住屋頗云完美當俟三月

移家徑往五年之內昏嫁頻煩過此再游行將六十自非時事催逼不暇及四方也蜀中遂有治機提封與之相接可與滋軒笏山遙為友朋閩運亦得奉書以代面對無咨遠鎮四海比鄰僕已奉真除不遽還佐則秋間可詣訪耳貧叟危病復痊堪為大喜然城中自送台後後氣象便覺寂寥新年往還無因喜樂友朋不可少一人今乃知離索之情矣夜中率復語太諄諄亦以自感唯安神察覽

書院講席乃古人明農之事周公去攝王而居之故教化風行後世以待者英實有古意記曰師嚴然後道尊道尊然後民知敬學王者之所以不臣師凡以示民也閩運在蜀自督部將軍皆執弟子禮雖司道側目而學士歸心非獨丁公下士絕倫亦實緣丁公夙有重望乃可言古人之禮若新起節鉞權位未崇信不及民遽言興教即築黃金之臺徒招功利之人如鄭康成之入袁軍曹公反以為罪也故校經一席閩運必不可處待公他日撫湘不辭自屈則賢於閩運者將至而閩運之應聘不待言矣僕徒曰脩脯豐厚固不為商賈也

樾岑仁兄先生台席九月得手書其時正海波飛火之候遠聞民頌具仰殊猷張帥跣奔石公珊至亦如胡咏公之援常德曾滌侯之走祁門成敗不可論人具瞻

何能慰望乎孤拔比於曹彭伯仲間耳會當自投天網跪就長纓聞運留滯益州  
自居井底無緣聞鼓鼙而股戰乃得以柔翰為鉛刀笏山迂濶事情志不克展彼  
方不足於人我復不足於彼蓋任才處世之難也天下相趨於鄉原賢者又負其  
予智詩曰具曰予聖又曰發言盈庭非處叔季習情僦不知詩言之可悲也仁兄  
僕亦三復乎江海雖遙聲光如接封印放衙之後必隱然有吏隱之心矣湘中自  
鹽粟興獄瀉風乃漓舊時文友更成市道此間局散將作行屨僧所著書次第寫  
成亦菁華既竭之時然而不褰裳乘白雲者孽業重也又得博觀世變煦濡故人  
冬至晴佳明牕手奉敬問同福不具

樾岑仁兄先生節下奉別經年聞高軒過長沙時辱臨敝廬惜別眷游無任感念  
東西相距萬里為程每懷廿載之歡如話前生之夢雖學道相勸四海比鄰响濡  
之思何能自己况今風波駭動時事倉皇持節聞瀛近聞瓊夏便恐奕棋不定舉  
燭徒書無故震驚終成笑柄躬在危局又不若事外之超搖也是以西風暫起每  
送危心明月初生便吟清婉僕良會之不遠增他日之欣然矣聞運重見繫維要  
之休戚方遭多事且許淹留無可為名仍居講席今春忽聞婦病馳還料理語丁

甯於婢子託末契於後生三日而行仍已入峽湘干揮手擺落俗緣此後山巔水涯一隨所遇行年五十始欲自如道中注楚詞廿五篇頗疑屈生遠游未忘情於侍從將古無獨往之轍抑生有衣食之累乎閩運力能自食游可無方蜀水楚山芳菲靈異不能效伯夷太公居海濱也東道主人當復啞然時暇幸以書報

樾岑仁兄先生節下在蜀奉兩書後旋謀還里亦欲東游因循未行丁帥即世當往弔問沈滯至今醜邸觀兵注意船廠想督工勤實積習盡除亡羊補牢箱馬應容肫誠之意足報朝知石公樸懇定相仗比李劉舊識輯睦無間亦一時之良遇也閩運留蜀三年終不能久故及主人無恙時解館而歸既有倦誨之愆不復作舉比之想家中差足自給隻身北游將買宅淀園聊充大隱秋清泛槳從揚淮陸行北上行有日矣鄉語翁次子傳灝家食維艱知交寥落莫能振拔閩運與之姻婭庶也無戎因念節下篤志舊交尤庇寒士鄉子雖無技能誠實無苟管庫之任差勝市人特與一書令謁鈴閣知必加之拂拭稍潤脂膏附上所列二經藉呈道正詩補箋又大加增改擬俟明後年亦付手民以省學子傳鈔之勞去歲又著楚詞注廿五卷方付蜀局剞劂未畢廿年所研討略已宣矣嘗謂生平撰述當俟百

年後有力者開局校刊今為門生迫索已出其半除詩文決不發刻諸經注尚有應改者定本為難他日仍須自刻殊違初願也長妾及已嫁第四女又相繼夭逝心緒殊不能歡然此生愛緣剝割盡矣老對孤鐙蕭然獨住俗情既減識力加增惜未得海上良朋同修同證瞻言旌旆無任欽遲專肅敬安並問府中均福

### 與宋生

芸巖仁弟文席得惠書詞采博麗雅情幽怨循誦往復中夜不怡未知吾賢何所隱憂而悵感若此及覽別紙並原封衣銀語多悔憤然後悟儒者處世未能坦懷而多有物累也夫以高才年少盛名早科操行猶潔卓卓然不隨流俗而又非有原憲顏回之貧無羈旅餬口之憂求之古今文儒其能得此者益亦鮮矣微獨儒生古聖賢遺遺豐于此者又亦鮮矣相去稍遠雖未知平居俯仰果若是之深癢抑鬱與否而言為心聲觀其書詞度非故為是牢愁曠達之言即今心境相睽而既已言之心必慕之然則今日之遇宜若何而後自快抑終遂無申眉之日是可訝也家境順逆吾不能揣知就其被盜償盜一事驗之是殆一意孤行而視當世之婦人孺子皆足當春秋賢者之責宜其見之不廣矣見之不廣不足以鍼砭當

世乃適足以疾疫我生故不能不為吾第一開陳之也今世政廢久矣嘗以數大臣共守江南名都而忽然被盜又嘗以七卿四相諸司數千百人共守一京師而忽然被盜天下之有四川四川之有省城省城之有陝西街陝西街之有客店客店之有宋孝廉宋孝廉之有衣箱衣箱之有衣誠不可云太倉之一米矣一旦被盜而曰有司之責何其重視有司乃至於此耶然既告之閩運閩運固非有司之比也遣一能緝捕者偵之而唐提督乃與聞其事焉非其無因而橫相干也唐提督偵之而懼我之窮其事則謝曰是不可治牽涉多矣吾適有衣可償則未知盜者之即為唐提督所遣耶抑別有有力者主之而不可詰耶要之緝者償贖天下之通義古今之明律無可科罪者也衣之不已而又贖之此則世故周旋之厚禮亦其以經術飾世故使其衣不出於償而因此以結交於文士宜亦君子之所許也乃吾人之處世則必有權於此受其衣答其意不獨答其意我之所求在此也償於盜與償於官償於友償於路人有以異乎無異則已償斯可受矣彼非重宋孝廉宋孝廉非受之於彼凡為閩運故也辭其銀示之義不獨示之義且以杜其後日無窮之求與一時自得之意以為凡武人官人而有財者必意揣天下之儒生



文人皆好利而忘義故凡與世人交不可受其銖兩之贈非矯激也受之則彼輕我而交不終亦全交之道也兩俱受之兩俱還之如吾弟今日之所為亦綽綽而有裕而至謂其無重士之道與悔其往見之辱則大謬於情而亦不安於義持此論之彼景許二考官張學使丁尚書王院長其能高於帽頂而知重士固未可知使吾弟知之則又悔乎今年總裁幸而不取假使拔之高第則翁尚書寶中堂者固不知重士而無以高於帽頂吾弟知之則又悔乎悔之無窮而方寸之間唯有荆棘宜其牢愁隱憂而不能自遣也於是而有材材實為累以其日挾所長而自困躓此所謂膏明自煎者也海內甚大斗室甚寬一日甚長百年甚促不求孔顏之樂而作窘迫之囚蓋其猶徇俗情未聞通論愛才者惜妒才者喜非所望於吾賢矣芸巖視余誠有不盡宜強飲強食曠然畢然文史優游衡門嘯傲時以暇日選肯來游閩運雖無硜硜之操頗有恢恢之志願以所見為知者談文詩俟點定後別寄先此奉復不宣

前得手書具諭即吉去歲同學北榜勝西今又得李潘必多佳選但華美實傷又在先達誘倡之玉女所以思吉士也閩運區區所以望蜀才者不在卿雲之黼黻

矣還家二年散於編錄方贖故山拟作堂室城宅不戒土木大興負債累累求者無極適有燕使因遂蟬脫來書云云未遑深究今者携持弱小安抵津門督府除館相容不復言瞽宗之事比之丁公更為優假虛名忝竊大架狼抗惟有閉戶潛研聊充市隱吾弟與臯卿並茂才德尊經首選宏我漢京若並得留賢惟須養望廖劉明慧深淺不同而並嫌輕躁因時箴之使進大道則友道隆矣楊生聞漸安詳想亦習濡功利不可則止同則為謀勉之勉之所貴乎為學者廉頑立懦化育英才也師友之間而有所未乎此吾八年所以自咎而辭去且終身不敢言教學芸子有心人能勿傷乎一士有成千秋為美願無以自輕也湘士多我慢又不如蜀而堅忍或過之其教之當施斧斤僕病未能吾衰久矣且期暫置以俟河清初到尚未移寓念急相聞可與臯卿共觀

留館高選文名已振子元來乃云欲俟一二年後改外任可為莞然凡慮過則愚有庸人所不為者而奇人故為之此一說也陳之戲耶子之誠耶吾惟洗耳而已來書念欲相存此自至情但車僕返往費十千可供京官半月糧亦可省也已遣人覓宅淀園申前年之志但未知能得否湘士入翰林者有陳伯商落落雅人頗

與俗忤聞運世交也可與往還浙之黃仲弼亦好事無江湖氣皆與介性相宜至於異議殊趣正通人所樂觀聽多聞見寡尤悔之所由非欲吾賢一之也猶以自持通以博學二者相須然後可論政學臯卿謁選能得湘令則為佳耳升沈不在此但惜其棄書太早恐臨事自用又恐膽識未壯出京時必可相見並問近好

### 致周學士

自菴大文學士函丈北行南返自致途窮獎許之餘加以贖錢少陵以左丞一誦其句而回首渭濱以此况之當何如矣臨行三會甚樂而從者不來趨門奉辭又聞卧疾歉然罔然載此情而還耳漕渠風水順利於仲秋中旬竟達沛甯涂中補注尚書大傳四卷鈔敘呈覽還山再當奉書先謝厚意不勝區區

奉九月手書嗟嗟拳拳彌增欽遲名人危重家難相纏垂老措持殆難拼遣然脊原相守差盡友慈子舍貞姬益明庭誥又公篤行所感也每與稚公論今世風流浸益浮偽如吾自公猶有正始之風而退處貧居元亭寂寞曾滌文嘗云爾時位不過侍郎乃為不過今日云不過侍郎則不可矣聞運言若前禮侍亦未足傲子雲也以况雅懷知往言之不謬矣賢子在蜀雖病猶為牧令中上中之才簡兄在

此時避嫌不肯薦稚公亦未能驗見故閒居甚久昨翰仙為謀令起病求一差委自效今權稅江陽此乃督府之特恩也若勤廉當可見知病小差仍可典城無以厯念院生中穎悟者不少惟用世才不多觀閩運荒落何足知教通經致用蓋有志焉講論亦時以來誨勗之庶幾所謂開拓者耳漢書補注寫本若成幸即寄下此間設書局剗剗不難校勘亦有其人閩運今春甫還因留度臘明秋便當還湘緣湘中經席殊不得人欲還更張不然反為俗派也肯甫孝達比相見否伯寅久不通問然恆相知聞晤言時千萬致聲冬寒伏維尊候萬福為頌

### 致王道臺

鼎臣仁兄先生閣下舟中一別不記春秋然消息時聞漸入佳境想堪屬已得園圃無東西勞燕之恨即可喜也魯公事甚驚人如此舉措峴公力量甚大靜候指揮亦有餘力及我乎盼甚盼甚衡陽馬先生字岱青酒狂也駢散文俱傲岸不羣同時富貴人畏而避之遂以窮死其子才不及父而窮過之不得已來投牖雲牖雲遂亦奇窮茫茫天下無可告哀竊思仁兄能轉窮為通又憐才士特書相干並令晉謁噓枯吹生尚不須升斗之水而已望若雲霖矣閩運比年踰伏荒洲聊避

幣聘不然人人皆為大人單派我作師耶甚難堪也

致陳道臺

伯屏仁兄先生閣下去歲見復賀生書已灑灑盈幅具感相念八月得惠函及八先生事狀乃知雁行折一慈侍曲承抑痛強歡誠勞心慮但名聞天陸祠在桐鄉修短之期誠當委數如聞久淹郡事志在江南棄地依人實非良策方今兩洋瓦解二王復用局勢未定尺土可階若率吏求人連城保障平原之業亦在書生縱不得權差可守職或奉親還里依然故我一盤目宿較勝旨甘已得一符翻思作客甚不可也聞運伏居舐筆差信無求獎望殷殷非敢聞命留壩循政遠未前知昨詢門下景君云皆實錄尚待訪之明哲以述嘉猷惟宣付之臣未宜家傳頌贊書後則可勉為仁兄兄弟之情惻惻相感聞運無望溪亭林之名實有嵇康鄭谷之疏慵逋債滿牀分陰難惜唐鄂生所謂假臣以時日是在仁明耳自蜀還了不欲出門又因少荃中風北游半歲今諸公衮衮坐聽升沈不仕無義吾知免矣專復

與易世兄

中碩觀察大弟侍者昨與子大言兩仙童之說託其轉達想未能盡言也今海內有如祥麟威鳳一見而令人欽慕者非吾賢與重伯耶然亦惹非笑不盡滿人意者重伯好利中碩好名故也好名非獨好忠孝之名即母姊皆仙白呂神交皆是浮名見諸行事害不及人故無妨也筆之於書有目共見則生同異矣同必有異則必損名強謂無傷人實傷之故吾為仙童之說謂夫仙童有玉皇香案者兄日姊月所見美富土直諸天遺棄一切是上等也有幽居巖穴草衣木食者一旦入世則老虎亦為可愛金銀無非炫耀心逐目移乃至耽著世好情及娼優不惜以靈仙之姿為塵濁之役甚則以劉永福為賢於李鴻章馮軍機可以繼曾文正是其蔽也聞運常見敗於金仙有詩為證此十餘年來大有不同故敢誦所聞請吾賢自擇之不足示尊公他可知也亦不足辯論辯又好名矣

兩得手書及見贈名篇已裝潢黃泥壁矣游詩才氣老成是近年進境警秀不及巴船比三魂則不可同年真假不同喧寂不同也六女相別有信寄五姊無一來衡者無從問訊知復有江湖之游有一語奉勸必不可稱哭菴上事君相下對吏民行住坐卧何以為名臣子披昌不當至此所謂可惜函樓無板凳者此之謂也

若遂隱而死朝夕哭可矣且事非一哭可了况又不哭而冒充哭乎聞還言不見重亦自恨無整齊風紀之權坐觀今代賢豪流於西晉五胡之禍將在目前因君一發之無以王夷甫識石勒為異也

### 與丁婿

康侯世講錫及棣芳均好前得京東兩處書方欲作書寄京旋又得十月來書乃知康侯已還東寓矣棣芳又云當附鄂使寄信今亦未至想未便也女子有行最不宜眷戀母家亦如人臣許國不宜謀私家事棣芳聞教有年矣尚不知此義耶今年心緒不佳為國家多故不知究竟如何欲游不敢悶居無味加以六女多病恐成內傷九十女長大未嫁若無姐姐照應隨我更為累贅三婦畏事四婦稚弱家事無託以為焦悶更不暇念及遠嫁人也本欲寬心反接得煩心音信於遠人何益乎時事如此惟以蒙頭過日為宜過年亦不相宜故今年不進省但在鄉下看龍銓師子耳二姊到永興學署聞亦多病三姊本回因其兄公病故不能抽空我明年仍在衡州黃氏外孫及盈孫同學讀書均已上路此則可喜也夏榜眼程舉人廖李拔貢俱入書院肄業更有陳完夫內齊極為熱鬧如康侯仍來肄業是

男子壯志正事耳今兄遷廣東地較餘華而更難治庸人以為喜我更不喜也昨因在鄉過生日來者數十人朝夕極忙兩日後稍暇又安頓年事雨雪陰寒怱怱作書順頌堂上年福

### 與鄧直牧

得書知之捐官既太大送禮又違例因來人速攜姑存果菜玻璃合及一駸仍付還行事以穩慎量入為望

### 致王訓導

理安仁兄先生道席浙使促程賢賓關侍仍承寵送適愧粗疏竊計祭酒板纏商農祇候必居左席不屑鳩樓在北還書未即申問昨得兒子書乃知獨隆高節終仰裁成志稿全清高軒乃去非言可謝顧已增惶謹即擬上序文直書本末寄呈點定便可付刊方志中有陳小心乃曹鏡兄本師已索曹稿底忘撰增入並乞再索用例語補於上篇之末其詞既求代作不必又拘泥筆迹必需原手其餘闕略者可增則增黎文肅子來書以其父引劉崐云云為薰心利祿賢哉達識欲過陳咸此語得之親聞涉筆實錄初無譏刺之意且黎子前已熟讀未聞異詞今復有



言自可不論然嘉其志概欲全其孝即將閻運所論二句刊去亦乞轉致黎子及同志諸公俾知閻運陽秋初不借官書說私話故毫無定見也諸表有宜與傳相聞者亦求照開呈自序定其前後來樣又少橋渡石路二表又須將故城圖改為沿革十三圖其作中星諸表者宜並列名均求垂念公私代為安定高陳謬醜不足辱賢儻肯北來謹留函文計期一月便達亦使京師群公知吾宗大有人也

與瞿學士

子玖仁兄世先生台席江行悉荷提挈復命竟在宣後何亟亟耶蓋大沽逗留前緣耳閻運於六日到津即書奉候甫兩行筆誤而止昨聞中子天殤羣兒驚惜並云聰明絕世非塵中人也恩慈悼痛豈獨孔妻悲向而已然莊生所壽達者知之若猶相對歔歔便妨深愛想能灑然也閻運來此稍遲已無坐處然此特官話其中曲折已告劾剛彼若不信公亦可不信矣昨與筠公書云閻運到處荒唐此則官話中之私話又未知諸公信否也餘俟新命後續聞先此奉慰並復兼問同安不具

致朱署集

竹石先生道席廿年聞譽一旦傾襟非獨高李之舊緣乃勝黃劉之宿好固由朗  
映亦見才難奉別以來欽欽長遲朱梅香發金護日麗蘇民漸起剛律傾筐暇豫  
清閒公私欣喜東風始至引望歡然闔運雨游焦山月渡洞庭風水平安帆檣順  
利行未一月遂息蓬門城宅山莊俱可容膝積債半清卒歲有衣五年以來今冬  
差樂所尤喜者聘書不到免患為師刻志已成無勞握槩臘深冬暖歲盡日長旦  
接知心夜容靜坐雖賓客之盛不如吳下而閒適之趣有過香山時復思及修庭  
以為一槩先生見此莞爾可知王生當已司釐三條尚希留意中流既云自在公  
事不必認真芹獻之忱攬回有味又足一申眉也

湘綺樓箋啟卷第一終

湘綺樓箋啟

卷一

二十三



湘綺樓箋啟卷二目錄

長沙湘潭王闈運字壬父著

張香濤六啟

曾竹林一啟

吳清卿三啟

鄧辛眉二啟

彭申甫二啟

李雨蒼二啟

向子振一啟

維桂亭二啟

卞頌成一啟

李漢春一啟

黎純齋一啟

楊吉南一啟

郭玉池五啟

家報八啟

湘綺樓箋啟卷第二

長沙湘潭王闈運字壬父著

致張尚書

興平重入暮氣昏黃披霧相逢乃邁之子機雲至洛利見張華今之薄游誠為不負但新歡初洽別日已催割恨而行良因復種在途十夕兩夢清揚以此推之相尋有日飛仙以愛著之故而不復行空石隱之情復思游宦不能不微恨斯人也聞運九州求友月旦方人英彥之材誠為多有然多孺習俗但見目前宏達疏通殆難其選以此自負不後時賢常微恨天性未醜愚忠難及徒欲自適無益橫流竊冀英豪必資通識天下將治固非俗吏悍卒所可參耳孝達居文儒之任試宏獎之權時望歸宗材藝自足又嘗側聞緒論猶拘名教出身徇物非予而誰傾企之懷固非僅以文采風流相為期許而已盜賊夷狄無道不成道寄於人人依於學今亂已二紀事變萬端洪苗法英殆同乞白當事者以其支拄而自謂功名亦可笑也誠達於政興復何難執事當官而行必能建樹求賢之雅亦足感人但過用精神以妨寢食小損大害宜且留心清談廢事亦為往習伏願審此二者以圖

遠大九流輔治儒術尤蕪今襲其名而實用名法名法之敝非但執斯烈烈而亡奄奄而盡其實一也暇亦宜博覽管墨以佐大猷聞運歸於衡陽復期十載相去日遠心意時通恐或遺忘未能致問無以空谷而不嗣音舟行多暇先此申意乖違九秋中通兩訊皆未得手復未知誰浮沈也今歲在蜀曾因教金甫致聲兼有婚姻之議亦竟未得教書京都官忙懶相并此例自久然時聞聲歎未為疏濶尊經築舍諸生大盛復得門下領選搜巖采蘭極稱得士天不欲踵郛中之敝所謂有志者事竟成也聞運於乙亥即得薛興文致聘恐懼慚惶雖極思一奉光儀猶慮自書黃紙旋知兩錢主講五經斯立又得穉公五書約來一觀中無舉比之議是以敢作峽游及至乃復見羈扳貿然入院名輕學淺果見推排勢不可已與相搪突幸諸生相諒因愛忘憎在再經年吁其危矣離家既遠舍已芸人又復翩然志於出峽竊念仁兄當始終其事以副初心魏闕雖榮名山亦樂何必遠期尚侍坐度年華且名實雖隆真傳未顯駸駸日老逐逐仍勞似宜暫去承明來遊石室五年之後聲學俱成重入修門未為晚也高材難得虛譽無憑以今日之地望當無敢為君勸學者非聞運不能發此言其以為賈生耶汲黯耶計領嫂雙飛懿

親歡聚生徒喜慰自遠然轅此間歲奉三千差厚於監錢六百亦使閩運得藉依聲價相與切磋是所願也非敢望也委曲已略告竹筭編修餘意更令諸生面啟先此致懇伏希深察正孺當已西邁若在京尚求致念蜀士英妙儻守而教之定軼卿雲開山之功不減五丁閩運實緣湘中有切己之事未能久駐明春水滿必戒歸舟臨筴拳拳無任欽遲霜寒歲近珍攝興居

前歲因胡縣丞奉一箋詞意詳盡其人阻事不出因未呈鑒鈔呈則無可取重寄又無可言因此闕然非敢不修民敬也然明公臨州詢訪幽隱亦宜有一介之使責於空園殆類士元所云君臣俱失者矣側聞宏開工作大啟學堂愚者料其難成俗吏以為不急乃鄧保之則云前在南海規模闊遠後來蒙業猶可富強彼儒者之言若是信聽遠之多不聞也既非夙昔所以相期故亦不能獻議民從甥曹紀元孝子之孫勞臣之子文章爾足博涉多通似是向上之材而頗趨時尚言及開採每為扼腕公之所作彼獨慕焉以為無階自通不然何減法正其指陳鐵政動輒千言利敵朗然若有可覈閩運無以知也然每恨明公之無助竊憤眾論之腹非今有人焉自甘驅策又其材地足可特升何庸不介一言令公知之但薦士



之書今成禽犢挾函懷刺雅士不為紀元久望旌麾聞運恥其私謁雖曾薦之於江督頗獨阻其鄂游今聞其已至武昌因復肅函令其晉謁明公試一召見扣其兩端或冀聞所未聞異乎千諾新春延慶伏想安和無任縣遲

瞻雲西笑每欲夏游留滯因循又復春暮論者以為蜀帥求退就熟當遷天府雄藩不必兼圻為大果爾當齋錢出送也雪琴墓銘前歲已將求丹筆材官咨且恐不能賜許今之能者復有何人李謹翁沈皆不肖其任俠謹鈔稿呈覽改正後幸為書之奉格紙兩幅或偶有誤字別書於後如嫌太小即求飭侍書更紙別書以成華寶來使羅都尉亦名家孫子其父伯宜太常早有名字想所知聞羅生孤露失學又疏弓馬然粗知吟詠未墜家風如蒙收置鈐轅齒於騎吏則翩翩文采為出色材官或憐念忠儒俾其家食乞飭察吏傳諭南鹽釐局予一泐薪廣半俸所不足若能俾近衡州使得就學尤為私願專此上瀆無任悚企

二紀睽違兩宵談讌還舟迅邁八日抵家近想勤劬但有永歎然江南部署已冠劉李鯁島微蟲未能送死從容造膝亮有其時新歲延禧綏福為頌前話乾館之敝尚未盡詞惠中人心尤甚水火士農棄業唯事鑽營計敝州釐鹽二局歲糜五

萬金卅年來幾二百萬矣而湘人不富游惰日滋純實之風蕩然已盡且專就鹽政言之商運原不須督銷督銷尤無須分局其始由於曾侯欲調劑一二窮乏遂至全歸勢家漸及京官親族至於督府僕婢媪又其小小者也鹽商浮冒五六十萬金許薛阿稍欲理之鹽幕陳姓納賄三千許道反被撤差非沅浦固不能有此奇政實亦根株盤互不可得理今譚生告終事可更始公遂能廓清之耶湘人之福也若猶欲循常更替則必如志道其人者稍去兼弁頗振孤寒或不失設局之本意蓋此差初以位置湘人漸以位置湘官漸為江南道員一差漸為湘人官江南者二等美差本原既差何能綜覈虛費金穀不感憲恩甚無謂也此差又有幫辦一人例以舉人充之李相曾欲見委閩運對曰公不笑訝則捧檄矣今有姻家彭主事江督外孫名父子父子五舉不免飢枵其性直齷嫌怨者眾王祭酒等力能絕其生路無所告訴敢干明公試一垂詢必紛然斥短攷其劣迹乃一無徵如魏武用人必蒙首選今非敢謂其能破除積習仰助鴻網特以私恩同之請託閩運資格境地本應乾館之條偶一千求知當笑許其或大風吹垢一洗凡空悉罷諸差為風俗人心之計則清源正本又何求焉因論一事故不多及

去臘恩惠告還未復通候旋讀謝表具仰訂謨晉使偶來略聞初政望風解綬之  
效既著於下車指撫安定之功無勞於動色儒術匡濟久闕其人大用大效海內  
傾企側伏湘壩所為神王也閭閻運濫居祭酒實愧素餐經義猶蕪祝予已慟次子  
稍有涉識道卒夔州緣此悼心遂還終隱近為寫定春秋例表又祭法喪服箋更  
治禮經稍尋微緒然心煩意蓄俗狀紛然前歲有書勸台端以宏遠今茲併章句  
而自疏吁其蔑矣山西近日循吏推龍鐸臣文苑則董研秋此二人者不遇明公  
菴從物外未審史館徵傳能與甄揚否善化賀仲純以通判候補幸棘鈴下此人  
名父之子操守有餘頗習律條蒙委權局僕可試之別駕雖未敢云展驥要之原  
本有自必大異捐保諸班因其中道奇窮改京就外隨取碌碌自同瓦礫又依倚  
芝葆恐疑官派故遠為說薦以待鑒衡不然則舉錯隨宜人材易見無俟野人道  
地耳大政遠略非簡牘所陳故不多及專頌台安

與曾甥

竹林賢甥侍福朱洲小泊適得順風因遂揚帆乃聞見訪惜不少句留也來書未  
明示不知何故上省致未更問昨復專使乃知有志鐵政且欲鄂游是一策也去

年已達甥名於峴公乃是正辦鐵政已成罷議張公強自支持當此時局用彼群  
織何能有成亦何須真成不過開銷銀錢而已甥言謬也然書尾所云妄人則吉  
之言一話破的甥姑妄言之吾姑妄言之必須預備川資安排火食此二者不可  
妄也先請騰錄尚欠三千錢吾許為甥還之去年忽忽忘付甥可告三兒令還清  
此不可妄論語家本初成便以借人乃三兒之妄所著墨子未成書體亦多未盡  
吾已看一過留在家中其原本當還我此等皆宜鄭重者而今解人不易也豈西  
法不重付託耶張公性情無定記識不精要是可與言之人但僕僕干求則彼此  
無益吾書極為斟酌可遣人送去待其傳見恐須帶被窩坐官廳也彼好排場喜  
奉承有馬士英之風又非尋常名士之比甥自揣摩可矣

致吳撫臺

清卿先生節下廿年前曾李亟譽高名無緣一見前歲連橋夕渡邂逅旌麾思即  
停車以成傾蓋霜寒風勁車殆馬煩北轍南轅復同勞燕然相知有數今聞無遐  
特欲使區區昭於識察耳豹岑去後孝達孤危聞極能降心同其伊任此實朝廷  
之福但友期直諒政貴當官操縱之間亦云多術澳門一事似聞節下及孝達頗

復如滌公天津時委咎中樞則何貴乎智勇矣海內吏治久頑民風不靖先求自治必能拔以廉風巖處傾聽敢效一得敬縣生員郭見安丁稱公幕客也自負嶽崎願為時用曾干彭李皆阻闢人今復踰領謁張不假介紹孝達愛憎難測恐其訑訑聞運與節下向未通書不嫌請屬要皆古人恒有之事僕其大困希有以資之至於材藝功能大臣之所素審無俟野人請託也專此達意敬頌台安惟照不宣

頻覲清光實開蒙塞地嚴政勸未獲究詢承示圖攷退而私忖輒以所學微加暢訓但恐尺翰未合所訂龍門在遠請益猶賒先寫呈覽尚冀誨所不合期於大通無嫌往復以衷聖義也門人郭生私淑字說推闡主帝頗有發明屬其寫呈所作以為雉藝如可觀采希進教之郭生久客諸侯頻遭試黜前謁游領表曾與一箋令叩崇階自以所業未成懼同游客懷書未達致聞運十年前仰攀之意亦鬱而未聞今之求知仍前意也而志趣可嘉矣舍戚丁百川道良不工自謀妄冀脂膏棄實缺而求優署誠為失計去年與書責之猶復不信今困守兩歲負累巨千前求鈞託藩使久猶未效夫銓衡訓成天使事也務乞徑飭回任則公私兩濟亦使

羣吏各安其職非敢私請庶佐遠猷閩運專研三禮多所未喻欲求公與督部特開禮局以兩省經學書院之費及弟子見員合治三經成王正孺纂集之志緣迫科場人心無定俟秋後當上條呈專肅敬安無任想企

前寄一詩未奉還和軍書旁午乃應所題頗聞壯往之心屈於入朝之論曾滌公飽諳為客之苦王威甯載詠灰忍之章遙望旌門未陪羸亥朔風邊草悵望如何武岡鄧知府輔綿今年在籍辦團計禽盜首為州官所擯甚為怏怏因明公移鎮乃欲自明兼曾佐黔軍久任邊缺習勞耐苦操守堅貞不遇憲知猶從常調僕蒙拔擢令備前麾於湘軍亦為通氣非黃左曾陳之文采亦必不可少之麤官用敢薦呈伏惟昭錄閩運平生志願滿腹經綸一不得申每嗟感遇所差勝者不為指目聊可倘佯明公蘊積必申會當光顯伏冀堅其志慮無隨俗推移親履行間必確知船堅礮利之不足畏他日並機器船廠一切裁之乃後知經術之不誣矣曾文正徒欲阿時以求避事致此紛紜中興諸公不能不受咎也他何責焉偶感遭逢輒發狂瞽昧妄為罪

### 致鄧親家

辛眉九兄先生親家道席二月初得手書歡若對面寄示新詩高華猶昔而風格  
彌適復似壬乙歲刻燭分題時尤有齒宿意新之歎耳舟中課讀之暇先和兩篇  
文意粗疏恐不足廣揚清唱計此時彌兄又已至省家園春興獨讓阿龍未審復  
有娛園詞句否三峽躍過正兄少年本色閩運垂垂五十壯心自喜得君言差為  
神旺此來携巫山之半雲將九雛之十翼乃如道士肉重思借大鵬又不堪飛仙  
一笑也時局日變肅黨連帥兩湖左伯癡肥聲言出塞曾侯統絳遽界全權南人  
為相誠非美事本在閒冷坐視舉棋一二年間即還耕讀再為卜鄰偕隱之計蜀  
中民胞不可振興三數文人或當成業為此重往料理非有所樂也汎舟始至夷  
陵明當入峽江清月缺夜起作書敬頌全福

秋期盛集日企清塵賢子來得手書乃知養道深居殊無游興及觀大著心醉目  
營四海比鄰又爽然也孝達欽遲高名託誠羔雁越行甚易胡不往從豈聞彼乖  
厓託之憚羨或云天行見異將俟來年閩運項為長李所邀亦當北邁豫與君約  
如兩家子有與計偕者便俱率領入京籍此將雛成其比翼發皇耳目開拓心胸  
且自陶情何須坐老乎河不南徙政自東傳頗引新機洵許且樂否則蒲編斑管

目作生涯揭曉之後再有續報祝融之警兆應旅人或亦其祥耶使還頗促故不多及專頌雙祺不具

致彭親家

正月一牋六月乃達可見湘蜀之阻循誦復書慨然有志於本朝經學之編闡運舊亦聞緒論而以為知言矣但經書須有師承自通志堂之集為世所訾阮集出而又變本以加厲矯枉而過直今欲求諸老生能發明師說之書杳不可覩唯小學有佳者耳豈得為鴻編鉅製耶大著易集說近之猶嫌有去取闡運將俟弟子有特達者各治一經皆以集解體為之非十年不能辨孤身在蜀舍已芸人又無此心緒田光所為發慨於銷亡也吾湘校經堂生或能及此故欲辭歸為識塗之馬又恐羅研丈以白簡從事崔貞史於戲臺相見郭意臣以去就要君則敗興矣昨與丁公言天地閉賢人隱聖人作萬物覩聖則吾不能賢則未敢自謝當今之時非獨總督非隱主講亦豈可為隱歸與歸與老糠可然不必吹藜今年若不成行明春定當還里比日武閣事忙尚未與主人相見明年關聘已緩之矣封翁而謀衣食未之前聞係還時當借箸畫策也



去歲聞辭講席不入城府即欲入山奉訪人事怱怱又三時旋值冬沴乖宜傷  
慈損愛雖事同空幻而情寄難堪道力勝人委心知命移居學舍專養天和幸甚  
聞運買山不就朝夕靡康人託我以遺形而不能安之於大宅其為負負豈可勝  
慚坐此羣勞百事俱懶百里之程頻改期約雖家人或未喻其所由也先生豈照  
之耶垂翼明夷終當一奮惟壽星能俟之耳賢女伶俜昨始立繼其兒頗靈便異  
於兄弟蓋承福被城中今年安靜下子昨有悔過之詞殆將去矣因便達書敬頌  
安隱不宣

致李副統

兩蒼仁弟道席前寄兩書由左營轉交正值心疾甫發之時續有從京中來者言  
豪氣未減近况甚困且慰且歎又見少荃所代遞條議知吾弟復有躍治之志俄  
夷謬議發詔求材騏驥不乘可為太息天下之事誤於庸人者少誤於清議者多  
庸人之誤危顛不扶而已憂世者之過則危言直詞以惑中外如議和約而憂根  
本是也東三省之空虛非一日矣今委此一二人召此一二人一二人守之一二  
人逃之其於本根何所裨益而天下騷然兩宮百慮日日常若俄兵至而俄人固

晏然也久之知我之無技亦或少出一二語以嘗我遣數十騎以疑我而此一二  
 人者早已張皇失措盡敗其度乃浩歎於事之不可為而仍取前日之失策次第  
 行之則何如坐待其困之猶愈乎崇公不畫押左公不索城亦豈能禁俄之通商  
 左自耀兵崇自伏法又豈能禁俄之通商他日俄人輒以兵至固有諸軍禦之矣  
 若不以兵至而以商至陝鄂疆臣能止之乎廷議能止之乎今日之謀但當慮此  
 固不必以用兵為亟也恐哲人亦同此論聊效所聞聞運於前年除夕至成都方  
 崇大以為非橫加撼阻業已應聘不能曲從張目與爭極為可笑章程既改遂當  
 試行因留一年中復還湘度歲今春携妾同來吾弟前索之子已補廩娶妻生子  
 今不能復從君游矣出山徒多人事仍當還隱弟亦可移家湘中冀共晨夕丁公  
 推賢好客或來作蜀游亦佳便可居閨運私宅人海中無甚佳趣達者自知進退  
 耳至都人多人人可以致書所以遲遲者本約無事不空言也筠仙鏡初俱無恙  
 湘中固多良友君所激賞之曾沅甫究竟何如年近五旬當去世俗之見莫若於  
 經書中尋求治理此金石之言非季高紅頂之罵也久不通問夜書五紙以當面  
 談即頌雙福並問蒙古兒妾無恙

松林一別大似蓬沖次日至城與督舟俱發比至津衛旋奉手書拳拳之情感何可說萬金期以他日故不復命小住三日意氣歡然十五日明遂從海運春分到滬寒食還家几席依然游情倦矣求田未得萬事無心三月以來課兒自適京中尚當有通問者故以例及君惟祝時人早醒塵夢棄家游學以樂暮年癡待黃牛不如早從赤松也沅浦愚不可瘳筠仙耄而好事俊臣歸遂未見兄家待以舉火而彼絕不相聞所託全不足恃故知世人荒忽不可捉摸弟實心孩子受騙多多尚不如左十三猶有回信矣歸家閉門謝客俟移入山中方當展其驥足秋風道爽或議東游暇若相思惠書為幸

致向右江

子振仁兄大人閣下久未奉問側聞政名隆隆宜民獲上騁其驥足繼美鹿張桂蔭非遙鄉人咸喜幸甚頌甚聞運蜀游十載遂成老翁伏匿山陬久謝人事昨因族孫女來覲詢其家事云其夫李恩生謀食溇梧曾蒙盼睐去歲重游灘上未得枝棲四壁既空一身無寄李氏湘南舊姓恩生兄弟孝友篤誠俱善楷書亦諳箋記與聞運重昏舊媾曾未能拔振其才自愧力微每嗟貧病但以粗知名字即是

因緣欲令於嶺外安身或期樹立然旅食不繼漂母難逢伏維仁兄洞悉人情素宏獎納曳裾雖衆授館不難用介一函專求鑒愛尚乞遣招至府光借尺階徐量所宜沛之河潤月請能得二萬錢以上方可稍資奉養略辦衣裝既獲歸仁自然堪事他日再當關之當道俾遂機緣前湯右菴過衡時初不知恩生在桂失於面託旋聞移鎮知飲啄有方也閩運頻歲遭凶今甘窮處築室漣上假館東洲城中故人散亡略盡意氣衰落無可告言因事奉箋知哂疏率敬頌台安不具

### 致維將軍

桂亭仁兄侯帥節下夏初榮歸適欲再謀餞局致未更送三危曠望使星恆朗郵程牋候便若要荒離思馳飛彌懷別促黃鐘律轉玉帳春來綏靜蕃戎增崇威略邊城花鳥鼓吹和平緩轡吟游旌旗柔麗亦壯情之所樂無眷眷於遼頭也閩運留滯兩年仍違歸計故鄉米賤田舍將荒必須一還料理候明春白使定和後海內復康便可從容告去近聞日本復有生靈之意沈公已推權翁帥藩帥當無更動矣今第時有書聞潭府安吉澤坡署提督以來城內竊盜少弭歲計庫儲頗贏於前鹽局平順物論亦稍息矣直東屯軍與民間甚不相安鮑部尤為擾累謀國

不賦糜師間地此則非地公之咎也諸節帥惟振軒忽振風采連劫二司海上當復有撥雲之日耶郵遞到時計在暮春遠想清儀無任欽遲

今春北行將踐河套之約奉贊鴻規兼承燕暇乃值令弟久病不得居停華蓋又赴五臺公卿多疑行止者春風吹柳遙望玉關旋復南轅遂睽清教比聞俄人求地朝議旁皇屏障西陸定多勞慮然通商交質大局已定環海輪船處處受敵彼若果稱兵內犯必不問關沙漠之中伊烏屯兵實為勞敵能聚兵一戰而勝之乃法

聖祖舉地而界之仍畫嘉峪以為疆界古之鄰國雞犬相聞初無見福之患國界不在遠也西洋去中國六萬里而能駐京師當此之時侈談邊防者豈非至愚無恥之尤乎漢人情和戰以求富貴朝廷寬仁待人未之悟也聞運無由造都一陳其言唯獨丁文誠相與咨嗟今丁公復亡益無可語節下方當大任雖未可昌言棄地要當深思鄙言勿為無益之憂此則少裨至計耳聞運近留縣城督刊志書家事久付妻子寥寥無歡明歲仍當北游以豁煩悶偶逢官使謹付尺書敬頌勛安不具

與卜撫臺

二使方來即知大中丞過采浮議初以昭昭易察了了難誣雖衆口之無根顧立身之有本內省不疚何懼何憂有道之邦危言危行固少焉而眴若實泰然以處之昨在縣見朱編修乃聞親承訓誨以閩運交通臺諫誣詆大賢既有證明理須置對但未修雉鷲私借羽毛幸已見信於友朋何妨自居於黯黹且水清石見石無躍水之能劍按珠投珠無離劍之理閩運息心仕進中丞即擢兼圻終明投杼之讒猶望式閭之禮想中丞東山再起南國式瞻中外知其姓名政事在人耳目落落行意自有千秋日日言退已多一出素稱孤立豈恤人言匹士雖愚平生自許瞻言百里驂斬時賢於曾胡或致其切磋故流俗多驚其狂直至於世間之臧否曾非懷抱所往來彼鸛雀蚊蠱之過乎前如鴟鼠鷓鴣之無相嚇昔張儀妾婦自甘始榮諸侯之一懼若子產塵垢不止誠羞執政而後人錢閩學閩運之師張協辦中丞所主一詢可得其端委群言何患其紛淆僕京華物論猶不聞知則巖穴民依恐多枉縱况乎人心險阻世態俯張凡鬼鬼崇崇之行必唯唯諾諾之輩伏願高其視聽閱以遠謨則千里鏡清黎民有利又蔣御史雖無文望願幕前修

三年唯此一鳴疾書乃其得意疑為假手未足誅心宜惜臺網無詒口實如或託於益覆故作諸談亦損威明諸希照察

與李提督

漢春仁兄軍門節下前見已慰所懷陳伯嚴來述尊論見許為霸才不勝感激自來曾胡左丁肅潘閣李諸公相知者多其或有許其經濟從無賞其縱橫嘗有自挽聯云春秋表僅傳正有佳兒學詩禮縱橫志不就空留高詠滿江山蓋其自負別有在也而麾下一見便能道其衷曲曷名欽佩來贖百元便不復辭以相知有深於此也雖然空名無益現錢極難麾下一言而送去百金萬言則傾家矣此又務虛名之過其實投契結分不在此等尊目已愈否聞近又失血或聞有以去瘵生新之說進者此不可信但吐血無妨年壽則所見多矣其實心照常不急不躁此道妙也第因秋深風壯漕渠不通不能不急去明年仍當出游鐵路議定或仍北上暫此告別

復黎公使

純齋先生節下聞名卅餘年同在人海中無緣一見然相知無疑也今歲與勉林

兄俱寓天津乃得見來書垂問之殷並讀大撰碑文舉挈非凡信為冊典復承詢及丁文誠志傳之類有無編次往在成都文誠手定年譜匿不相示薨後鄂生自任作墓銘丹初為之碑而年譜行狀及今未出河東觀察固疏懶亦不諳習或託於豐功偉績自在史冊之云故未便過而問也文誠與閻運為知己亦猶曾文正之為閻運知己外間但以未得保薦不入幕府疑之又焉知真知者乎前年所作誄文以限於駢體詞甚隱約傳狀既非朋友所作所言止此而已較之曾文正身後僅有挽聯者已為多矣然曾公事業在湘軍志者殊炳炳麟麟而沅甫以為謗書竟承特采曷勝感激三不朽之業著一豪俗見不得節下蟬翼軒冕一意立言真人豪也抑嘗論之孔子云有言者不必有德此是言語之言不朽立言是文言之言未有無德而有功言者德者本也功用也言體也平生蘊蓄一望而知尤願先生依經以立幹耳閻運伏處卅年於諸經稍有發明惜曾公早逝未及盡見弟子數百人皆功利文章之士無能讀者初欲倡明北學兩次燕游諸公率以送字游學人相待每住數月輒舍而去家塾教授徒勞無益又攢眉而去之獨寐寤言考槃在澗亦今古傷心之事也以公超然故敢言深有便相聞徑寄長沙可達海



邦秋靜禔福無涯為幸為頌

致楊世兄

吉南世先生專席自託師門終睽鯉問比游吳會驚遇鸞驂既省覲之來遲恐會  
喪之無及言山空望賜楮難裁伏想孝思應悲旅客但酬恩有日誅德無文謹上  
一聯微摠寸結先公優游道藝惠濟親民了徹去來遺留善慶弘光微業屬在仁  
賢外附銀封乞陳翁奠手慰大孝不知所云

致郭兵左

筠仙仁兄先生道席別復經歲企想為勞聞從者又至上海蓋峴首欲招名德吳  
江既冷湘水回春李氏修好收公藥籠玉池高卧恐不安矣卑石思賢待開新席  
丹燒書到事在意中不可不豫防也去歲無聊偶與李相往還論外事皆牽涉大  
賢以為切證誠以當今知洋務者以公為先覺先知雖然青出於藍後生可畏人  
定勝天之說隱然有包舉六合之量如以英俄為三代之治則非事實今寄上三  
稿乞加評定並示其謬以待後世論之但不可使中華朱克敬列之消意錄至屬  
至屬此事頗有關係非笑話也金剛中亦唯趙坪可與聞處士橫議雖致仕老夫

亦處士故不敢秘

筠仙仁兄先生道席盛暑還舟神與北風得上昭陵灘乃逢狂雨回望書屋蘭雪灑然抵寓後復逼秋陽七日不事暇檢故篋得舊點墨子墨之色黑可以勝皜皜之日遂補注數千言並為敘其意鈔稿呈覽鏡初居士方欲覓墨子本先生所藏有佳本乎墨學久不傳我聖朝稽古右文九流弁邑豈不可討論絕學以訖來世幸以餘閒與曹居士共論之閻運願為禽子再拜再拜也其書唯經說四篇最奇閻運所注尤愧異吾斯未信冀聞先覺相處恨遠尤冀移居衡山以永朝夕省城擾擾可以為仁義之遠慮耳前聞皞臣述追書云云何其膽小江南書來方知料事之明此易見也因意奉書唯起居恬和為頌

五月至長沙無日不談蹤迹及觀邸鈔乃知朝廷真大用公萬里宣命專行已志未始非近局一大轉關也若徒仰樞府指蹤便無以異於庸流以生平之學行為江海之乘雁又可惜矣公質弱易攀況多人多生得失尚冀明察獨謀無徇時俗凡臨事皆宜然不但出使而已被人掣肘即是材力不足任極艱危無有轉動不得之事狼跋美周赤舄几几願時以為念閻運近得李兩蒼書欲拉我北游彼多

虛願故亦未定行期或因緣猶得一相見耳駢駢每懷輒附咨諏

見紀綱除夕還書言起居詳哉又聞家報言不及公不知得見英后以否其遞國書不知於鄭公何如亦別有措筭爭論之事邪人謂此行以羣公難行而遣公公所奏張參贊則云公所畏者使法而所請者使英閩運以為人臣奉使唯其所往涕泣辭家者固非慷慨請行者亦謬唯是海島荒遠自禹墨至後更無一經術文儒照耀其地其國俗學者專已我慢沾沾自喜有精果之心而并力於富強之事誠得通人開其蔽誤告以聖道然後教之以入世之大法與之論切己之先務因其技巧以課農桑則礪無所施船無所往崇本抑末商賈不行老死不相往來而天下大平此誠不虛此一使比之蘇武牧羊介子刺主可謂狂捐無所裁者矣夫好異喜新者人之情也利馬竇之學在中土則新在彼國則舊公之學在中土則舊在彼國則新誠為之告以佳兵之不祥務貨之無益火器能恐人而不能服人馬頭利分爭而不利混一鐵路日行萬里何如閉戶之安舟車日獲萬金不過滿腹而飽彼土人士心氣已達者欲是同其比之徐光啟之見西儒奚啻十倍傾仰而已縱不即化而後生有述昔老聃之流沙而胡皆為佛即其效也奉使稱職一

時之利因而傳教萬世之福雲生昔贈吾詩勸以為火莫為月夫化墨為聖進器於道豈非火之用哉想兩公見書必同所然至於覽士風刻崖石雖文士之陋習亦暇時之一奇也吟詠情性以慰永懷亦養生之一道也公館歲租四千金則彼國至貧者日用幾許出使自備費用固一時之苦心然亦不可學奢僭受盤剝宜遷小宅減諸雜費使人知儉儉者非穀於養汰其甚虛而無名者也奇技異寶屏之不觀小利小便不以為喜如此乃可謂儉矣公一舉張生而被王撫所嗾歎異金生而為李督所持喜其儂好故也夫大人者正己而物正好惡不形於色清濁不疲於照雲生之為人自視有餘推賢不足公推人有餘知賢不足海外孤居宜勉所短凡輕生死者或不能平好惡其輕死者其近名也而有悟道真知物化者遇逢驚雷而變色聞毀譽而失守則血氣之為害也或久已相忘而謫謔間及如公於左生者亦俗人之所怪也左之識學不踰明人劣及宋而止矣何足以識九流之秘奧知六合之方圓乃李公者學又不如左甚遠而公無違言其他不如李者又眾公皆無違言然則公得無有好惡存乎好賢惡不肖治國之大經也而獨不可以之容於吾心如惡惡真如好好色吾心之所自慊也而非所以待人况夫西

枝共安之徒昌猷立煌之類乎此皆中土之陳言聊以助燕居之攷證耳  
玉池先生道席瞿舟促發投筆長征小輪畏風八日下漢緣途逗留行過一月吳  
摯甫先已篡立矣督府館我於吳楚公所聯絡湘淮時與張軍犯往還而已一日  
談及清卿奸邪之奏少公云君意若何閻運對曰惟撫臺能稱撫臺公大學士我  
老學究皆不以為然也家夔來文又言輪船民情不便則公所云撫臺要辦者又  
是謠言又何兩撫之不謀乎鐵路父子異議香濤獨蒙褒賞海軍不謂然也閻運  
論之公之行湘輪李之開津路皆為家門外宜有此一種洋貨高興之舉也以兩  
公一代偉人高瞻遠矚得意之筆而鄙論如此又何怪天下之揣測紛紛張香濤  
李黼堂之妄聽妄論乎先生休矣不如專攻鄭康成剽學黃山谷之橫恣優游也  
家書來聞公多謝病遊客閻運常怪公愛見客而外論反恨其不見客足知議論  
難同要之能謝絕孫呂則大妙矣伯寅生平積恨一旦得舒頗收假古董而湘士  
則皆佳者滌丈有孫能承清選亦藉以籠絡不羈尤為可喜閻運破船多載藍盤  
蓋天隨處荒唐幸無齟齬唯頗畏教學又不喜言洋以此無職業耳右銘遂打死  
矣以此又差自慰也初夏惟清和綏福不盡

與孺人

十年相守一旦分襟既殊少小之愁春復異關山之遠復想卿獨處應不勞思然孔雀五里而徘徊文君白頭而蹀躞况於燕楚異地涼暄殊節者乎當堦紅葉寸寸芳心入室燕雛喃喃款語中人偶望遠感仍來又足以駐景延年化公為童者也沔口還書已恨汀洲之草都堂納卷獨聽殘月之鐘雖曰暫游誠為多事但道長難夢畫永空銷已驚緇塵終遲革鞞分無壺公縮地之術而有景純願夏之心歲月將馳優游而已子吟桂樹我咏條枚既見不遐方謀同老安神房內端念忘情如曰相思手書為慰

新年憶遠當復勞思善護玉躬以迎春福幸甚幸甚途中游景已具前書除夕前宵遂抵蜀郡主人相見專以主講為辭辭湘就梁殊非吾意但此間官事糝葛二使多所吹求故未暇正議開筵諸生皆還渡歲且俟仲春方定章程耳成都風土夙稱浩穰然北俗多而南物少亦未遽為天府唯冬煖如春晴多於雨行不遇雪脚免凍靴蠶豆芥菜皆已上市江海棠殆可同時較廣州地少溼蒸最與居游相適惜無縮地法令諸女婦妾侍卿暫一來游也無非聞之更當歎息矣

比遣兩信皆論迎媵事初五日得七月廿五日家書並兩兒文皆可碰中豐兒文實少數句其二篇則全未做是成弘以前法門龍飛相公宗派甚無謂也外舅做一時高羊今得外孫傳之而更高故是罕事功兒文雖不高其無聊亦同唯後二比佳耳然皆可以為秀才矣家媵皆不能來久居山中亦復岑寂擬於十一月十六日起程還湘功兒如未來便可不來如已來到在十一月十六日以前即當同我在成都度歲使其游覽以化去孩童見識明年正月底再同回也題名錄至今未見俟到後再有議論總之隔遠難打主意我又主意太多此離群索居無內助之過也以此推之則卿比年以來無外助之過尤多矣凡人每日當思已過此卿之所尤短者吾每寢食未嘗不思之惜之愛之恨之小年相處至年老而不忘相規斯可感也非女亦傳卿衣鉢吾痛斥不能改既是外人嬾講得他搭一拜上告之聞卿多病甚念損我壯游之志也會當謀歸善自扶將

與六雲

半山無恙四月廿五日得閏月十七日書並承寄筍芥鹽杞豆四種甚慰甚慰大  
哥來書言女多病前曾寄問矣今菜菔精緻如此可知操作如常仍宜保重為要

前寄贈者名為綠菜乃江邊青苔之衣出於蒙山之下江水之中始於宋朝哲宗皇帝之時有眉山史氏女名炎玉嫁雅安張子履與黃山谷為表親始采此菜寄之山谷為綠菜贊今刻於蘆山縣廟其後徐閩中又作跋詳言之此菜宜配以辣椒涼拌食之亦可投沸湯中如頭髮菜之用山谷贊云在吳則紫在蜀則綠石花葛仙米之類也吾未試嘗知其味不能佳但可留於客來下麵或餛飩以代生蔥髮菜耳不可燭煮也又聞陽春妻言女意欲來則斷不可此來水路有三十日無日無刻不險旱路有十日一日須行百廿里女既怕船又悶轎何能至此秋後擬接盼女隨大哥大嫂來或二哥二嫂來女君常欲渡洞庭若能來更佳若嫌遠亦可不必要吾在此不少人伺候院中頗似鄉居亦有醃菜芥心蒿苣鹽卵之類蓮耶亦能發麵起溲辦菜竟可出師又有一年輕女工其人老實勤謹專司縫補漿洗之事所少者夜間偶醒無人可談然夜談亦傷人家媿不來亦好唯兒女不可不來就便讀書也並以先告

### 與代功

昨寄銀乃營勇耳本欲省銀而反索一元以去信力不可省也前方一來得寄瓜



正病洞泄食二枚而愈此汝之孝思也然非去年之罵不及此今年入伏沈陰涼於初秋霖雨已六日猶復時行逃暑者則得矣如秋收何昏期伯璫擇在八月廿三日更請張雨珊查之一切皆借辦唯須一牀耳我作男家請程屹樵作女家用一百元為度若男女上親來無此力量開盤費拜上諸位謹辭恪辭張世兄來尋年伯指與兩年伯塞責汝何必為之慮癡人也癡人也羅振旃亦同此矣撫臺請喫飯不去固是告化子之高節然終當一往見汝乃少爺非秀才也帖用愚姪隨所問而應焉求賢既收招牌調課正其本分蓋因王祭酒揄揚終身不得為清流矣自古亦無清流少爺也書院塗卷革去四人措案又革去四人人材幾何能禁此剝削表率無方向敢辭咎一去斯可蔽辜矣家中應帶來之伴程商霖來即有鋪派汝且專心看近三科揣摩李希聖夏不舂紹弟公朝元也久聞湘綺樓之名若見汝文必云蟋蟀似牛鳴矣汝八股未通曾不自知但云不佳何其僭越但終久有一舉亦不必性急也飄流游學儘發科名白首芸窗亦其應得彭駿五愁兩兒不通余云君家父子皆通有何好處此語喚醒世人不少

六月廿一日得四月廿五日京書言已不作文知汝之好諛惡直不自覺其流露

也試文不通當簡練揣摩改弦更張三鎧五難汲汲孳孳方不負跋涉不孤期望廢然自止此何理乎由汝生來未聞直言雖父訓不能不逆耳又習聞流俗人言汝父話不可信議論太高言不通者即其至通不妨中也噫嘻誤矣今不暇與汝論且論出京之事江浙試事地近人希可以棲身可以怡神昔吳子登先生以編修就白學臺十兩一月之館人皆恥之吾獨敬之願汝之效之也此胡子威之所不屑不必再藉口矣就定學館自應看過熱鬧再行回家此時已十月盡吾亦安居東洲以為後進模楷命當就館即是好命不必別打主意也以汝意處此境遇既貧且賤以吾思之先無片瓦寸土而今有屋有田先為窮巷孤兒而今號稱大人先生大富貴亦壽考雖郭子儀無以過之未為不遇也世俗又何嘗因汝不中而看不起汝自薰心於瞿九哥龍三叔耳而汝又看龍瞿不起龍瞿反看得汝起汝之義不可立我之論非過高章章明矣京城亦須靠筆墨撞錢寫字即可數日食不然坐喫山空此時真無人看得起此亦不可不知也張正陽教書雖好愛管家事我在常德書與八妹早已料到及還書院將我衣服席卷而去此人我不敢與通往來以省煩惱汝居法源寺耶我舊居係一正兩橫大院子魁星樓則

不記得王世兄何官何字何以得見序已允作九月必有

寄代輿

五月十二日得鄂書十四日得女浙中書皆四月廿九日前發前後不相遠此和夷之效也上古之時不相往來末法之時萬里庭戶親戚相聚何足為歡各勉前圖但須謹篤耳女書詞意開展然不畏慎接人持己以恭為主錯字亦須點檢如部置誤作步改衣誤作解鎮俗誤作震皆緊可放心花叔生姜之類也弄麀伏獵詒笑千秋此非父師所能教督在自己留心而已劉伯留女讀書蓋以我為謙詞未知女不能也由女等不能耕種無事可做只可在長隨上一等以俟上進再上則佐雜學成大器亦可將相然必由書啟朱墨號件學之學刑錢又成一別派不肯小就矣此漢人為吏之意以待無業者本朝名臣多由此出與科甲無異此信鈔與功兒讀之功兒既為香帥所禮女又留依大藩榮則榮矣於我發遣女兄弟出外隨從州縣學習民事之意未相契合固由過愛加禮要亦近時人志大心高以為數金小館非終身之計不知前五十年湘中豪家之祖父皆每年恃二三十金以仰事俯畜其妻子亦秩秩有儀非今日囂張誕妄之習黔巢唐三丈女徑稱為唐藝農大

妄也不相識可稱其名不可稱其字相識則固姻世省城巨富其祖父飽遺新翰  
丈也黃澤臣亦與我相識但無交情酒食來往而已  
林不過元絲三星請客尚不及蘇三蒸盆之豐故能將相龍驤文武蔚起今無可  
挽回矣猶存古意者則子容仲容而又不能登大雅之堂幾同破落之戶由金銀  
珠補奪我詩書故也曾祝林祖父有言半截鞋子一版清氣女母固恆誦之女等  
未聞耶常思此言乃可以富貴貧賤不然徒恃運氣不為成立也東洲間居罕出  
心頗不歡女等能撐門面使我歸老山中則為慰矣莊子云佚我以老少年好佚  
則衰氣老年不佚則苦命也五月十五日偶書

### 與璫女

女小姑之子今日來言女與小架氣想係許為盲者不通之說也妻可容則容可  
去則去眼不見為淨不比女庶母能事嫡則有氣架女作女時猶以為不然今何  
架哉正欲遣人來而女信到從此以後請勿架氣鄉間平息可喜女不來者為事  
姑耶事姑由於事夫母子之愛天性也夫妻人合不合則止不可使女姑因婦怒  
子亦不必不合而猶事姑飄然遠引穿羅裙而去之達哉達哉功成身退姊妹會  
合別有可樂不亦美乎若有恩不捨則忍氣吞聲將小作大如四奶之所為亦可

樂也上匪事小架氣事大故特書此喻女知之

湘綺樓箋啟卷第二終

湘綺樓箋啟卷第三目錄

長沙湘潭王闈運字壬父著

張楚珩一啟

李申夫一啟

黃翰仙一啟

彭川東一啟

耿鶴峰一啟

張壽樸一啟

李黻堂一啟

游子岱二啟

席研香一啟

周雲昆一啟

張粵卿一啟

鍾遠菴二啟

黎簡堂二啟

松錫侯一啟

尊經院生一啟

馬伯楷一啟

錢徐山一啟

李幼梅一啟

上外舅一啟

朱肯夫一啟

趙撫叔一啟

嚴鴈峰一啟

唐鄂生二啟

曹鏡初一啟

陳魯詹一啟

左錫九一啟

孫伯璵一啟

黃耀庭一啟

張子澗一啟

高伯足一啟

黃運儀一啟

勞鷺卿一啟

陳用階一啟

鹿滋軒二啟

殷竹伍一啟

張叔平一啟

黃小岱二啟

李若農一啟

潘鄭盒二啟

唐執齋一啟





湘綺樓箋啟卷第三

長沙湘潭王闈運字士父著

致張梁山

楚珩仁兄大人閣下前過棠疆渥承供帳頃披微簡兼寄疏廉遠襲仁風坐吟清  
畫松厓在望荷遽交深但物產徵求有累廉吏又當續製門堂各種今未蒙示價  
故不便再開尺寸樣式有暇乞飭店工照來式疏密議定每尺價錢以便續製耳  
顧公已暫留瀛局緣治狀見重上司期滿周星並當酌補實缺想賢者不以久暫  
勤怠然循績無不聞之理惟希勉崇威惠無慮甑塵也秋初尚欲迎倦再當有託

致李藩臺

申夫仁兄先生道席前歲寓書無報昨由轎班帶呈李藩臺官牘私函未作別簡  
以為知聞勝於箋啟仍保定之故事也毛公昨來傳道近狀甚詳並承寄聲問二  
事龍安既三年一考回信似覺太遲真不能不勞煙墨矣東行幾困聾公負心非  
筠弟鳴鼓千圓不可得此草蛇灰線之一君知之乎專經院中日虛席以待高朋  
君知之乎劉景韓來致意離相責以解鈴自效會丁憂不果君知之乎累清雋以

操持費游資而無補湘中民吏止望軒車舍而不往何其慙也金剛唯有黃門翠  
喜仍偕白髮鬱鬱劍閣不取成都又何憚而不來耶世局日新行年已老優哉游  
哉吾與子游不與子優耳七省姪今成九子母未退而衰妾不如妻又其驗矣聞  
運須白於顏子而髮黑於玄妻一以示好學之誠一以見求仙之效垂問其理理  
合申明筠仙與公同為可惜終當乘時一展彼時恐又參商要之我輩各放光明  
必非太平氣象不如林泉嘯傲皮口喧天既保交情更全國體此外蠅營狗苟相  
黨相爭或漢奸以保功名或清流而取將相既非吾人之所屑宜其升官而發財  
舉人有人舉乎廢員當廢然也秋涼尤可樂知雙飛復還家園楓葉丹時翩然俱  
至早除正室以愧染孫

致黃道臺

翰兄姻長兵備同年節下奉別月餘唯酒食宴樂之務雖聞上官之日竟遞版賀  
之儀頃辱先施欣聞新治清釐閣牘暇得看山雅俗相兼無妨高致甚頌甚羨法  
帆近將北犯季高南下不敢從海道行舟廿年洋務掃地盡矣廷議並不暇追究  
但皇皇西闕玉門撤毅齋以代合肥辦理荒唐此為至極幼樵見賊不走舉措可

觀反奪去卿銜將授閩撫亦未測賞罰之意岑公復事夸大檄催鮑軍當道焦勞  
不茹不吐忠憤之氣有感輒生仰屋奈何倚柱長歎何益矣但計劃左至軍戰  
和必已先決大要仍庚申故事耳月卿保薦人材首舉此間巴令祥人不得專美  
也芥帆見輒相念併以奉聞蓮翁已屈行期尚無申報閩運杜門不出唯事娛閒  
近聞貴州教堂悉毀東道恐有西行之命則去住兩難恐當學杜子美北游閩中  
奉擾有日耳秋晴氣寒伏惟珍衛

致彭川東

鴻翁先生方伯節下前奉謝牋比微還答適當炎夏未濟空函故想起居惟綏福  
祿邇來國事日見囂譁冠蓋紛馳羣材輩出獨蜀中以倚畀之重致諸公無遷轉  
之官朝廷注意西陲事定必當峻擢矣閩運留滯成都幾同杜甫嚴公移鎮未卜  
何時動則經年又桂園高宴時益深欽企也敝同學梁進士濤官回籍候選銓期  
尚遠貧況依然其縣惟有書院一席可資首宿別無前輩尚非躁望希求丁大翁  
聞係同鄉素無交誼欲求節下函賜推薦當荷裁成特令奉書詣見並希教植為  
幸專肅敬叩崇祺不宣

致耿彭縣

鶴峰仁兄閣下奉別經年在省城彼此相左未及一見殊深欽遲政聲益美近聽鳴琴秋峻節清想多高致幸甚頌甚貴治有章生漢星家頗殷實其人愚暗受人欺騙曾以百金求見閣運一面則其他可知前因家事涉訟但子餘為之調處昨來呈送詳文云已褫革頂戴未知係人詐作文字給之耶抑係真有劣跡見惡明府而假此懲之也弟思弟兄爭產古循良輒閉戶自槌以其傷先心而啟薄俗無所謂曲直也就令乾沒盡淨仍係楚弓楚得況其弟以帳目細故致令其兄革去一官使其父母無地封之榮望已為不第矣倘為民父母者又必以曲直繩之或致其兄受刑辱驅迫豈不更為章氏恥乎因感其受騙之愚特致一函尚乞照察如並無別案可否於全開復及免再催提之處亟乞示知如更有劣迹亦希詳示以便開導使之伏罪統冀酌照敬頌台安不宣

謝張崇慶

郭簫冬釀方思燕坐之歡郇朵雲飛欣見蓬卿之使特頒隆貺俾侑生朝遂忘殘齒之衰惟覺關心之切故維壽榼仁兄延鴻至日展驥崇城臘鼓催春洽歡聲於

閣左邪笙息老分壽酒於庠門拜惠誠嘉論年實媿閩運服官無志知過有餘幸  
當休役之辰差得賞文之樂手肅申謝

致李藩臺

黻堂學長老兄年先生道席去春寒窗談敘深慰離情自別息息然越南關過一  
年潘龐孫龔許多笑話吾兩人只看舊書幾葉詩曰山中方七日世上已千年又  
曰一去二三里煙村四五家小時寫影本不覺其佳今乃知斯言之有味也昨得  
來書屈指算來又將一年矣具承宏獎加誘兼示近作老兄宦成名立蕭然娛老  
閩運東奔西馳亦無日廢書戴祠負及差為不負今日校經思賢無此學生雖有  
名師亦何所益閩運蜀游七載只開得一法門繼起之賢當俟數十年後禱公折  
節下交非為興學豫知英人必窺西藏欲儲幕府材耳今果有謬議萌芽養兵待  
用而此公衰病日增閩運又喪去長妾明春議起恐俱不待矣天意難回誠可三  
歎但世事夢幻就令真成事業收場時亦復何有有此一段願力便隱然有鞭笞  
鱗介之形雖一無成不足恨也後世當有知者況見在尚未遽散乎見郎之來稍  
覺遲矣如可為力必副雅屬芴山荒唐告病不成頗為識者所笑今日兩司人物

絕稀若公之絕倫超羣則更成廣陵散也城中想俱為左忙專祠必在陶宅對門  
黃海老有句云眼為尚書墓草青今乃門楣輝映一雪此言所謂凡人不可貌相  
湘陰多人物湘潭則惟有叫化子恐一解元不足張吾軍耳成都冬煖海棠已花  
獨對早春甘於寂靜明春當遣人送妾樞還里或得與丁公俱行均未可知明史  
極與時事有關闔運少時即欲作過明論四五十年猶未成一句聞公來旨欣然  
相慶功不必自我出文可以看人做何樂如之使發甚急輒書兩紙恭叩平安

致游署督

子大先生節下奉教日淺未能盡窺蘊蓄然側附有道自謂知心瀕行承攜酒對  
談何減李郭同舟之榮乎在道即當賤謝緣客心驚進紛不可理到家旬月沉俗尤  
煩苦雨蝸居加之人客偶一伏案聊希靜養今始稍清醒耳承宣暫領上下交孚  
稚公局勢已成所望者助其不逮此乃東漢以來法家通例儒者徒多議論竟亦  
無成則笏山之已事矣平情論之易私欲尤重於丁何能禁切人主節下剛直廉  
儉可以盡言彼此熟商則互相增益英承初至不似崧王收權杜倖大有可為他  
省尚難遇此長官想公亦然此言也聞運當軍興時與聞湘政以為湘勝他省及

至鄂粵直隸俱居藩使署中攷覈牧令鮮有當意初到四川尤為無蔓竊謂吏不可澄頃還故鄉證以聞見蜀中猶有天日蓋十年來丁公倡導之功不可沒也使藩使得人幾上理矣頻為滑吏偽儒所亂思之可傷詩曰每有良朋烝也無戎先生倘得真除庶其金蘭同利耶局外間言不知其僭家鄉多雨尚不妨農闢穴布於周行則士民深慮也妾葬後即當北走再得相聞先此申謝

子岱先生道席比上二函皆無還報攝君新政大抵平和然以資用人與以意用人各有所做做於資者自問無媿易流為廢弛傲愎之機他日真踐台衡幸思鄙言位高望重非遇強聒不舍者更無從商量也新寅相比別是一路又當坐視德化之成矣今年長沙新進士李君宗裕曾在左營文案即用分發觀政成都欲學為吏當得名師用特函達轅前乞察其能否從寬教之幸甚幸甚聞運於秋分日買舟東下由淮揚北上再當乘便通候

### 致席臬臺

研香仁兄大人道席去歲奉復一函計達荃察秋深東汎雪霰北征小住京塵遂更歲律春分至里即擬泝湘緣有所求嫌於僕僕相訪之約尚有待也側聞經營



小損乃復大施精舍之成將比涖泗此固嘉與之深量非僅廣廈之歡顏也但主講難求學規易壞近歲新館不下十餘唯蜀中得丁公主持粗有成效此外不過增一間館位置私交如俞蔭甫黃子壽者已為極選究無門人成業而更啟錯謀強薦之習歲捐千數百金於小有聲氣之徒其無謂亦甚矣

致周道臺

雲昆仁兄先生閣下同舟之約乃荷資裝履新之會幸陪盛集乘流迅發及夏安旋兩舫穩完一家悲喜俱承仁賜企望清光想數吏招商必臻饒裕昨有還老云綜持過密復多洋票然耶否耶以質兼聽族弟世鋤蒙渥給其火食似為過惠彼在家一錢難覓去歲叙卿所贈悉供外用妻子仍無絲粟乞傳諭開導若全不顧家即無須求食聞運所以位置之者已不遺餘力彼若嫌少別處發財若但供一人不勞遠涉千里恃在知愛敢布腹心從弟世同已令其迎母便養亦求諭令博積百金或兩年之後可辦驗看弟家赤貧而子弟均如貴公子開口便說幾千錢不够不知其家有幾箇錢尊府想無此習氣耶湘撫消沮閉藏陰行善事松公新到輿論翕然著藩左右做人日飲亡何而已吾鄉吏治似更不如蜀殊可怪也芴

山入都當可瓦全次青可望署撫黎民亦不至開缺雪琴日內即到矣前置莊田未得妾柩暫無可厝權殯城南以此在城小住將及一月日月如流諸事荒廢所喜頑軀強壯堪以奔馳但踪迹無常恐音問不以時達尚祈鑒恕

致張總督

粵卿先生尚書節下自前歲過巴馮驛上書未奉手題不勝懷企老成遠鎮朝宁紓憂而迹阻偏隅香濤所歎又政學閤廣吾楚具瞻久滯西南鄉人失望况復曾陪尊俎每憶唱酬雨散星離良增吟想羸官狡吏上下其間回想蜀游已成希覲桂林之治不更遠耶聞運贊幕無功誨人復倦今春歸里穉帥亦殂從此輓輅金門買廬海汴浮沈之計薄弱所宜清秋戒行偶觀舊什遙瞻旌節輒賦一詩便書鄙懷上塵清鑒敬敏台福並頌府中同安不具

致鍾親家

蘧菴仁兄親家節下頻得惠書一喜一憂昨得七月十七手札思深悽惻感愴彌深出鎮偏勞又逢拂意達人強解然心緒劣矣聞運於八月初日得家丁報書即聞四女之喪十一日業為成服比即欲遣書奉慰猶冀非真此女短命早徵思託

福門以消灾禍乃侍奉未久仍累憂慮承煩親家夫人悼傷憔悴為之料理是閭  
運之負尊兄也夙債空花尚何言矣薄有申哀容當續寄子大祥人均各據其蘊  
蓄劉王將至局勢又新廣坐澄觀亦當感歎錫侯又得密保蓋莊子以計去之然  
貫九之事中傷已深六缺不遷良有以也閩運求田未得妾殯猶懸昨得丁府書  
云穉公由陸至濟遂於此月內買舟下漢將赴歷城家事委之妻子冬間當至京  
小住或留度歲符卿初試不利殊出意外東西小試較難然捐監不及生員仍以  
入學為主明歲致柩還家即可留科考兒子長大當放令自辦口食想親家必圖  
此計耳倚裝恩復敬頌台安不具

蓮菴老兄親家耆席自郭縣丞入蜀奉寄一書並外孫女十歲小器服未得還報  
又七年矣去歲在輪船邂逅賢婿始知嫂夫人捐塵竟無赴音不勝驚歎江山雖  
阻音問易通久闕牋疏實慙懶散初期自泐還後遂泝江相訪兼看外孫拳勇亂  
階江輪幾斷頻煩惡耗心膽俱寒冒暑還舟閉門一歲風波未定瞻感徒傷相見  
之期當須亂定隆兵備無辜遣戍潦倒可憐老病茫然若墜冰谷特為函奉託  
希飭賢子輩一為經理俾無窮途之歎感甚禱甚聞運今年七十還山後僅足自

存唯念怙女僅一遺孤又將遣嫁思令到湘一見外家門戶非自來攜將不可符  
卿倘借差到湘就近領來則尤感望但親家篤老必不可離弟精力尤強俟時而  
出了一了兒女之願非曰好遊先此奉聞想亦哂其多事也賢婿溫雅甚為令器今  
想已還蜀大受驚恐希以此函與同觀之符卿亦不別書緣弟居山偶然入城人  
客紛冗不暇伏案也未明求衣書此三紙敬頌道安不宣

致黎漕督

簡堂先生仁兄侍郎台席三月杪奉手書循誦欣荷漕帥新政未及一言公私優  
裕與否頗深縣令穉公以為必移齊魯而閩運則以為將督雲貴蓋季子佩印必  
出蔭帥於邊荒選賢而代衆望所孚也得無又憾其不善頌乎二策妄言乃荷咨  
訪此實謀國之誠謹令諸生錄反復三書以質明知不可令他人見恐傳鈔易播  
於立言之體多謬也匯東鶴立鷄羣猶存憲格鄂生想當相見餘無異聞湘中大  
寒蜀亦甚冷蓋國憂之兆耳起居善珍以慰遠懷

簡堂仁兄侍郎節下前聞移鎮吳門果符所料江南繁劇天下之都冠冕羣賢俯  
視譚衛餘子此他更不論矣但政出多途地分四府准司海道皆成大尾甯藩守職

固不相聞今又益以直督頗將頭指漕提旁撓亦為怪人非我朝元莫能無咎節  
下處之得無復思黔中乎蜀都自匪東來時衆嫌鶴立畧加排擠翩然復游盜情  
主人此風未弭壽星請清庫款鉅漏孔多三旗欣然覩其可代三項之拐又移秦  
人聲勢洶洶但幸灾禍風氣至此良可憫傷唐去丁來隨波上下所謂妄想顛倒  
苦海無邊不識吳中狂瀾有砥石節下總綱紀之任唯當厲其風聲休休有容則  
滔滔莫挽此閩運閱歷所得敬以奉詒耳朱甬甫來學校不廢功成者去明歲決  
不蟬聯冬月買舟留人為質從此復還衡山矣沈世兄得依併膝莫可自成一家  
意氣稍浮尚求加之桀括成全一人士如樹百年之木非有大力者不能閩運上  
說下教徒強聒也

致崧臬臺

錫侯先生仁兄同年節下錦城過從欣接光儀兩歲勾留隆情稠疊瀕行辱承公  
贖復拜嘉肴荷德榮情俱隨江羨風帆順利未及停舟郵謝稽遲當蒙仁照春風  
入律台曜迎輝政福俱新頌企無量閩運於嘉平三日始泊湘埂人事倥傯歲華  
荏苒所幸妻子餘嫜尚託平安湘中淮漕諸商新立義學便留閩運為其館師感

舊憚勤本宜不就以郭筠仙侍郎今年業經起召急覓替身辭不自由遂已許諾知者當哂為馮婦也左相息息東下顧盼自雄前聞精神委頓者殊非情實彭侍郎曾督部均各矍鑠簡老最少反至頽唐湘陰即日到官新舊頗稱公敏長沙安樂足慰遐思錦水新聞幸時見示還船促發手肅奉謝並頌年祺故叩雙喜

致尊經院生

敬問尊經同學兄弟無恙閨運文質無底承乏大庠幸荷擇善之心許其一日之長觀摩朝夕研尋經史有朋之樂始驗於今臨別皇皇俱如有失昔人流連山水尚欲終焉豈况羣賢皆吾兄弟愬然告去蓋亦有由凡學不待師告不可漬三年攷校便已離經老馬之途不先千里久相煦濡反錮聰明所望高明從茲特達啟誘後進其益無方又人師難求官士先志貴州山川峻駛氣少停回名利之心未能淡遠先聖所戒欲速見小俱有深規速必多誤是以不達小則易識安能更大簞豆見色必無海內之樂推溝澮皆盈已有孟生之立待此二說者深思則為良誨面斥其何以堪假我數年各相思學睽離之情味之彌永毋效兒女但樂同居亡子葬地未安明春始定鄉人別說講舍托為照料尚居省城賞奇析疑猶能遠

應東風轉信書此相聞俱最日新隨時自愛

致馬兵備

伯楷仁兄同年侍者相見雖早相知恨晚然仁兄招延太過愧無以報使三年前即相見不知費多少酒錢也夔乎永乎別有佳處乎示知為望非為兄計為皮衣計耳卯飲三時定發一棹別後行舟順利於嘉平三日遂抵里門納賄所得及插花禮物一無損失此為快事亡子尚未入土弟婦又丁母憂此為悶事殘年催迫門無債主而囊有餘金此足傲曹國夫人不獨誇示畫界欽憲也明歲主講思賢義學館數千金生徒廿人不知錦城新詠又作何語郵筒易失書問宜疏非有好音無煩作答專肅叩謝敬頌春福

致錢知縣

徐山先生老兄道席蜀都觀藝仰賴開宗文苑譚英備聞餘論名輩難攀於耆宿謙尊許託於後塵屢接清觴仍叨餞席江之美矣別思彌深出峽瞻雲逢春望遠道祺益邵福配綏成小星歌紹鮒之祥大邑有借才之地雍容文翰若在元城跌踢酒場劇談延閣凡茲善頌願作宜春閨運提挈嬰晚間關江澧三舟安穩一月

休閒甫及臘初獲停征擢入門號咷非孔融失子之情卒歲息忙有廣漢迫冬之  
歎加之寒雨坐聽徂年欲附雅遊已如仙謫但買山間舍有費經營明歲重來必  
難如約暫煩坐領以慰羣心俟便乘間續勤音訊先申謝悃叩頌春祺祇請道安  
唯欣多福

與李道台

幼梅仁弟世講台席奉別七年未皇修候昨於第中詢知近患時疹旋已康和化  
險為夷且驚且喜雖復小有損折要亦運數使然百日假中可得閒靜澄心觀化  
必有增益矣聞運遊蜀三年反失一子平生類我之祝徒作癡蟲浩然挂帆歸來  
閉戶無善可狀幸不重災耳湘鄉王步先雅善歌行亦有奇氣所如不合憤而東  
遊聞運不能贈之以財輒思為台端市義其至之日務乞詢其闕乏恤其饑寒假  
階前盈尺之地使不流落乃後量才錄用則人思自託矣頃已與書俊藝兩公未  
敢如此瑣瑣以台端方宏延納輒致所懷夫一士之微貴如其意步先若在長沙  
亦未必無可位置其志思樂國願觀光儀聊徇其情以申士氣非然者百金之館  
一局之差比比可求無煩聞運州部從事也專當問訊敬頌全安並敬侍福不盡



## 上外舅啟

五月中聞大弟登科之喜京報阻遲至六月中乃見鈔單知仍歸郎中班用福門厚德先慶遠詒必以科第驗祥發之長兼為文章申沉思之憾視今之獲弋者不可同年語也惜至強仕未入翰林繼踵彌光其在弟姪又以豫賀聞遲於三月望日到館兒女輩皆於節前安抵成都唯課讀稍勞應酬尤劇恐非持久養生之道但不忍使諸女坐戲他人竟無能約束者乃知多女累於多男也菊生遂不肯同來仍有內顧之念大兒夫婦均不曉事年下當令豐兒還家明年自來恭祝大壽便謀移居山谷間矣昨有人從印度還言緬甸可通甚有機勢夷務不足深慮為此復欲如越石起舞也附子寬得百斤俟八月後專人寄上今年旅費殊省月不過三十金簡堂質美未學於清勤二字實為卓絕能行者域外之觀則難逮耳好人亦難於受言乃知舉德有莫助之數有味哉有味哉長夏初晴手書上賀福喜

## 致朱詹事

肯夫先生仁兄節下成都人還傳述學政新年初吉屏斥四生皆庸蜀之英華贊舍之領袖論其形迹誠多純妄若彼之類比比皆然舉爾所知專言選進如誅少

正則別有其人今不察物情但行官法監院不能置詞督部加之附和斯大誤矣昔同天作典五教在寬大學三移玉親執事聖人非無雷霆之教以為不可待佔畢之人何則矜其不能宏覆之本意也無瑕乃戮自反之謙中也夫子未正父責猶深才中弗養賢成不肖况書院三升之地尊經又百選之精閭運承流其間非無學識其中如楊炳烈張孝楷不孝不弟加以煙飲公會罵坐漢律斬刑猶且引咎自罰僅予降課蓋天下俗薄官師失職楊張之倫在顯貴清官者往往而有刑一二人不足以明教况僅奪其廩餼乎徒使諸生疑德不勝威上毋忘勢人不率教由此益器耳淺而譬之使陳岳在政府督學能去之耶張楊任封疆閩運將從而求館矣一日之長進退人材此施於國政則然未可以言教也誠使學使就歲試之文藝教官之舉報屈抑豪傑顛倒是非此自其職非他人所可議也今乃明絀陟於選場施威權於間館出之於精舍而還之於縣庠豈督學願為掌教抑調院足以比身如曰放流何其謬亂蜀中陋習言不由衷貪慕官權巧於趨避一以刑治俄頃肅清若崇德化姦人萬變淺學之士樂其易請今古流傳咸欲尚嚴免而無取害成風俗上亦受禍亡不旋踵今幸有孝達倡設經教丁公繼之大宏禮道

學士文德自比顧王內外交修才位並盛聞運冀謂挽回澆薄必在此時自取素餐奉身先退臨別勤奉未敢自疏何則欣觀盛化不宜菲薄也若但以絀陟為教化屏退為肅清則書院誠為多事江陵廢之是矣樊借一二文學而以為能養士毋又易視先典輕量天下耶蓋聞君子能與盡言而論士先求諤諤故敢以書相規伏維深思其或不中事情要必有可采惟鑒區區臨啟馳懸

### 致趙直牧

撫叔閣下久不奉問然消息大畧相聞去歲有黃運儀門人至蜀尤能道起居官已十年聊復爾爾看孝達以口舌開府又不如子壽以卧病得道之捷也大隱在官廳其實為混飯耳詩曰人可以食鮮可以飽聞運不求飽故遨遊自如亦未嘗讓張黃獨食君與運儀何時飽乎歧予望之不如相率仍還京師從李慈銘遊也王正孺近得清官以父資供薪米是第一得意人亦以公得官為蛇足至於聞運無官而勸人去官真無瑕戮人也仕止久速豈煩代謀盜各之言相思之至耳亡友鄒叔績遺書皆非定本得有道刊正畧存梗概頃其孫往謁左季得助千金令更廣搜家本各見其端又得皞臣所未見者七八種今年夏秋於長沙校刻欲得所

刊版式合為一書聞皞臣存時承約寄湘因循未領又恐琴從有時之官無從問津茲由閩運函達委曲乞即飭紀清釐專車運湘以成二友遺志龍宅近住儲備倉閩運居營盤街遣一走卒可護至安或令運儀希人還家或由蔣安伯寄龍宅亦可閩運蜀游三年失一佳兒意興闌珊杜門守靜家事冗雜仍復相擾不足以自奮也茲乘良信敬問道安中夏驟涼延想千里時惠好音以慰懸遲

與嚴生

雁峰仁弟無恙甚幸甚新春積雨正坐清寒傳燭發書籍知安穩去夏所寄問本宜作答以來詞有浮湘之約致未嗣音然千里相聞不傳手筆而過存規矩若待上司小楷紅牋居然官體則恭之過矣禮者忠信之薄其謂是乎張叔平無處蹤迹故畫不可得去歲冬暮初欲西行緣次女適人未遑治任今春必當出游或由京入蜀或由蜀入京均未可定關隴之說則謠傳矣吾弟豈亦以閩運為惟堪主講耶舍蜀從秦又何嫌忌別後境遇殊惡事故亦多兩兒方當嚴督之時躬勞佔畢家居偏仄用度浩穰急欲移鄉無從得宅為此荏苒仍無計施每思古人去人遠矣擺落俗緣不念長久此其所以能隱也閩運者言方之外行方之內巢父

所以洗耳管甯望而割席尚何敢言山林之樂哉然後知微生之誚棲棲誠仲尼之知己也家居難終無甯游老聊以遣日豈望宗子相見匪遠輒先以報

致唐撫台

鄂生仁兄先生節下去歲側聞部署知倚長城伏處樊籠無所裨助亦不敢以賀任通候之語重勞披覽遙瞻雲彩但頌福星澄吏息民必有近效俟政成治暇再當詳問訐謨耳閩運羊質虎皮不宜久客還家一載又困干求近乃北上京華兼之齊晉聊以遣日非曰好遊也孫涵若六兄為公符送媿至黔其人欽寄有用世之志側聞規模宏遠識力堅定思欲依附以起懦頑先生推愛師門無惜盈尺倘來相見幸進而教之

鄂生先生仁兄節下臨別忽促未及暢談伏想安和以慰欽遲奏銷歲事高詠雍容聞將廣刊有用之書以悟俗吏甚感甚感質菴已歸里否其人沉穩經濟之才貴省人物始興多有湘中初起兵時羣賢氣象非若外間所傳曾左云云者異哉異哉閩運於季冬三日到家次日即至湘潭三日又復還省今年年將不利煩惱奇多此後伏處不敢復招悔吝矣做省鹽局新設義學延為館師取其就近照料

於明春起館此事不與司道相涉或無方蔡之難孫公符蜀裝四千業已散盡其家累巨萬不能清償都中用度皆須家寄也冬暄無雪大似蜀中新藩尚稱公明餘無可報船還手肅敬頌台祺並謝大惠不具

致曹郎中

鏡初仁弟道席前歲由左素臣致復一函遂不得報素存怏怏而死然從者蹤迹竟未聞也去冬常儀安左孟幸大索君於長沙城中若存若亡亦竟不逢今年得子迎書乃云已供職在司久矣又聞下第者言於黃臺坐中見仁弟明波其珠翮翮若十許歲人是印結已到之驗京師學問淵藪一代典章所存吾鄉無能討問者好學深思之人宜以時錄記故事借閱檔案部曹吏簿亦可時閱本朝二百年無著作之手有一識大思精如閩運者又不得與承明金馬天祿石渠之內則他日史臣有匈奴千秋之譏吾弟若能分門搜采以史家八書十志之例記之助老兄添修鳳樓亦不朽盛業也古來聖人皆制作之源出世入世同乎大道閩運雖研味元莊不忘禮典且老聃柱史手著道德經莊生小吏不妨通識曹郎優暇正可留意病懶之說純誇軒冕之談願無以自廢耳二年以來作書疏廿八篇發明

大義仍兼訓詁最佳者論殷頑民及高宗微子疑義解洛誥兩成秩無文之異自謂過於伏生當遣兒子鈔成寄上又注莊子內篇齊物論一篇尤元妙博大與公羊相表裏此閩運為學之宗也魏晉以後都不識聖人大道自我而明如日再中然其言本經訓有類附會計必有以舞文議我者獨學無友未能辨難印證暢其旨趣是為歎耳

致陳縣丞

魯詹仁世兄閣下久濶通候但自貴治經過者皆傳清政甚喜甚慰信至得長牋三通累數千言益詳志操官無大小以盡職為本務朱邑作三公而得意在為縣尉時掣肘不掣肘之異也仁兄所至有績此由於蜀吏久濁故易於得民雖然獨清獨醒古人所思豈可不慎哉漢廷論治首在安靜高令喜事自是必將以擅受貧名相中則唐觀察主之於上康巡捕和之於下督府不能相諒也又到任求交卸亦太陵遽方今之世強者為賢名譽未彰不宜自曝和光於外撫循於內乃為善耳此正賢者之所短故以奉贈湘中來書家眷幸托清吉大兒歲試幸不三等便有優貢之望亦足見近年名場之躁進矣致和來蜀恐是偽言如到亦必不令

他往錫翁不恨其逃轉憐其苦祇重致郎之罪耳驚公仍赴夔關棧局非張即黃或令翰公專之耶黃豪伯為總署奏調已授學正異數也送竈糕香頗思家樂送欣雙社順頌年禧

致左孝廉

錫九仁兄先生道席前得家書已知賢子有入蜀之意嘉平八日復奉來教及鏡初一紙書喟然嘆曰錫九猶不知其友宜不知其子夫友者身之所交也子者天之所合也天合故不能無異同身交則必知其情性賢郎之來即無先書豈待籌其所處哉仁兄慕方檢而喜正論必有督責過當之處賢子亦悻悻自喜忘其尊親其以煙避罪者偽也閩運於人無所不容獨不容煙彼懷煙而來投至愚者不出此然既有此好即不可聽其他往俟至當嚴察之如果好煙必將自逃閩運於逃學者皆不追問其所往亦願仁兄勿問其所往舍煙之外則皆可以通融而禁括不待屬矣教猶不待言况於養耶此以知鏡之明於錫而九之不如初也今日送竈獨坐思家推思子之恩因為此報並問年祺不具

致孫孝廉



伯璵仁兄先生道席三年款曲具悉高懷氣毅才明加以深練則可與質菴互相補助鄂老當畏後生貴州之才突過曾胡亦由地近天竺得中氣多故也當今多事小小興利除害不足措意必求之今古驗之物我患所以立求為可知無沾沾妹妹乃為有體有用至於應對因接能屈能伸俯仰甚寬通懷無間此又明者之粗節也閩運於季冬三日始達長沙人事紛紜年殘日短殊無自暇之道所幸餘憺平安湘城豐稔較作客少覺自由耳途中頗作詩篇錄寄耀庭以報其大集之惠俟申酉之間耀庭早起可往索觀以代面談專肅敬謝餞寵並頌道安

致黃孝廉

耀庭仁兄先生道席三歲同城僅得十面將去之際三接清光晨餞舟送尤為破格杜詩云近識峨眉老知余嬾是真君之嬾非真嬾也閩運今識之矣得無有抑鬱懷抱有托而高眠者乎雖然習慣自然仍宜稍稍早起以儲世用北省近不勝南願一飛冲天以雪此言閩運順流出峽時有佳賞途中得詩五首輒自寫成以報瓊投明歲被鹽商留作館師商之與道同一鹽也我為鹽商師鹽道乃為君師此亦南勝之證燈下披函想為粲然

致張宗慶

子瀟老嫻况閣下多年闊別遠道歡逢篤誼有加餞筵多旨東風回溯中路流連  
伏想興居彌增春福公才藉甚私祝欣然聞運於臘月三日始抵里門檢點衣裝  
幸無損失竹報尚未及送即有尊府人來取去何以神知如此想先已寄書耳戴  
道生表姪尚未知游宦在蜀昨來探問屬為致聲李黼兄目疾甚劇外間傳已失  
明問其家人云一目似尚可治日內不能出外周笠西幫辦事已辭免矣城中斗  
米二百尚未至甚賤傷農田價亦尚翔貴餘無新事端此肅謝敬頌年祺不一

致高直牧

伯足大弟無恙幸甚辛未冬君作吳令修書迎曹菩薩而不及老兄自此遂不見  
手筆有自夫差都來者多於李聾客坐見君彼聾尸居餘氣君當覲其紅拂耶梅  
花外子言湖口大宅不負作令究竟何時可至吳譚何時可從鄧李相思之誠於  
此不能神通手版餘間能以一紙相詔否聞運自負咎左右絕不敢作玉堂驄馬  
之想文君已老西施垂白子女十餘人半倍鳳皇之雛其所著書則春秋公羊傳  
箋詩禮尚書箋皆唐突古人自成一家時復高談夷務折鈞仙而關少荃之口貴

縣聞此得無大詫朝元去而傳臚來伯足老運亨通耶乘便妄言敬頌雙女不具  
致黃知縣

運儀仁弟先生道席別忽三年初未知復有入塵之想每論撰述輒望名山夏中  
黃進士所得正月手書始復啞然淵明更欲絃歌仲遠自稱官闕與世遊戲即具  
神通但香光世俗人未必能優學仕釐稅調缺尚未可期三年復還徒虛語耳懷  
庭初處脂膏遽從蟬蛻雖妻子足以自立而鄉國失賢俾臣繼之令人傷怨知心  
落落老境駸駸獨立不懼可無大過耶孫公符昨來聞賢弟跌宕文史頗復企慰  
撫叔叢書見譏雅士聞運猶未得見如有可采覽為留一分前鈔書大傳有便當  
改者乞便檢存勿失明史點畢屬命兒奉還不知已納否蜀中佳士別紙錄報  
此來居然開其風氣他日流弊恐在妄議古人然文章取法必高別裁無偽倘有  
傳受殆庶不誣近方排比詩譜春秋表又自鈔周官聊遣永日冬間當歸作五十  
以避紛紜明春仍當為蜀游待秋闈畢而決去此書到後還信可徑寄長沙矣殊  
冗不得盡意專叩大安不具

致勞道臺

鷺卿世仁兄閣下三年款聚承愛殷拳次子旅亡悉蒙護斂未申酬悃反辱贖金  
妾女輩復荷嫂夫人頒賜多儀長途銜德非詞可謝望遠增懷春至福增人興財  
旺公私順利位祿新隆幸甚幸甚閨運於臘初抵省令姪已於十月杪奉磨安還  
學使有明春科試首府之議未知果否俟有調集準信即當啟聞左相小住五日  
而行李黼堂目疾雙劇恐不能愈新藩使尚有公勤之譽餘無新聞亡子尚未得  
葬弟明歲當應恩賢主講之請蜀中不能再來鹿滋兄處已為仁兄諄切致書具  
道才望參副大坐雖復濟濟論格推賢均當首屈非私所好也蝸居近不容膝又  
將遷宅湘中米賤田貴尚是好光景然欲覓三間茅屋正不易易耳船還肅謝敬  
頌新年全福

致陳進士

用階先生同年親家道席別時匆促未得盡談到江陽承賢子造舟未得報謁嫂  
夫人賜食物多種客中無一物報惠四兩贖儀有過之矣巫山及長沙信物均已  
妥送勉吾有浙江之行云陳中丞遠聘相見尚未詳說也新年想復入節署甜酒  
晶鹽時多盛集幸甚羨甚湘藩頗彰公道舊尹何不仍來此間閱卷無人多士尤

為盼望也閩運於嘉平三日抵里酬應紛紛尤甚於在蜀時明歲當伏郭筠兄主講思賢入峽之遊期諸後載家媵仍居舊宅亡子尚未卜地以歸逼歲盡寒雨連綿殊增愁寂錦城之樂幸得時間無任企想專肅奉謝敬頌年祺雙福不具

致鹿臬臺

滋軒先生仁兄節下一紀睽違四旬接待公勤新政我戚私憂雖時奉清塵而未申款曲思歸念切賜贐儀繁既惠遠珍復承隆饋施有三山之重受慙一片之康更託福星幸逢安浪依仁似通悵別彌深律轉歲回條宣吏暇悟陽和之易布非錮習之難移上理可期論文增寵閩運一經自守三歲彌勞徒賴主持以尊章布爰居見響聞鐘鼓而知驚野鶴在笈顧羽毛之未滿乘醴置方濃之際適餐歸久素之譏尤願薄領之間毋負佩衿之望希陳深意敬頌春祺祇候台福不具再啟者勞文毅之少子驚卿觀察才具穩練心地明白雖少有習氣絕非延賓之流蜀中之材如驚卿者宜在甄別之列文毅於兩越不為無功身後蕭條兩子天沒家中至無住屋節下細紀蜀僚羣才入鑒尚望斟酌調和無令被謗他日或可助成盛治是所私企

致殷運同

高軒暫話羣從歡然策馬應科反勞遣送餞贈隆厚躬枉湖瀕斜日將沉未能款  
曲別情載路感荷交并登舟始知二萬贖錢壓舟同下蓋以聞運前關地主之禮  
故瓊琚以報木瓜或者仁兄廉介久聞不欲費故人夷器之飽不然無此禮也謹  
即載往滬上代購故書並火輪各機但未知子登去否及行程辦否耳舟達沔口  
帆楫安閑二日覓船四日發去久居山中頗憚遠游直尺在尋殊近多事惟以習  
勞自勉不敢告劬比至京師即謀歸計洞庭水滿試一臨江相見在近謝不多及

致張員外

叔平三兄函丈法源之侶半同餘耳京華重至獨親同心一夕對牀十回造都其  
間信使贈勞相望瀕行復荷步臨兼投碩果怱怱促轡未及重辭途中檢點來章  
把持贈物恩情盈路交誼惻心風雨孤舟始增怛怛雖平生輕別強望有時日月  
幾何動期一紀心乎愛矣能不悲哉歸溯漕渠忽焉經月秋陽暴清則生絺欲烟  
寒哉吹雪則狐裘如水氣候之變若此其可駭也居民被潦十室九傾梁結紅絨  
棗林黑爛吊僧勝之舊墨見英法之新儀欲泣則近於婦人五噫亦嫌於逐客惟

可高歌送日噓氣成雲今之出山迷途未遠天下之事豈鄙人所可問乎謹我異居應求同氣倘逢驛使無玉其音

### 致黃御史

曉岱仁兄年先生御史京華假館恩紀網繆未步後塵尤孤至望但芙蓉桃李各有其時他日華顛終持白帖耳漕渠安汎秋色清佳周店膠舟一夕水至渡黃百里皆得順風以此卜之頗獲天佑惟河流到灌沂充淪胥滿目波濤慨然有議河渠興農工之想思深憂集不復願歸俟至南昌當謀資官三年之後賦六百萬錢乘傳而行郡國矣因倪宅致書先附申謝

去冬聞舊疴復發極為懸系此疾再劇多不逾旬幸德福逾恆竟涉大節在茲調攝不獨可占豫五且為必愈之徵凡聞知者無不慶快昨晤鏡初又言在塞反身默思休咎樂聞已過欲廣鉗槌此實修德之感心然非常言所能報謹憑所學以備擇從蓋以為人患有身無殊凡聖而庸福所集必在鄙夫凡世之安富尊榮各隨所好故棲神泌北者不知飲水之飢垂涕牛山者惟羨鳴鐘之樂氣類之感遂構世緣既遇順機罕能逆制推遷權利迷失道真斯則福之為禍也仁兄初居書院

志在詞林度其所至高者不過潘文恭下乃僅及陸增祥而已正以本念篤厚屈已推賢日知月能養成道望而憂貧猶切垂老請外雖非乾沒亦損高情不有斯疾豈能招隱曠臣病歸同此義也德充符形毀者六人皆為世人所重形全固可以充神形虧不足以虧德况夫支末之小滯何足以措吾意乎假令出騁康衢游持旌節比之曾左未知如何如若直道不容士師三黜其為懊悔胡可勝言然則今之沈疴不足為慮或乃可以為福祐亦何至疑於業報哉見道在一念間便覺身心俱了仁兄詩所謂斗室自太古者已得其趣今乃躁急於速愈致有此迷罔邪因病得閒因閒得道自然佳境以養天和今即捷步飛行有何深樂故知跋履眇視垂戒易文知世人之好動也願安神頤和無所多慮

### 致李學士

若農年先生侍者自乙丑在清苑聞黃御史傳雅意采訪及於非材感荷皇惕恨不得一登門也今春以赴試為名出尋通彥至京師論名品者無不以執事為稱首中心欽欽務欲一當故迂道南昌就詢輶車竊以為若在康九袁臨吉瑞之間猶可隨傳駢駢藉窺冰鏡乃娟娟秋水遠在東垂別家經年役車歲晚悵然西邁



勞也如何香濟與閩運一見歡然十旬款洽雖才謝若人而謬蒙引納獨不得與  
執事上下共論以窮鄙懷悶悶存存誠不自已故於還山遺書相聞以達十年遲  
仰之忱江西素多文人今當選貢搜岩訪穴必有國楨瀏覽名邦定多賦咏倘承  
相示幸甚無涯

致潘尚書

伯寅先生閣下辛秋奉別兩上謝牋還山再春瞻懷千里雖頻因閣報見想委佗  
野酌園花每思清宴子牟存神於閣下茂宏長嘒於洛賢昔有斯情心乎愛矣玉  
堂宿望斧依新對贊佐初服豈謝茂彤達政難期好賢為最海內之願殆有所歸  
雅步三台非所為頌湘省近頗平靜戎士皆復歸農筠仙頗尋禮學時得聚講聞  
運鈔撰書牋廿九卷已成易說亦粗整理近為列縣圖志所濼雜未能覃研三年  
內仍當提繫京師希咨通博往與曾文正言閣下單本希籍之刻勝於巨編若能  
聯合外臺於輦下別設書局使周漢子說悉得刊行兼以餘閑刪定經疏廣求才  
識之士使閩運亦得趨走其中誠為勝業爾時即已與書孝達及錢師詢其可否  
便欲資本江督擇日北行術業有緣曾侯即世然此舉不煩奏請得一二督撫可

行似勝於開館修書鴻詞徵士倘有侍論庶資啟予若謀及同志尤易易也楊師復直計常相見久未謁覲輒附一牋乞轉致為荷今歲星軺分出惜所居惟當桂驛湘桂小輟大臣惟冀孝達或總南選耳因蕭君赴補馮通此書敬頌台祺不具

鄭盦先生道席前憑伯澄呈拙卷未蒙取中而門下徒黨多荷甄拔具徵鑒裁宋生獲留尤仰亭毒書啟家所謂感同身受者也咫尺光塵極欲再對息壤在彼詎不為言想玉宇高寒暑塵不到而回思定園南注之游遂不可追悵憶平生心乎羨矣聞運妄言多譴突見焚如山居未營債台將築聊借北行小作停頓而外間議者以為此人即將窮餓干謁要人會待吹噓拯其溝壑雖無傷名教而頗費應酬漕渠秋清翮其逝矣留京弟子一經品題俱長聲價唯衡陽夏時濟自負才氣不後羣賢未上龍門頻遭點額今聞曹仲銘修撰為言於高尹欲求湘藩書啟一席未卜成否公與同僚一言九鼎謹附名條求為道地非但儕之文廷式張羊令之列亦以廣采聽之聲其餘同學有聞者殆難勝數他日脫穎自當見知願無以吳解為悔耳

致唐道台

藝農仁兄同年親家節下久不奉聞時從第中詢知安福兼聞脂膏不潤閑居亦樂雖尚遲真授而屢陟三臺東道主人會當以金腿紹酒宴我薇柏間耳湘鄉王步先兄以十不可解書得罪天津太守雖吳質夫芘之不能勝曾沅甫之極之也聞東海有聖人焉欲學太公之避紂閩運雖為致書俊公而功德巍巍亦難下交而不瀆伏惟仁兄廣夏熙春於一切局務各府州縣無萬數之館皆可徧觀而盡識其至日隨宜位置先使有喫飯處乃後試其所長則大芘之嘉惠亦杭州之故事也閩運祿薄災生還家守靜無可告慰但有慚惶專肅致意敬頌台安不具

湘綺樓箋啟卷第三終

湘綺樓箋啟卷四目錄

長沙湘潭王闓運字壬父著

鄧彌之八啟

陳俊臣六啟

丁稚璜七啟

劉景韓七啟



湘綺樓箋啟卷第四

長沙湘潭王閩運字壬父著

致鄧親家

前聞劉家言信還云營葬已畢無任感愴昨得來簡故悉平安果老道令傳贈均辭六金前約經笛兄親交乃收十八之數自可不補其兩郎他日尚須謀生或有相求之日也三弟過省時通往瀏陽關於款接留語俾兄指索裴信今示又需曹緘此似不知朗公為人者彼宋學外示無私假以行法若有信往則大致蚩厭聞運竊料楊司使藉隸豫章久官西蜀先公遺愛必及子孫今到桂踰時當有青眼想家報已及之矣寄書未知公館幸於作諭時先達區區續有復札也非女生長筮筮未化驕性當家操作尤所不諳由遣嫁太早致多尤悔今幸因疾留受藥搭三年之內禮宜別居夫人向未投室亦不能理家政除喪之後方當獨任并曰然今日情勢欲令兩姪贊佐冢婦亦必不能則所謂當大事者徒虛語耳張公百忍悠謬之談家庭骨肉不宜粉飾婦實不德孤負舅恩非有改悔之萌難遽收其小效假之歲月怨去思深爾日之雍和必有非意計所及者此則私心熟慮不足為

俗人道者也聞運今歲坐廢居諸几案漸疏外緣總集陳伯母又於五月十八考終衡山尉署遺言不還故土不附夫子即葬長沙由閩運擇地安葬月內當可遷柩俟葬定再當奉聞比日酷熱初涼忽忽酬應辛兄處未及別報

得書喜慰前由易生寄一函至武岡想尚未見耳小年兄弟有見即書不違計其婉惻與否但不使高底糗與聞耳來答深執謙和得無客氣耶塗郎舍所長而用所短然出房非可豫斷非女得蒙成貸當欣然矣功兒來啟云吾兄復有小星之納何其勇毅已從門入耶抑尚是吾欲云云也閩運客寄於此欲求一似人者而不可得蜀女多於鯽魚不可為鱖魚奈何奈何講席非可久居一日不勝其勞僅可一年留去思而去之上之上者也丁公處尚未辭昨司道來問闕書隨人云方大人攜入京矣有其主必有其僕故是一段佳話與解共賞之今歲院生高第者二十六人皆為二景所搜而去頗有空羣之歎尚有十餘人未施藥括奈思歸甚切又有校經之志恐不能留每誦謝康樂詩至感深操不固未嘗不泣然也先生乃以寓公為祝何耶仲冬能成行否且留度歲或圖一聚無任欽遲之情得書知復當上省適已具舟又念眾口悠悠宜鎮以靜不欲老兄輕出且志事已

成刪改聽之羣議君家正以索版為迂致啟攻端念鄙人奇計未必依行故不復待也承示新詩十餘首知雍容靜肅無罅可乘老夫一聯尤為回春健筆進於道矣由杜而陶所謂漸近自然閻運至謝阮便竭才盡氣無級可登奈何奈何去冬有詩五六篇今行勉和二作聊寫呈鑒儻能策所不逮否游衡詩乃不恤為羣紀之謙閻運所願學未能者今聊命豐兒恭和兩篇意欲與中書比勝老兄頗畏後生家子雍所謂啟寵納侮者阿淦掉頭不肯顧即此得無跨竈耶舟中夜間輒當面談明日入峽至蜀都再陳所聞伏惟珍衛

久未相見望因秋賦送考一晤談及聞賢子言留居不來大失所望采九亦為快快後生固無論也大壽禮應趨祝僅以文代乃又遲遲後期不加責言猥承獎借功兒所書弟初未檢察俱蒙許可為幸多矣當遵諭莊書寄上也思賢行所無事殊愧素餐明歲合肥見邀若兩家子弟同中已約辛眉同送藉得游談老兄必亦欣然舟車旅食之資力能供給知兄憂貧聊欲圖報無煩計畫矣儻不果所願明年亦必謀一會弟頗有災劫占為奢僭之咎然意興不可減或亦可厭勝耳時事不及言大要不必言因便寄書並頌歐嬰百福



彌之老兄親家先生道席前因家書寄上一函昨歸承使復奉惠念唯有悲仰但  
漸東門而猶賢西河駿流而還反更肥澤可以上慰奉注下釋女愁趨庭覲朝時  
幸諭知之李黼堂近已失明不關修史與哭子黎簡堂又中風亦不關入峽與出  
峽高碧眉昨又病故與皦臣懷庭而三此三人者誼皆深於慶來而閩運以一歲  
身被四創非有道術豈能游羿之馭哉弟妻又遭繼母之喪弟蜀旋三月冒風雪  
而奔赴然於未去前猶拜客一日寫信一日其冥頑強項如此比之左季高一拜  
墊之不能跪者其度量相越遠甚而黃子壽唯頌師相之精神令人有就撫館求  
保舉之意老兄閱此得無哂其自揚而自抑耶此時夜已五更尚須留幾句為保  
之書中材料故不多及蜀歸頗有物可將而本部堂行色怱怱竟不暇檢高底鞋  
則李申甫之流一事打不開饋歲之儀未能整暇則弟之材短處也雖然千慮一  
失智者當鑒之專此敬頌年禧並問歐嬰福綏

彌之老兄親家先生無恙淦郎來奉手書反復殷拳唯有悲仰比欲即答而去使  
怱怱不相聞適會私允借免遲慢之咎想荷鑒也非女於廿二日遷殯城外計到  
家適百日以了孩幼提挈之恩差補課讀不慈之恨而已至其不克成立無補於

尊門雖至老大亦難自振不足傷憐也老兄見送詩即以杜鵑山哭為詞蓋有前知而此女頗了死生絕食七日精神不替無涕泣傷別之言殆亦自明其泡幻者則慈願之哀亦可釋矣葬事前已屬賢子請示遵行弟家擗蹙未能留居候試日內弔容悉至後當清淨再令與陳俊臣嚴受庵諸郎按日會課以期無負雅望太親母以次哀念冢婦幸以閨運意轉啟為感餘不具云

彌之賢兄親家先生道席讀復書承念甚摯唯四十年至交老而愈謙弟畜之人同於兄事先生之稱何其太多屈生有言不浸近而愈疏吾滋懼矣文理之治宜先僻遠潭人浮動不及夫夷舍王依劉前言戲耳光被金山斯為盛也孔子言為之不厭誨之不倦閨運勉學不厭頗成倦誨辭退蜀席如脫金羈馬有再設皋比之理生長通都大邑無山水游釣之娛夢想桂零無人偕隱次子長妻舍我而逝時方偷安未至遽當變名獨往京華隱於人海非有求名謀利之意思賢校經船山皆遜謝矣賢兄及彭朵園均以教學為詞聞之頭痛閨運聲勢已成窮大夫居年近六十祇圖自佚不復能為衣食謀也談經講藝則所願聞將與翁潘游於廠店必若有買山之資亦當自歸否即自了一身以妻託子視羊風拐角時已大富

矣身事一人當了家事豈一人所了耶穉穉幸已歸真雪琴亦將稅駕比之曾左  
俱免滌湯閨運無可進之階有敗名之懼善刀而藏不亦可乎局刻遼金宋三史  
均仿南北史款式宋史半成金史未校南北遼三史前已送呈矣王氏新經春秋  
禮記頗為難得今先呈儀禮一部又有八代文萃六十本係有用之書索價十六  
金嫌其太貴係門生所刻曾送一部與四女添箱未便再索又不肯價買俟他日  
減價發兌時再致送也蜀即吾家不以丁公為來去書易得耳恐未必再刻矣秋  
涼伏維道體勝常賢郎侍佳為頌

彌之賢兄先生親家道席薄遊遙返情如昨日及得來訊方悟久疏垂問殷殷感  
予萬緒小樓長日涼雨暑雲延望夫夷未由造郟輒述游狀以對嘉懷閨運自過  
中年有哀無樂庭前兒女慧者先推頻邁三殤遂成塊獨思欲棄家長客以掃塵  
緣適會穉公之喪汎江沂泮藉詞赴弔直指麻城尋君難道之篇追我古亭之迹  
孟冬朔雪枝策岱顛雪日清稜即成高詠因憶辛亥同上祝融模寫靈竒揮斥鄙  
薄雖善誘不遺於下里而內慙莫解於蓬心懷此積齡今而一洗其詩曰伊來聖  
皇游非余德敢升自謂振衣千仞壓倒彌辛矣又有回馬嶺松樹歌亦超於李杜

人世悲歡於斯頓盡華泉小住因靜得明寫成論語注二卷及入京城間訪下斜  
 保安之迹恍如隔世初欲結廬海澱旋聞習戰昆湖金鐵縱瑋弭歌靡賞同人或  
 欲營宅石刹亦有留教成均自以魯生之業孤又懲太北之道廣兼得家報婚葬  
 相推長兒拮据殆同焦爛顧念逝者宜有蓋惟我若不還彼難歸土二月初吉乘  
 雪出都訪劉景韓於清河從李少荃於潞水並久離重會歡譔有加惟汎海三朝  
 殊乖心想以言浩渺亦不過震蕙之觀若論波瀾遠不若江河之壯日出三躍尤  
 為妄言上海停輪便逢小友偶行街市未觀鶯花作小詩云楚俗餘珠履禽聲效  
 越蠻擺落蘇華葉容英法亦諸生經濟也寒食還家至今息冗求田問宅勞做無成  
 而卞莊有白簡之彈鄙夫多患失之慮頗疑閩運失職猖狂同季良之交通學張  
 儀之一怒兼之曾伯自反不仁亦謂北行乃為瑜使若賢兄當此疑謗殆必不支  
 閩運任命委心虛舟逸棹既不能效靜者之謙吉亦何容置荆棘於吾懷王池聞  
 之深加結納醉投車轄勇撤皋比自念取徑太高與世無偶遂於此月攝館思賢  
 感兩姻齟齬之讎忘後車馳驅之鑿秋冬家事粗了乃復出遊功兒年已近強名  
 不出巷覆蔭之下驕情有餘口食尚難自求青雲何階以進但比吾幼時富貴多

矣比來智者皆言時乎有變賢兄深山閉戶理亂不聞閭運既居省城又無一敵何暇遠計以詒子孫哉東臣乘但之危可以一館嫌月請太薄更再謀之吾輩伏處衙門何能振其親戚此當自咎不怨人矣附上哀詞二篇即同遣訃外二本送二劉尚書若未談及即不煩轉致餘俟續啟敬頌道安

致陳親家

去秋得手書以前寄兩函方發未久故未奉復也今春又因唐生奉上一箋計六七月必達昨承慰問具感紉憶承宣久攝公私順孰文公能否即泣亦兄舊交贊治同寅必無枘鑿湘中奄奄吏氣見之芥然閩運旅寓城中買山未得經手軍志欲考覈軍興以來共有幾營聞者不以為難稽則以為多事所謂報銷清冊者託徐鴻臚覓之亦無回信即此知辦事之無謂而眾人之皆醉也回思貴州編書時眾力合擊誠一時之盛想仁兄在官時思妙高城南起兵之時亦有今昔之感矣衡州風災而榔桂缺米今夏早熟恐有旱災幸涂生遷去俗氣稍蠲官民尚相敷衍耳楊石詮罷官歸寓省城方知左督用人之謬季雨蒼能言不能行不必於他處驗之即其隨丁數人精神不屬尚何能當大任然比之左李則識論高遠如

幽谷之於喬木彼左李者所見既謬則雖力量愈大忠誠愈篤皆實成其巨謬况又濟以私意加以揣摩伯夷所以去之若浼孔子所謂見如探湯者正為是人也此等人何能裁抑而蒼兩蒼乃欲借其權力以立門戶吾輩當為之傷惜萬不可隨聲附和以為左將用李也凡用人者必勝於所用之人漢文帝不能用賈生不能窺賈之學也宋人發妄以為將老其材彼見文帝為天子賈為之臣故也假使賈為天子文帝必不謫長沙李兩蒼為欽臣左李高必不間居而世人尊李為天人鄙左為粗才者又必紛紛矣莊生所云蜩鷲笑大鵬者誠有見於世人顛倒之見聞運久不欲論世事因感來言故聊論之知君房又怪于陵矣夷務無可言凡彼有動靜皆可不問在官盡職餘唯以文史自娛為祝

得今年二月二日手書情餘於紙爾時新命已下日來當移署矣閩中之材之國藩使求賢之主相需殷而相遇疏所代為兄憂者也然激厲陶鑄自有微權金玉作人詩人所美願一以曾侯初起為法無效其晚年之脂韋則昌陽豨苓皆良藥也去冬懷庭書來言蘭谿相逢譚及遠人洞庭舟中曾賦一篇寄上來書云云似尚未接到東西萬里我勞如何聞運因感稚公喬木之聲復為安邑豬肝之累既

已期月幸未素餐中間一歸長沙與筠仙樾岑盱衡時事因論朝詔屈指人材將帥之選眇不可邁所謂塔羅彭楊之軍胡沈王閻之吏求之今日已成古人其尤可恨者雪厚猶存二丹無恙觀其設措大異曩時即仁兄綰印二藩官年俱進而比之妙高危牆之下小西坑罟之中意氣陵雲霄忠誠貫金石思追逸軌豈可得哉然則非世無材非材不用時勢使然也況駕下如閻運者馬敢復申眉扼腕論芬韶之唾餘乎雖然樗以不材全渾沌以不鑿生湖海之士豪氣未除此昔年猶故態也兩兒昏庸平世之生員何可言學長者為朱學使所賞送入校經堂肄業次兒從至成都六雲攜所生四女侍行弟婦以老病留籍頗護嫂夫人不致仕也吾輩遂已推排作老物賢子中有幾人秀出者聞孫石雍容木天頗有憂貧之嗟此子他日定不減李少荃蓋世情濃者功名之士也閻運乃李眉生所云沒出息者故行年五十而不知四十九年之非時復吟咏以消永日耳簡堂素未深知此來觀其言行胡咏芝一流人物聰明稍不及然在楊劉之上彼在黔艱苦菁華未竭也聞校經堂有三士頗奇皆永州永順人湘其未衰耶久不相見臨書觀續荔支正孰清福自珍為頌

前歲季春命舟東下寔以移鎮齊魯思處錐囊既尋舊游兼效一得甫欲解纜忽得西音稚帥以失約相責詞義正大遂改計先由棧道直指東封中得一訪香濤藉匡不逮乃為謠傳所誤云稚公亦即高遷在再經年竟無去日今則妻女踵至釣石重溫瞻望海雲遽難會合此二年中仁兄焦勞跋涉於饑饉師旅之間雖福力俱宏凶灾化吉然艱貞困苦為曾胡所未嘗盤錯試利器無乃太虐耶每晤穉公言及節下輒嗟憐其無輔閻運對曰某本往山東而公留之又為此言何其矛盾穉公笑無以答也膠東冰合旌旆當還歷下冬晴但祝平為福不望和為貴也季丈舉措乖方進退失據遠竄海濱難言塞責雪片有福竟不撥湯張倪雷光多矣石泉平穩差勝沅浦厚菴復出將為蛇足公所力保之鮑超殆將階亂於蜀使城南時從弟意無人成功亦無人致禍曹公不赦呂布誠有遠見應守養虎不可養又增閱歷他日當思鄙言耳閻運自今十月朔日以後當天發誓不復議論縱橫緣昨得長孫言及文史流傳之人多無後福故欲以陰功補前過甫及二日又當與公通書不覺隨手又寫出無數妄談此為劉伶戒酒請即以此書為證後之王閻運則醇謹老成言不輕發矣曾滌丈云我豈猶若前日之亂糟糟耶放下屠



刀閉口不談人長短兄聞之或亦疑信參半請待相見時驗之專肅叩安並諸郎均吉

去歲聞開府之重曾因李總兵培榮面致頌祝並達鄙忱計於臘底達聽昨接三兄道過長沙亦竟未得寓書唯郵駟日通政聲宏遠風裁益峻軍武始經積弱之邦且得一二威鎮以奉指縱則海寇潛銷外侮不作蓋作官如作文敷衍完卷人可了若必欲稱題雖師子全力竭蹶不遑況兩越隱憂方大造福亦遠誠得其人中國可振故閩運之所以期節下較詠公之期將帥而尤遠也丁公目營四海孝達志經八表材或不逮志則有餘然求賢審官未若公之優於天下益勉訂謨以副眾望幸甚幸甚俗人猥多尤以嚴威為貴令人撐架子則自知其官尊遇公事則自忘其官尊徇茫周旋殆同里長調劑苦樂如分社肉自平寇以後此風尤熾夙荷同氣敢以此規節下本起京官毋效沅峴唯恐人議其外行而故作時派耳簡堂雪琴昨俱相見每言公望八坐罕傳砥柱中流匪異人任閩運留蜀三年頗崇儒業乃去冬謀歸終隱先遣次子選湘道卒夔州年僅廿二此即來書所稱為佳者亦實能傳家學遭此橫翦令人失氣旋於臘初抵里閉戶逃人間舍求田

無可託迹衡陽故人略已喪盡舊鄉莫薄又不可居貴州太遠家人又不樂往因循尚在城中且俟移家既定乃復往蜀大要明後年事若有變局亦不能往也湘鄉王步軒名肇鴻曾見賞於沅浦後以口舌得罪不甘伏處翩然東游聞運已與書唐藝兄李幼梅為覓一館儻節署有可位置尤望隨才使效但無效稚公之於常生驟長其驕耳陶甄羣材是公所長因思往事輒多覲縷

前得嫂夫人赴音即擬撰詞躬奠致稽唁慰家事煩冗倏忽半年匿跡山中日親版築遂忘世事矣昨暫還城奉手書乃悟慢滯之愆不加督問仍承垂注故知篤舊知心過於鮑叔感愧感愧聞運虛名招青灾禍延纏故人不遺爭相濡煦取其一得待以賓師鈞仙雪芹既虛講席少荃孝達方欲羈縻竊以垂老背時懶復酬酢奔馳南北蓋有託而逃非復希冀脂膏窺伺督撫去冬還轡所願盡償而文卿不諒復為延譽張何之蓋飛陰蓬門干木踰垣誠非得已孔子曰富而可求執鞭吾亦區區之精攘臂何為自入故山百無聞見此五十年未有之樂也時局因循待盡而已少荃貪於權勢多所瞻徇叔平頗務虛名不樂西學鐵路斷斷議首津通軒然大波激怒醇邸語盡離宗想皆天外勢不能行不待言矣小說云兩近視

爭編字編猶未挂鐵路異同實類於此承詢利害則有可言鐵路之利民間過舟馬遠矣若山谷間皆開支路則流通滯貨均平物價可使四海皆若比鄰大凡治世者先使民老死不相往來後必使民萬里如在庭戶由塞而通由獨而羣他日乘金輪而行周天下固非翁所能沮亦非李所能贊也若官欲以之取利斯所謂尋晦氣耶至如調兵拯荒豫設不祥以生大役不待問而可答逐之矣詩云黃牛遇危力難勝言朝廷不能止鐵路也又曰四方各自掃烽煙言四方不能成鐵路也又曰七載終留一線延言僅存唐山一線路也仙人先告我矣先生豈聞之耶李雨蒼春夢未醒乃踊企於黃牛昨已告之真成一笑也小女輩均乘鐵輪馳驚而來人人贊歎不知裕陳奎倪何見不及此雪芹遺摺省城頗咎陳大人未能核定昔唐甄渠遺摺係閻運代擬大為王夔石所訛遺摺猶有美惡一何可笑總之年過六十唯有獨居時留一二處可打皮口之處發皇耳目誠消遣之一法老兄得之矣閻運又自負也節前妻病極危少間作書恭問起居餘續上不具後臣仁兄先生節下自聞開府已再遣書均應人之求藉申已懷想次第入鑿矣越南兒戲遂告邊警曾徐由此其選未知東海藩使亦勞籌備否今日夷務祇宜

張皇紙上不可見之施行此又兵法心書所不載者慶南甫兩下策尚為家變所驚況勝彼者耶稚公昨有大文以未報故不敢宣他日當得聞也黃恕公請疾散遣家人有舊僕李貴久服勤役思謀善地將與書節下尚恐其不得收錄也因彌之之妹告於弟妻轉求弟函紀文達所云長隨之求薦通神者矣節下見之試其可否如可用則彼有鄧王二人之保舉信為奇材如不可用亦乞看情面與別薦發財之地萬不可使流落及失志而還弟為穎士招來起見特肅手書

### 致丁親家

稚璜宮保節下前臨鄙郡辱荷知延任再一紀久疏民敬辛未春偶至京師憑黃御史寄上一詩及拙撰桂陽志一部聊申企仰人事荒忽亦未知曾達與否昨者湖南委員曾令還言明公勞役河壩須髮頽白齊魯水患垂二十年閩運於己未年佐文星嚴撫部曾擬一疏文未敢上今逢仁牧克澹沈災扞患立功莫此為大雖在林野樂聞其成願以措施方略因暇寄示幸甚幸甚衡陽監生常集梅文節之族子家貧游學偃蹇江淮聞歷下游談之風有長安笑樂之志昔人所云於水見河於山見岱於人見韓太尉者明公即今世之韓太尉也敢介一函以成三見

尚冀加之拂拭試以冗勞如工作有可安排常生勤慎無習氣未始非手足之烈不然則州郡小館亦免飢餓於君之土地想明公任才有宜履履得所不虛其行矣聞運近居深山唯以箋注六藝為務已成書箋詩補箋凡冊九卷差足仰酬獎借耳霜寒道長無任奉勤

去冬得幙府書兼示歷山觀稼之盛即欲牽綴蕪淺上頌成功人事恩恩迄今未就昨得文卿兄函述雅意垂詢游處之迹入蜀勝覽自香濤視學時已有前約因憚獨行又嫌提挈遠巡有待旋聞彼方有主講之議尤難自赴今聞持節欣願趨依文允所籌旅費家用其事績俗似非雅論但去歲經手編集湘軍戰守事錄今年五月方始初稟半歲未必能成要俟此書寫定乃能買舟溯江上謁轅門耳水南索價韓愈所畫不足煩經慮也下車政令如禁迎送除節餽省宴會皆古人之通義今世之罕聞道咸以來官吏以川廣為樂土則其民不堪命可知駱文忠劉霞仙不能大革其俗非識力不足自處未能無欲也欲之所在利名並重節下一以古意行之則積俗丕變萬民知賴矣然近日大敝在仕宦途襍候補人多其人既入官必有一二大寮為之主顧而困乏顛連之狀又易達於院司思所以拯濟

之乃為一歲一更代之法故排斥實缺以為騰挪市惠作威較之貪侈者其惡萬倍習而不察反得頌聲罔上虐下以徇情面斯誠不可解之故也今欲施治在遵律令實缺到任繳憑一依舊章則上司不可畏而牧令自重三月之後不勝任者以白簡從事三月以前加之訓戒而斷不可引留省察看之說無故遏抑之調補委之藩司督府察其當否則事權歸一憲體亦尊此外候補者審其才具足供差委而已如有委署以輪為酌分其年勞殿最前後如輪委第一者不勝任即委第二以下見為勝任而治狀不副亦依實缺例訓誡之撤參之其先見為不勝任之第一者果不寬証則餓死不足惜如一時意見偶誤則彼固第一仍為次輪之一是雖輪實的雖酌實輪必無非本班而冒借得缺亦無能挾八行餽千金以橫來干求者吏治何弗澄清人員何至擁擠乎孔子曰如有所譏其有所試州縣未任事何處可以察看此不過與朝廷爭用人之權耳至一歲一代雖龔黃不能為治而庸人皆必為惡大吏先存一傳舍之見而後以此為恩威節下公忠信於海內其必先革此而後議其他固可知也區區以此進者親見其害烈於盜賊或恐俗吏持省例之說以緩新政稍待則難改矣至夫汰勇練兵蠲煩去苛次第數行願

觀尤眾湘中舊民皆為抃喜閩運城居一年應酬頗劇學業無進深負賞音因承寄訊先行奉復

稚公先生親家節下在巫山兩寄牋問亮塵幕府風波修阻倦累煩喧不奉音問忽然旬月冬春政暇侍福多歡蘭玉纓紳椒蘇觴詠當西南之康樂酬謨畫之殷勞致足樂也斯可頌也閩運於嘉平三日始還長沙三舟順流一物無損茲實明公之福茫亦峽游至快之事唯亡子尚未安窆拙妻又遭母喪困石疾恭既歎且笑左公恩惠請急火速之官其意欲實做畫錦堂開手二句文字玉公尚未得代龐藩聞尚勤明湘城熙熙尚稱安帖李黼堂病日殆必失明餘皆照常喫飯而已鹽商新設義學欲以閩運為館師自行束脩未嘗無誨擬亦諾之校經一席便請前學使陶子珍編修蓋凡主講者必有餘於位然後可從容肆應閩運以布衣而抗公卿明公遷代代者必勉強姑留去住兩難此所以不可久也張香濤雅人猶欲以紅人自命忘勢與忘人之勢公與閩運皆一時不可得之人才以此開蜀中教澤他日必有其效矣護船哨弁張書蕃奉差勤謹堅不受酬微末弁丁當如何給獎尚求留意附呈土物數種皆廿年前尊俎舊味亦故民獻瓜之敬尚無哂其不腆耳新年崇喜恭敬鈞安

正月四日始得遣來并齋書還謝越兩旬奉到去臘七日手教拳拳引進誠款芬  
非具仰曠懷優於天下雖施非其人或疑假借太過然賢於隗者自遠然轅如此求  
治黎民職利而同城察吏或猶扞格此則俗敝已久古義淪亡邑犬吠怪迷者難  
悟要之斯人必非異類遲遲自化蜀當丕變也近日兩司承風恐後求如滋軒稍  
不唯阿者同時僅見月叟恢張亦自明了三人同心此則上理明公化火阬為福  
地天之報善助順確有明徵唯宜乘此機勢痛與刪除取彼俗庸束之高閣出二  
山於外鎮斥延竇之中援吏氣一清不待白簡與利理財又其末矣新甯又煩咨  
度昭通事自難掩此公激然無欲而舍己循人君子之過重於貪暴太谷遼濶又  
不足論鄱州節度頻致譏彈臺省巽然爭於鉗射張雖外用轉似終南家作奏章  
以希自見人材益少物論滋多樞機不能不執咎也湘中兜整餘氣笨伯如初劉  
曾告歸城中頓有二督峴首雍容即當見錄沅弟鞅鞅未知所由昨乃怪怨閩運  
以所作湘軍志為詆訶功烈金剛之徒附和一詞怒於市而色於室已為可歎而  
鄱州人士怙於名位竟成積習身與交游莫能救之以此知史公論淮陰未能學  
道誠實見其所以然而閩運德望俱無坐觀擾攘亦實無挽回之力湘人愚直之



風遂已衰矣初在城日少尚未料其至此此又一隅之隱憂耳比來僅與諸學子  
講論經義冀以漸導毀其所作辭其美館以示無我之心然先達乃後進之觀瞻  
紅頂猶然況於白面此非院司主持不可明公以蜀中教益歸美鄙生毋乃本末  
倒置乎亡子本宜即葬因厝地浮上有螿其母兄堅欲別卜田莊丙舍難求因循  
半載閨運行愁坐歎一事無成命也奈何俟時而已長兒率三兒已入書院小兒  
當與發蒙詒子一經不如贏金之便易多矣古之人老而患得蓋有由也簡堂元  
夕入城借居東茅巷宅每飯尚能兩盃神氣殊不清醒黃恕翁一見左侯遂仆於  
客坐凶日乃興幸在己家否則殆矣風淫之疾近日尤甚亦與時局相應宰相信  
能變理也女公子出閣何日榮行跋涉長途妻子等極為惦念添妝土物當徑致  
江淮先此問訊並賀嘉禮族子代綬去年司書局頗有侵牟在途又多攬盜特命  
慶局恐負心誤事為閨運羞俟五六月可諭撤之緣其人外似樸誠而臨去時下  
手其毒能使不及防則無所施技便告局員傳飭之云閨運求撤令其速還則不  
唯無弊而反收其小效知人不易微物蠹蝕鉤鉅之法真不可少況夫委任百僚  
總持萬里當人心陷溺之日有巨萬財賦之櫻棘手苦心相需為用求賢自輔明

目達聰廣學兼賅竊有至望西雲長陰延想為勞初春晴和小樓明淨手書申意不覺觀連慮妨察思猶多未達

穉公先生親家節下奉別以來惟深懸念夔州上啟未盡離懷緣心緒煩鈍郵程逾邁計當還箋賀壽已復逡巡伏想福綏定符齋靜晝長政理文史自娛佚老頤心莫樂於此時艱事變來則應之若預慮憂危非徒無益故孔子遭衰世而耳順從心耳順則無悲怒從心則無怫鬱忠憤之說少年客氣耳屈原曰廣心定志余何畏懼誠審於致身之道而不與時俗爭也今世人材大略可見唐松之佐尚未易逢張鹿所行猶懷二意城中大僚近唯游叟可倚亦未必即是通才此外紛紛意趣相遠公欲俱獎王室彼則志在官財面從後言閭運聞之屢矣思布腹心豈可望哉治蜀十年宏綱已振後亦不能自改審屬奉行而已非獨治兵理財不可更張即紅人黑人亦不可移易故下車時猶當求賢今則但可用材耳後有來者可則與之不可則拒之斯所以當卧治也惟逸於任人漸求自代斯乃節下逍遙之方竊料斯時無出公右者則又不必言也錫侯至湘康能大著卜公側席待之亦不如在蜀之樂閭運於四月三日到家妾樞亦承福慙平安出險前託黃母置

一田莊以衰病不能代辦今尚無山可歸日日求覓悔生此累致此攀纏復居城中徒為物役幸妻子女孫尚無啾唧然日行功課廢矣糧儲夏獻雲在湘頗能粉飾亦被劾去遂覺滿目俗塵庚子山詩云橫石三兩片長松四五株對君俗人眼真與理當無故國不可復居深山又防盜掠決計北上以避喧囂湘中吏習本勝蜀中自王撫以來日益懈弛近則遠不及蜀益以知明公整飭之功孳孳講求終當丕變惜監司少能喻者然承流宣德亦不似各省荆榛也蜀士則積敝稍深且懷觀望容游難久故無大效僅比往日聞見稍廓耳今年進士五人皆迂謹平穩之姿稍免浮薄庶不詒教者之辱閨運還家以幼子失學已久暫為督課他日或當攜以出游小女寄養德門多費親太太金心妻婦等均深感戴明歲當來迎還盼女想時來請安亦求教誨瞻望西峽不盡馳依

稚公先生親家節下四月八日得手書三函勤勤廿餘紙發函愧荷欣仰神明之勝又竊惜公好勞而不自節與當世闊人大異既讀論時事諸語則知公目營四海所志宏遠其量百世即夙夜勤政猶不過陶公習勞之意而私心所屏營者猶淺之乎測君子也拙筆好古而不能顯豁視公所作洋纒詳盡者止如蹄涔之與江

海遠承委及慚懼莫名即次所懷以候決擇不今不古大可嗤也胡詠之往言湖外三枝筆闡運以為皆有漏洞如公奏議精力彌滿微嫌過長然與今日諸公論事則不嫌其諄複但此事非紙墨可罄或宜發其端而仍俟直對耳儻果陸見聞運即當由湘入都以聽訃謨湘省見報較捷尚可先至也然今日豈能有此快事耶蜀俗久漸佻薄其風壞於州縣而實由於監司本人未有習氣而其左右幕友盤固交結以請託長子孫支蔓數十年無幕不官無官不與之為緣以不學嗜利之人讀吏胥條例之書顛倒黑白深入膏肓公之所以小治者非人心頓轉也力不勝也恃力以求勝此五伯偏駁之業如諸葛子產及身而已然公所行實度越尋常人非木石久當悟悔教澤垂裕計在四五十年後比時若官士有賢豪者乃可望其丕變否亦不過一二智者咨嗟仰之耳聞運承流宣化未敢自輕亦嘗奉達德意期於遠大所言所行竊欲開其心胸無如習染已深規模粗定人各有短不可驟化數十人中竟無宏毅之才徒有訓故詞章之士尚難望其必達漸摩之效動期十年生為湘人終當歸老即復再留三數年亦何所益故欲為節下引其端不能竟其緒也來教諄諄一似期月而可者豈鄙陋所敢問乎且聞運在蜀危

行高談頗不便於當道以公寬仁乃有直繩之客羊質虎皮終當遭射幸無官守亦不必以保全累明公也鄂生又當往滇不知留幾許時公意欲以留後期之亦似未宜此公彊力而多偏聽實做剛復自用四字無欲則剛剛復二字後世不可多得曾滌公論李高所謂未能當一面者材地所限不能強也他日自錚錚於名臣傳中然欲闡運推之則猶未足以同時比之結實勝左而聰明尚不及李蓋一官一事則有餘用人推賢則不足也就其所最推服者必不以為勝任滿志之選則其自用可知矣所謂大臣者無他技而有人技論人以無技最難也茲軒時下高手識見又不及鄂生之廣朝廷用之代公則可特薦亦似未宜丹公應詔再出或其機會涂撫遂已作督何劉竟不得遷豹岑舊亦有名觀其張大安南恐亦涉於輕易闡運嘗言以當世為無人材此處士嫉時之詞耳身居大位即不得自出考語言無人者豈非人耶有一人即可用千萬人而何患乎乏材此雖以責樞臣而公等兼圻大府亦有黜陟一新之效願節下留意幸甚幸甚要之用人不宜過獎使闡運廿年前得公許與如此則已高興上天矣恰如題分乃見激揚妙用豈易言哉女公子嘉禮吉期間擇在端午前後所寓行館昨遺探邦上尚未有定日

內當已合好新婿當至蜀謁觀否親家太太還期早晚四世兄入都後節府清間  
惟時珍衛

穉公先生親家道席夏間再上啟事旋於唐生處奉四月杪所齋手教及素綉一  
疋知兩信時尚未到此後科場期近官士并心於秋試僕僕槐陰迄未有暇故亦  
久疏執訊想監臨出闈又將主試勞於肆應遠在清心秋爽氣涼肝氣不至復發  
眩疾早已除根矣幸甚幸甚小女昨得女公子揚州書聞親家母攜率八郎由齊  
至晉以待請觀之旨豈武闈奏請代者先疏待命耶抑賦鷹揚而後北上也高麗  
事少愈於日本臺灣之舉少荃定多詭道然國之隱憂其兆此矣鹽引岸地徒成  
一笑而內外所爭反在加票自牧慶藩狐兔微物乃能使彈章遽起筠季倥偬政  
體至斯變異大矣季子殆將去位乎孝達心苦鈞稽知賑捐之多侵盜猶且憚於  
一發未識遂可陰消否湘人初起本儒臣壯猶其後負戈荷戈皆躋文位忘其非  
據自謂功高貪鄙昏庸不可復療比年頻致物論四督失官授人口實寵反為辱  
然恐朝議遂以為義師之起亦意在騙保舉以取貨財因今日之左曾以訾前日  
之胡曾尤可傷也簡帥承公知賞未老而終良幹弗成想深悼惜卞撫新起朝望

未優又其疏底取於倉卒所述文章尤皆殊乏精神賜恤宣付實為恩渥唯巡撫  
例無謚法新議又禁乞恩溘然蓋棺曾不得與文質夫曾樞垣比盛乃至并郭松  
林黃潤昌之不如閩運私心以為闕典伏思簡堂勇介實有過人前者視學珂鄉  
蒙犯瘴癘始開弦誦以漸銷兵及任藩司首攻貴定省城無警軍勢乃舒此則卅  
年中滇黔將帥功未有過之者也左遷蜀臬贊佐明公始公下車之時扇廉風以  
挽積敝司道驚怪不信世間有不愛錢之官反肆猜疑誣及左右謂一人矯情僕  
妾婪私及簡堂之至條教號令一遵約示真革門包杜絕賂遺然後蜀中吏士恍  
然大悟廉貪黑白至此始分此剝復否泰之交功尤大於定亂者矣清積獄省羈  
候嚴究誣告京控衰止初設保甲盜發輒聞孽孽求治無幾微怨望之意近歲左  
降官往往託疾不上唯簡堂欣然如新得大官比其純樸忠良能見其大亦宜特  
予表揚以風薄俗非明公無此公心亦無此大力輒附上行述及原奏彙以備采  
擇有望於附片一陳之焉漕司例得予謚黔撫亦有謚例可否徵引文彬曾璧光  
以感動天心易名之寵庶非幸致耳湘中今歲多疾家中尚無啾唧唯五月中鄧  
氏大女病夭年運乖張益慚祚薄鄉里卜宅亦又無成俟公入都仍當由湘至燕

以圖良晤如仍留在鎮冬杪水靜或扁舟溯峽但不再居講席以去來自由也

致劉巡撫

辛巳歲唐鄂兄還送來庫平銀二百兩云係子壽代交比以庫平有餘詢其來手云係台端原封何其廉而不儉也比時恩恩還湘故未作復癸未夏已命舟東汎將至天津計良晤在即不意登舟日得蜀信云穉公病危改途視之遂又羈留去冬擇期北上忽喪長妾遺孤四五人當送還家北行又不果益會合有前定非獨利名不可強求也然蹤迹時聞真除共喜繼申筠而藩撫必不因翠毛而停頓比則善頌善禱當亦欣然也正月得手書筆意老蒼迥非卅年前時花美女之派又復三歎詠佳人半老之句即根觸滄桑之感來示四君子皆強弩之末閭運更倦於津梁吾輩登臺者唯有孝達甫艾此外則皆後輩矣謝公屐折於小兒尚何功業之可言乎旅蜀前後九年一無所成束脩萬金反增累三千金以年計之每歲用千餘金不為奢也然豈可長居此乎將俟妾葬後單車至京師學劉融齋破羽毛外鞋一件一年可餘五十金十年則五百金看人升沈亦一樂矣家中則必不可居人皆以我為閩人我亦自以為閩人籃籃蓋天破船攬載終身無休歇時此



曾滌公所謂道大莫能容之效也拙著八代詩選早已刻成刻手極劣不足寄贈尚須重刻去歲刻成三經甚佳俟由長沙寄呈郎君長成時讀之詩文本不可刊凡人生存唯可刻朱卷白摺則不帖本若刻文詩人人要一冊人人白要比惟易笏山李次青張子衡之流有平餘粟鹽資本乃能供之闡運豈其人耶子大先生純乎賢者惜初知之不盡朝廷用之太晚又微嫌過於謙慎不能知小人之情狀楊石泉伯仲非某所及以此觀之賢人多有悃悞難知仁弟僕亦有溢而待發者耶六年之別語不可詮次藉頌同福不具

景韓仁兄先生台席吳中暫寓值兩峰參差未能仰禱盛治方深歎仄隆誼殷拳感知惜別然聞雲樂飛不樂留也此想佳婦宜家長暉迎節賀至之奏有感新綸高子喬遷湘人驥首為頌為望闡運於朔日出江次夜狂風坐客樓眺望頗增逸興計程月半到家再當函謝前寄新詩三首覽畢乞飭送文小坡以代書問鎮江米價尚平常州人材向盡近察吳俗大有變夷之勢挽回極難殆非樂土更十年後湘化為洋則大局不堪想矣救之當以吏為急亦老生常談也專此奉達故頌道安不具

昨專呈一函計已達鑿榕城夏蔭榴酒天香新政覃敷民吏康樂幸甚幸甚閩運  
還山營住粗已迄工無福隱居仍當暫出擬於日內北游河峽藉登嵩華以補行  
蹤因樾岑內召閩中僻瘠台旌指日開府大邦故無意東游也長沙丁秩臣先生  
及其弟遜卿果臣當道光時儒業尤高湘人數敬一時名公皆加優禮草瓢自樂  
聞望彌崇子孫丁口稍繁遂有求官覓食者其子重安通判從葆芝岑入閩至今  
將廿年閩吏疲瘵公今已悉州縣強可餬口少能贍家通判間官尤為無味友人  
勸令還里今歲已送母還而累重債纏卒難擺脫知公愛屋謹代陳請乞察其才  
能與一優委不能望旃敢三徑但得空手還鄉庶幾里人知儒門之不墜耳若審  
可驅策留助指搆此在大府之貪賢非閩運所敢擬也合肥久無來信高麗頗費  
調停賜堂新除增一同志閩其治矣專此奉懇敬頌台福不具

別後比上兩牋人事忽促遂復半歲然周星未滿榮陟三階固久次之亟超亦簡  
材之難緩閩疆暫寄指願八駒湘上福星定如願矣頌甚幸甚下子編復而留心  
吏事尚非時流所及閩官清苦無甚習氣其地士大夫亦皆持正可備諮詢到彼  
必如意勝吳中也舊僕陳順曾隨葆芝岑鹿滋軒在彼頗諳風俗今令投叩祇候

指搗又文采翩翩之挑水夫去歲即思執鞭閭運途中乏人攜還鄉里勞而且窘思所酬之特令依託鈴下稍資霑溉其人尚可供家常使喚官中雖無需此而倉猝殊不易得他日官成政美求田問舍方知其有用也閭運今年正月即移硯山莊閨月來城嫁女為司道公請閱卷避之不得聊作周旋幸非講席紛繁之比每月不過一二日可了而虛領厚糈仍不安身自食其力不如食人之力同一調劑無須託故羈縻年來為此奔忙固非俗人所能喻耳附上湘潭志書一部呈鑒此亦千金之作中多舛漏以捐款不繼草草成之外一部求轉寄裴樾岑光祿並希代致拳拳聞其虧空焦勞勸其不必認真以非官話故不作書諺曰打渾水捉魚今正捉魚之時也如欲獨清當極言船局之不必設以節糜費區區小搏節豈不可笑乎樾公忠誠人不能以此說進因託老兄微諷之並以示知夷務者餘俟續上

景兄先生節下前年憑某縣丞寄上詩扇因循兩秋致無一字緣日有相訪之意轉成疏隔也蘇僕還奉手書并詩選名筆尋玩再四復如面對昨聞周嘯軒道臺言政化未孚水旱災皆不恤以為必無之理又恐籌餉太急容務催科欲親至鈴

轅庶可獻替已定於冬至後北發旋因三兒婚期在臘未可脫然臘後嚴寒憚於車馬以此中止瞻望惘然仁兄細密仁祥疆臣無比河南積做難與弛張滋軒稍加整理已復得諉方今之世最利庸昏然或盡示優容又將何以施治時逾三載威惠必彰但勿隨俗喜西甘心末策一擲百兆國不乏財清退干營兵非不足富強之本不在能軍吏治果脩人才自出區區閱歷所得願備疇咨閭運踰伏五年浮雲萬變兒女之累幸不相關今歲小旱山田豐熟使得飽飯無事時入城中院司以次均脩舊好度歲以後翩然復去亦閒居之至樂也三兒廢材忽能把筆此獎成之力也今年附入縣學又真不能為從九未入流矣聞之當亦軒渠連得手函均從芝生轉寄時來往衡湘未遑久駐又時局大變皇恐不安浸浸向雲驚魂未已想膺荷重寄軌軌尤深新命海疆朝旨有在不以肥瘠為意而尤難措施矣疆臣觀望風旨者如張陳胡廖未免輕率而譚劉王陶安靜太過又成廢弛節下撫豫樸穩過人饒有疾風勁草之節此同人所共佩服亦弟私心所慶喜者但絲裏針鋒劉蔭公用而不效如今時事陳文恭所謂不肖州縣非嚴罰重刑不能革心而藩司為之樞紐仰公寬厚致有蒙蔽一二佞諛交構其間吾輩暮年

多慈少威容有不照之處舊學商量願為公進一解耳周嘯軒芝台從子庸安細人已早死矣因其言荒政欲公聞之非能月旦人也涖任想在春和僚吏歡迎定勝大梁有趙縣丞璜武陵世家久託帡幪其才志無待遙述惟需次末秩難於特達欲求轅下一差使得公拂拭可冀出幽遷喬其人與閩運未面而其諸兄皆有交情俱不免困躓以此仰干惟加意提攜為感閩運今年本擬游梁因有寄諭以大臣見待未敢入網幸不為四章京之績然竊附翁吳管束之例還山度歲並不敢入城過年樹大招風自問非比羊質虎皮亦有懼焉安居讀書庶幾無悔七十一行至為公作序即當來拜壽能移近兩湖移香濤兩江則可遊矣除夕懷人手此叩安即賀大喜

景韓老兄侍郎道席兩年初未通書然無日不念頗聞福體康健而心志鬱悶時局固為可憂已退亦何能補昨送俞仲隅撫部還山序文發明封疆大臣無止足高蹈之義有舍之則藏之時藏則與野叟等耳四郊之壘非士之辱不辱則仍榮矣願為老兄進一解也負累雖重日食當尚有資如至甌塵釜魚宜暫游湘中一二故人雖甚貧吝散廬薄田供十人之食猶有甘旨揚州危巖不可居也何苦以

貧而致富耶弟為多女所累勉力已嫁其八止有一女今出訪求但得出門便無  
累矣精神彌滿尚可逐隊入場道過武昌世兄適還省覲留書敬問起居並問閭  
內外均安吉幸甚幸甚

湘綺樓箋啟卷第四終

湘綺樓箋啟

美日

一一



湘綺樓箋啟卷五目錄

長沙湘潭王闈運字壬父著

彭雪琴一啟

馮星槎一啟

徐季和一啟

邵實夫一啟

陳芸敏一啟

陳伯雙一啟

蔣壽山一啟

龔省吾一啟

周保三一啟

陳伯商一啟

黃仲毅一啟

郭子恬一啟



羅笏臣三啟

張楚秋二啟

張正暘三啟

熊樹臣一啟

恆鎮如二啟

蕭子厚一啟

宋鉞卿一啟

莫措卿一啟

崇扶山一啟

劉虛谷一啟

芮少海一啟

李溫萃一啟

李佩蘭一啟

唐澤波一啟

董小樓一啟

黃子壽一啟

丁養帆二啟

許靜涵一啟

楊蓬海二啟

謝培榮一啟

黃澤臣一啟

彭鴻川一啟

孫顯臺一啟

唐稚雲徐次鶴一啟

方葆卿一啟

羅蓮渠一啟

鄭九州一啟

齊敬公一啟

湘綺樓箋啟

卷五 目錄

二

李次青一啟

李潤之一啟

丁伊農一啟

龍芝山一啟

尊經兩監院二啟

伍松生一啟

錢閣學一啟

穆芸閣一啟

曠鳳岡一啟

許仲笏一啟

王正儒二啟

張子衡一啟

錦芝生二啟

陳笠唐一啟

目終

湘綺樓箋啟卷第五

長沙湘潭王閨運字士父著

致彭尚書

雪琴仁兄宮保尚書節下今歲中秋看諸女拜月因話甲寅歲節下從衡陽養病還軍相訪長沙徒步東城精銳俾行如天仙姮娥曾幾何時忽俱衰老西川南海碧石漢青霄即欲遣信通詞俄承手札殷勤問慰悲壯纏綿頭白天涯兩心猶照不減元白神交也防海之勤經畫之略其可見者已具讀大疏矣公當洋面首衝而敵船不敢窺伺此非宿望偉烈不能幸致孝達依倚遂成砥柱幼樵不辰身名俱敗然見敵始走亦何勇也前有裕程後云僧勝交綏未接聞礮已逃今乃憑仗威聲居然敗績以後白面書生皆敢與紅衣對壘中外之機轉移在此少相因倚亦得成和事異金人遇隆少保憤懣之氣可以少紓至於春霆再奮糜餉億兆則閩運屢爭不得似屬無名然前者賴其跳踉今始酬之重價楚弓楚得或有數存孤拔既殂左侯旋逝此回弈局又已斂枰嶺外瘴蒸殊非樂土還湘甚近當荷俞褒矣稚公兩蓬子喪求去頗切歸無所往往亦無聊聞運勸其入都就醫以希閒散

昔年馳驅英妙之士皆各類唐繼起無賢可嗟怪也船山精舍遂獨初成後學承風必儲俊人闡運久居石室謬荷虛推但慕元空猶疲酬對故山無宅作客看人二者皆非所安亦將草玄京輦未達之業猶有萬端德功固難立言尤不易易唯觀當代戡亂之材絕少黼黻之彥實多豈天啟升平先生儒雅將宏聖道以格遠人乎經術若明開山之功庶無媿於諸君子茫茫大造未可邇事測也鬢霜齒落未老先秋重煩眷念輒述所志蜀中近得子大單車到官清節更屬於督藩侈風或可漸革湘省官士喧闐滌公餘風已絕首善之鄉今益唵襟由菁華盡竭故也何日得幅巾蹇驢仍續湘蒸之游席設香腰鍋燒龍井刺吾兩老重話少年則今日之相思復如夢幻霜清氣爽伏願因時禔福不具

致馮章京

星槎仁兄大人閣下別後輒喜得朋還誇鄉里時危道降通介為難辛未友張孝達知其必顯然恨其務名不實果自陷於紅人仁兄才識恢恢當知得志來時為人生應有之境反不如因阮者之足自問則視世事皆得其端委而所以處之亦無容氣矣古今來驟貴人甚多如孝達者自喜其飛騰而吾獨惜其孤陋使稍去

熱中豈不一偉人乎聽言當在未聞時故先以此進他日留意知其拳拳也聞運  
歸求田舍仍無營住處心甚灰懶故絕不與友朋通問及今將百日念太疏闊擇  
尤急者先寄一訊容入鄉消夏時可一清逋負也壽山健在可喜今歲得免福祿  
無量矣然鄙心終憂之鄉省平安雨暘時若足慰遠念敬頌台安不宣

致徐侍郎

季和先生仁兄閣下京華託契意氣彌敦家累促還襟情仍結但响濡雖樂未若  
相忘回首卿雲朗然長照塵中日短遂及十旬猶闕還書亦自怪也聞運窮大失  
居受廬未得仍歸陋巷稍發陳書神傲心粗年頽志退聊期遣日敢曰溫經伏想  
清閒必多充擴政本在於經術憂時不可空談事貴通觀道無凝滯此則仁兄所  
以超然也屬書遼紙在途已滿中多未檢幸勿示人湘上清和蕙荷芬馥遙懷高  
尚未共清齋不勝企遲專頌台安不具

致邵給事

竇夫先生仁兄閣下京華承教密過成都屢荷嘉招愧無瓊報蘭池清夏槐省吟  
冰幸多素心彌增清興家事牽促尚待數年後始能入都若不厭承明時當相從

耳聞運於二月抵家日夕煩冗頻逢驛使久闕塵箋湘水瀏其徒思別路近者速  
勞恩辭舉玉徹邦鄂岳驛騷唯恐慢容易曰困於赤紱詩云不挹酒漿臺中或只  
欲釐姦而未遑計二星之勞徹耳續有佳興再得奉書專布謝忱敬頌台安

致陳御史

芸敏世叔老夫子台席幸承枝蔭得賦華琚緣在寄餐未謀尊酒覆叨醴設深愧  
束脩東風吹輪南轅返旆江湖契闊星斗瞻依伏想勝常以為慶祝聞運徒歌彈  
鋏未覓立錐始欲誅茅方須刈稻暫居城市仍理課程近督學僮鈔輯爾足頗增  
新意以釋蟲魚命寄拙箋俟交便驛先此奉謝敬頌侍安梅雨晝長蘭風言遠時  
須嘉誨以誘咫尺聞遙企清塵不勝馳系

致陳編脩

伯雙仁兄同十先生閣下京華小住藉訪苔岑猶恨怱怱未展情話本欲移家寄  
止西泠適逢武廢我文心靈臺僦居當俟他日玉窗櫻桃有如西蜀遙思邸福  
隨唱歡愉庭祀芝蘭軒窗圖史脩清大隱樂冠同儕聞運晚遘屯愆頗傷真性近  
始招收餘魄重理篇章讀易探爻稍有所見而精神不足向若而驚自笑眠蠶不

成仙蝨視鉤深探蹟之堅果何止十二弗如耶湘夏清涼且宜戢影延望高致無任馳思手肅申情即頌安喜

致蔣御史

壽山先生同年臺下出京曾附二片奉問起居兼申謝意塗中迅駛歸客恩忙到家三月心緒冗襟訖未得早通消息愧荷煌煌大文遲遲闕缺藉茲養望因可傳名想待六月方能出守矣尊體未及前彊應酬似可節省瞻望卿雲不勝馳系舍親處已發書往問尚無回報省城近日一毫通借也無株守甚困弟趕急卜宅營葬亡妻仍即北上緣晚年不靜萬事關心家鄉朋友寥寥不如京師樂也叔鴻在家亦未數見筠仙論下撫以挈張自牧為大過此則古今未聞之是非更甚於恭維申王矣專此敬頌台安不具令孫當更好學深思矣附問

致龔宗主

省吾仁兄先生閣下春明快聚每樂光儀雨雪載塗未陪郢唱江湖益遠風月相思靜妙常多文宗共仰以為傾企闔運於二月到家心緒索莫小兒女又須課讀日夕息息久疏謝函當荷照亮恩使忽出湘吏震驚但查辦例須令胡替人亦難



如意鄙意以省事為美如有才彥乃可更張孔子舉直錯枉今或舉枉錯枉則古  
今言吏治者多未之思耳湘省雨少穀價尚平憂時之士多言防潦游勇縱恣則  
士大夫不得辭咎鄙意欲自請保甲而措紳先生無可推者資年卑賤不敢出頭  
而斤斤孫卜豈不愧邪長日清齋默焉懷德專頌侍安並問邸福不具

致周主事

保三仁兄大人閣下廿年重晤雅誼彌敦恨隔形疑未能時過瀕行時到門辭謝  
又嫌促樾疇餞筵未便入談想能照亮也長沙梅濕正京邸延爽之時遙想高情  
定多愉快與循三月杪始到家外舅促令入都去住為難可勝太息帖搭之學一  
第為榮既得入官又須磨折壯年銷耗白髮心灰正途之誤人甚矣弟覓宅未諧  
還城株守仍為章句以遣朝昏秋後稍閒當至縣校刻新志戊子公車或有印本  
奉覽耳專肅申謝敬頌夏安惟照不具

與陳編脩

伯商世講姻仁兄侍者才名藉甚謗亦隨之及見乃知通人固不諧流俗也時論  
固自可畏胡文忠少多不檢及後才德遠勝曾文正但坐前不講學士不歸心以

此門生故吏無可觀者左文襄少跡弛於張後入軍機至為王耕虞所輕盛名遂敗李中堂無疵可指雖百疏詆為漢姦卒不能搖之此皆已事之明驗不問其中有無也少取清官當以謙和接物冀成德器文人名派草野無賴者所為尤當謹於對客耳尊公詩序尚未及作緣還家仍一事未辦心頗懊惱妻子不能相助此生遂無休歇奈何奈何梅生已至番禺蘭兄困於盤費未便助之況也永歎而已清暇念時相聞幸甚幸甚

致黃編脩

仲攷仁兄侍者酒樓話別歸客留思春雪送行還詩寄意想重黎已代達區區矣道路騫馳未遑授簡仲春抵里家事仍叢比及十旬猶如昨日想木天畫永土地花明良友勝游日增材德當今經濟果達為難能養真知實深企仰子培令弟於天津相見洵為僞上第卿周官之學尚未窺其涯略他日若成必付鈔刊謙雖美德於講學有妨晤時均求先致再當奉啟也闔運還家又補寫周易三卷稍有訓故鄉人士近欲並治尚書亦尚未暇應之蜀士歲有遠來者未說而樂何其幸耶老伯福祿彌增以為頌慰驛便促發致未肅牋先頌侍安餘俟續上

致郭主事

子恬仁兄大人閣下京華重見情款有加春海平流清塵忽隔想趨公敏慎退食雍容時有勝游彌增企引長沙自有保甲之議子容雨珊均駸駸追蹤文正旋聞蔣疏發難二使將臨倉卒偃旗深為可笑未知都中果有風聞邪抑賊人心虛也州縣但患不興作不患小駭擾因噎廢食如二張何北鄉劫盜實多然非官弁所能禁止賴一二鄉紳張其聲勢使人人皆如黃蘭丞俞鶴皋是增一官耳非用紳也二張雖亦官氣尚肯與百姓說話今已矣乎閩運買地未成仍居城內日有酬酢歲無俸脩秋後仍當出游耳

致羅總兵

笏臣仁兄總戎麾下夷陵上下屢望旌旗歸權稽留始通刺謁辱承顧訪兼荷珍詒西企柳營正逢蘭关清和整暇欽遲何如弟去臘還家怱怱改歲新春人事總集徒益塵煩湘上平安差可告慰耳水勇曹秉林因其行囊尚在宜昌不願留湘供役特求一函薦投麾下其餘自稱弟本家親戚來擾清聽者雖持有川中印文皆係假冒務求飭而去之則感激多多矣專此申謝敬頌台安並賀春祺不具

笏臣仁兄軍門麾下久睽旌旆每軫懷思王生來奉到惠書乃聞令子捐塵曷勝  
驚悼英年美德方冀大成遽爾蘭摧自闕家運但家婦殉烈名達天閭湘漢頌歌  
增榮善教所謂不幸之幸又非僅無傷曠懷也聞運於二月出都閉門過夏俟秋  
冬家事粗了再議遠游筆墨久疏未足贊揚貞媿輒寄二律聊慰慈憂同人若有  
和章再當寄上先此奉復敬頌勛安惟希雅照不具

笏臣老兄軍門麾下前閱邸抄欣聞恩遂孝思榮分二族歸宗衣錦列戟光閭因  
遣使遲致稽奉賀秋霜應節肅鎮清江遙望鈴轅曷勝欽企聞運成都小住俟又  
半年丁帥既無遷移諸生猶多攀止比聞媿屬定於八月上峽此時當過夷陵夙  
荷關垂知勞派護今遣哨弁奉謝即留待來船隨同標下紅船至萬縣登陸如或  
穉公新有調動務乞飭令來弁告知媿媿便於宜昌暫住以免往返之勞是所切  
禱專此奉懇敬頌勛安不宣

致張學臺

楚秋仁兄侍郎節下去歲京湘沸議波及輶車賢兄苦口之詞路人揣摩之論時  
移事異不必言矣翰林求賢起自曾潘叔平慕之遂成怪僻由無真識而好似龍

者也張謇文廷式無故成名南海小夫敢闕台鼎徒以危言激論聳動當時煙視媚行取容權貴觀其措意不離招搖撞騙之為特科得此輩何如取一二村學究猶為膽小志狹且中國學堂無萬數書院乃其大者徒改其名何益於事而孝達子玖欣然條程彼皆親見通人飫聞緒論隨風而靡豈非勢利之中人深與凡立身學道不必託於君父教士課吏節使之所得專而今日一奏明日一旨此其不能實事可知也因我弱而望人助界兩大而謀所事其為人役也必矣根本之不能端國是之未定而欲傾嗣同之熱血贊祖詒之奇謀至今紛紜是非不決豈非洪秀全之所謂妖者乎今之論者輒謂天下無才李少泉如此剛子良亦如此鹿滋軒如此譚文卿亦如此此非謂無才正謂唯我獨有才也推之則楚秋亦必自以為人材而閩運更無論矣如此是人人皆才彼俞虞仙德靜山者特恂謹不敢放言其實亦自以為才而謂人無才也求如翁之服康正不可得翁亦人傑矣哉而適以自殃其身是故求賢用才之說亦不可不慎也間嘗論之求賢用材截然兩事求賢者自知不足而將以為師則必舍己而聽之如齊桓之於管仲子皮之於孫僑堯之於舜又其大者也此後世之所必無即叔平亦必不肖今人可不必言

矣唯言用材又必己才而後可用人近者峴莊出關孝達問軍中有人材無余曰無也孝達曰君何厚誣數萬人余曰君冑伺候劉峴莊乎必不如峴莊而後甘為峴莊所統峴莊非材是以知之然則用材亦未易言也安分守己而已此則去年之議論真一夢也夢醒回思可以悟道道在自治安分守己而已閩運運氣最高去年電旨來詢時正聞四京卿入獄遂得陰消然恐懼實甚以時勢不可不懼也今又經年魂稍定矣乃始發摠所見以咨執事人使難逢適有舍親陳巡檢來請書于舍親丁藩台丁既故人之子當勸以嚴絕請託不可更干之陳即池洲之孫曾滌文女婿從子翰林名輩之後兼以忠節又係同鄉節下所宜拂拭也然學台無廣夏二間仍當託人則請為我告丁曰如此如此是必行矣以其家世破格補一缺不難此胡詠公張孝達能行之事但恐駭人酌委優差為託其人無佐雜習氣如丁未到任或節下自用為巡捕亦可或託文兄噓植之彼之親同鄉也太相縣隔故未託之近惟與文卿時有書往還江湖兩督幾乎誤國絕不通書矣閩運四子各得一孫晚景頗佳一梧不安靜省城風氣為之鼓盪已一年不入城鄉居甚樂也衡州聊以避世亦歲一來十月衡而兩月鄉學業雖未荒而久停日課

託云佚老相去至近不能度領差滿時或可相見再暢所言

春明度歲密邇清居屢荷招要慚無酬報出都以後日企飛黃大考猶遲四川未補益待朱明之長畫乃同紫久之連升揆券獲之開坊必矣湘中出使閣下背包幸有徐龍分其疑謗此輩不知自責但恨人言然打草驚蛇積薪熏鼠正不必引嫌卸咎耳閨運刻期旋里襜被看山事不從心尚無著落今謀三多橋一宅託賢長兄圖之亦尚未有端涯也閨夏暑蒸夜鐙揮汗郵人促發聊寄謝箋其所欲言俟之暇日文林益茂邸第增綏頌甚頌甚

### 與張生登壽

昨過縣奉訪蹤跡知當至衡還家得專使欣承嘉命謹即祇承合庚即問名也回庚則納吉矣下定為納徵報日為請期今者三族無虞霜降應節如可及歲敢請通詞周禮至今皆姻家主日弟不諳天官并乞代請吉諏示知遵行或省或衡以衡為消納徵親迎禮不稽旬至縣納徵造舟連湘迎女逆臻滿月回門當於年內冬清為善過年即令壻留女家亦不怱怱矣明歲當治科舉志於四方桃笑之時南中例雨斟酌早晚吾子職也敢俟申命以具禮文敬頌冬祺不一

昭潭一席夙所願從諸賢合謀允非汙好惟吳公兼席大有所贏二百石祿匪曰  
易致今驟奪之將何所賴且已募船山一之為甚逼人太甚天必厭之吳雖固辭  
我不可覬矧皆吾黨其可豫聞幸寄語楊周亟寢斯議如曰朱孫之意則前既舉  
之今不可廢必若吳因遠出大去無還以我承乏亦胡不可此片可與同人共閱  
諒俱以為然母曰館穀區區猶甚於乾餼失德且進退以禮不比舉棋聘書若來  
以此辭覆吳王實難軒輊幸再謀之徐李為幸

吾賢不中是大福也從此可以反本復古與沈山人齊名為湘綺樓吐氣主意雖  
多不可再生計較矣鄉居本為種田起見三次手書均唯恐無銀曾不言田今與  
公約以後切不可言錢錢者無用之貨太公以救荒金銀者外夷所用商賈以便  
輕齋正為農事之大害農舍耒耜士舍詩書乃汲汲於生財是不知本也起屋點  
工但覓飯喫何須用錢方桂仍令監工大事則聽指揮用錢則責方桂人主喜用  
近侍而嚴憚大臣今亦此意也吾弟但課農讀書勿與土木為緣可矣前借卅金  
即由楊家撥還外存七十金預備退佃以安頓弟家然但退佃不借本使知銀錢  
之艱難少說大話少打主意以期實用即救時之良藥生財之大道也令徒俱羈



廉在院倬夫亦率徒同住完夫亦必來功兒則大失望矣

致熊邛州

樹臣先生同年仁兄閣下有約同舟息息未待想賢能高翥大府惜才未遂暫還故不探候蜀都新政整肅上治可期共振頽風毋遽言止足也香濤以言事輒用簡堂乃以末疾遄歸彼此相補猶嗟弱一月卿涖任當覺裕如藩使頗復拔得奇士否北省近稍振作南省亦復改觀豈荆梁均當興運耶閩運於季冬三日始抵家園旋值寒雨涉旬便逼歲暮胸中所蘊積當行之事一不得據且俟明春方有定局再當奉報耳推命何時寄示幸告出處之宜時因郵便兼示蜀中事為望專肅恭謝敬頌台安祇賀年祺不具

致恆世兄

鎮如世仁弟閣下三歲歡游交情倍摯頻承惠待愧乏報投臨別錢筵殷勤周至雖多燒一鴨未足為累也春首時和行糜蕘事從容待闕按部趨班幸甚幸甚臘初還里歲暮懷人萬事勞心一籌莫展且須卧雪然後買山舍間餘倦平安差慰勤注湘藩新政公敏有勝前人錦水新聞幸以暇示賢兄得意堂上壽康至為企

頌專肅申謝敬問春祺

鎮如仁弟世大人閣下去歲奉手書欣聞三子登科循良燕翼歡忭無量即作賀箋而來使未及取書旋值兄處有長妾之喪料理歸裝辭館告哀紛紛半載遼闕報章復承示以金錦賜作添裝亦未答謝至交夙諒必不責其荒疏也至前用百金係奉還舊款縱令不提施報亦不宜齒及區區他日官有餘貲必蒙分潤斤斤計較反生分矣今又思得一策即作為賢從輩賀儀則百金而得四百金之用可以報銷矣兄於四月初一日安抵長沙過夏後便葬妾田莊單身北上擬於圓明園買屋三間以作棲隱家事盡付妻子不再問也四女留在成都舅姑均加愛重十一女亦留養督署三年後再當入蜀一了此緣茲遣丁探蕭子厚欠帳還否特令詣館請安

致蕭知縣

子厚仁兄閣下舟中得賜詩比即作復當知鄙意矣大才槃槃出言率易施之小人則太狎施之君子則不莊人銜次骨居之坦蕩雖亦足見雅度而被中傷多矣弟人微言輕諫不見聽方自媿悚何敢妄談因辱頻招謹以為報文心兄已有止

足之志歷任膏腴僅餘萬金善刀而藏近乎知恥湘中吏治漸整財物漸充較之前年似有起色閩運於嘉平三日旋里歲暮興悲雅欲自休復牽物役無善可頌安命而已使還息促附申深忱

致宋知縣

鉞卿仁兄侍者蜀游三載過從頻煩忝附相知未能薦達直以青萍見重舉而不先囊處有時不宜私請故也瀕行顯白歲內當已被選矣治譜家傳定符所望氣叟久病殆將不起治公居止相接朝夕扶持昨並得晤言老人神光猶旺來函並幃子已函交矣樾公新署辰沅城官遂無相識校經一席已定陶子珍編脩閩運明歲有思賢之館一年一千蜀謠成識生女更喜當亦不虛事皆前定信也臘初至家次日即還敝縣會妻母之葬還船阻風泊於鷓崖乘暇作蜀書百紙其有遺漏非因軒輊若逢相問為我謝之專謝饒筵故頌春福不宣

致莫總兵

搢卿仁兄軍門節下臨行奉上一啟諒入典籤冬孟告行復蒙派船護致緣途安穩實賴鴻施為費已多曷勝慙似西邊功奏蕃部綏和即賜彤弓顯酬丹節專聞

之寄豈俟稱揚惟聞銅政更新方資鎮攝勤勞之外未許優閒耳聞運冬首解維  
臘初登岸湘城靜謐親友平安左帥暫還曾彭得告鄉人尚稱興旺明歲郭筠丈  
推主思賢講席暫不能至蜀中良晤猶遙幸時通問來弁張書蕃差事勤慎仰希  
給與優差以酬勞苦專此申謝故頌春祺不具

致崇成綿

扶山方伯閣下三年奉德不陋芻蕘雙節敷榮共尊棠棣有略分言情之雅忘朱  
門蓬戶之分臨別瞻依賁儀稠疊百朋錫我知育才重士之心五兩歸帆詠星北  
雲多之句大藩方授小草先春引企輝儀重當旅見闔運儒賓久忝四荷嘉招教  
學徒勤一無成績蜀道雖易於平地家山難答夫移文昨獲允辭幸蒙庇順嘉平  
三日抵長沙因使附書先陳深悃東風入律續有嗣音敬頌年祺無任感企

致劉師耶

虛谷仁兄先生道席蜀都快聚獨闕延尊冬杪驪歌乃承賜餞反賓為主荷德增  
慚春信俄催燕閒多福遙瞻清塵彌憬欽懷閩運順江放船途中順利嘉平三日  
幸抵家門人事匆忙妻孥悲感固不及去年光景然鄉園多趣故舊經存比之客

處思哀又亦較勝湘中冬煊似蜀昨始稍得北風左相假歸五日即赴上元畫錦之榮有如洪經略會館行香之迅疾熒煌炫轉石火電光闔運歸來稍遲已不及面聊書新事以助雅談

致尚師耶

少海先生仁兄道席武擔看鏡屢過名園肴搗合罇頻陪盛會仍叨特饒祇益中慙江上春回庭前福滿從容兩府非少陵束縛之情頗養千齡無靖節婁空之歎羣推清暇益頌康娛闔運五十知非三年倦客還山有約虛期望於五男載酒雖來感秀苗之一瞬兼逢歲晚倍有塵勞遙企停雲深懷卧雪專此肅謝敬頌台安即賀年祺不具

致李知府

溘乎仁兄先生閣下金城游宴數接清塵帳飲殷勤兼蒙深眷傳言未寄告別多慚歲序俄遷春寒稍重想起居調協公望增新當倚才賢以熙庶績投閒之歎無悶高情也相省冬煊近始祈雪得雨鄉人興盛氣象彌昌闔運於臘初還家便值親友多故疲於酬應歲暮諸事難做隨眾奔忙無可告慰者亡子亦尚未葬尤增

煩擾俟改年部署稍定再當詳布先此奉謝敬頌台安並賀年祺

致李江安

佩蘭仁兄大人閣下旅泊棠隄因天晚未得脩謁乃蒙親停車益辱訪行舟岸險江昏徒勞瞻企復承惠致佳筍旅食餘甘紉感隆情長途增眷山川遼闊時序推遷倏值春回伏維多福想時和而政洽寫輿訟於琴聲引企超崇以為欣願弟提攜弱小經涉江沅冬孟挂帆臘初解纜三舟平順俱荷福星明歲當暫息塵勞料量家事令兄處時得通問再布所懷專此肅謝敬頌年喜

致唐帽頂

澤坡仁兄軍門節下三年欸聚厚愛先隆攜取如家求施不厭別時既承早饒又拜多珍瓊玖投難但歌永好耳新春受福四境同康節度從容仍開高會坐少一客時復相思聞運順水還湘將春入室家庭紛冗酬接疲勞亡子葬尚無期講舍已將起館命中少暇世上多緣遙羨清塵堪推整暇西雲可望良訊時傳專肅申謝敬頌雙安並賀年喜

致董川北

小樓先生兵備節下久奉清塵時深景慕乍違良誨益切眷思午節後辱昇瑤章  
重勞曲顧山川緬邈適甫卸夫征颿節序推移彌遠懷於鈴閣兼聞嘉禮喜溢趨  
庭尤為頌羨閨運獨抱韋編仍尋素簡愧徒增其歲月幸遙聽夫頌聲仰望芳儀  
俯慙蒲質

致黃親家

子壽仁兄親家先生侍者前奉八月中惠書敬承安福湘蜀公私政事彼此自聞  
雖隔江山未為離別比知筠公往滬樾岑巡鼎力臣入祠賢郎高等又聞煙館滋  
蔓擔夫爭道斗才解餉成翁席地可喜可愕何謂寂寥此間學業益隆後生可畏  
吾湘聖諭昌明之日即蜀中青出藍謝之光遠自他未敢讓也簡堂英銳逾昔  
忠純可敬輔以良友何愧胡曾西不留賢東為此匯惜矣閨運重至閉戶潛修打  
鼓堂餐乘輿宴會以為日課而已宗翰公兩院趙公雙符在手屬員數十薪水二  
千顏色敷腴其樂何極唯來書以為奉準留川則非事實新寄部費更煩一奏猶  
恐補繳銀兩則終身無官本家觀察何其善頌乎許曉黃麓各攜二萬金以歸閨  
運他日亦可挾十之一湘中自此多蜀財不令周封翁專美也大夫偉略已去經

邦九老高吟猶遲味韻在外忽冗實為可憾明年決還山居以惜分陰專此恭敬  
太親母太夫人福安並問雙禧

子壽仁兄親家侍席初冬見湘報賢子中式弟姪解首欣然而笑喜兩家之同喜  
也一當貢而不貢一不當革而奏革曹彭能持其權陳謝遂吐其氣此則為吾兩  
人之所能為矣功兒向不能文今年闈作居然成章又弟所私喜也堂上解顏諸  
孫雀怵斯乃兄之全福敬賀敬賀湘中多事揚州恐難安於位松不若龔龔不若  
崧以此知蜀之多材也李相廿四條張督廿四款遙遙相對皆法後餘波藏英通  
商富强基此昨請打密奏欲令不從中制懼未可得耳裁四撫撤兩駐藏皆煌煌  
大文胡詠文所謂把持者恭逢其盛不暇自留地步吾湘中恢詭之才除張力臣  
外遂不多見生不逢時又為慨然總之湖南有招山愛出百步大王闈運今擺落  
樊籠雲游四海好喜也好喜也十年前舊交唯樾岑書問不絕申夫之恨湘軍志  
較沅伯尤甚闈運復書云他日闈王殿下亦惟有俯伏認罪自投油鍋不知可平  
旦之氣否廿年前舊交則無間然闈運從此不與他人鬥氣此吾石門鄉中當亦  
麻惠連之語  
愛我者之所樂聞也冬春當入都再當有報冬菜今年旱潦傷敗俟明歲方有佳



者奉寄並以復命專頌侍福雙喜不具

致丁成綿

芥帆仁兄同年先生侍者錦城重見進德之猛突過胡潤之乃知大賢慧人不虛受波折以前日之才識加今茲之魄力清流求人物必當首推矣玉階足疾復發將居揚州從方子箴游龐三初政公明湘中大有起色左相欣然上任不知有何施設弟與之相去一日竟未見面諸人見者又無由窺測高深大要平庸守職耳對衆自言為家變所擠頗懷恐懼餘則頤指氣使自命第一濶人而已閩運於十二月初三日抵家途中安穩三船物無露潤但江柑藥柚十不留一養望之貓瀕行時走去所欲留贈花盆久待遣使搬去竟不見來已為諸生封作官物在船上得手書乃知小疾信一草一木之有主也貓其為薛雲階乎閩運明歲主講鹽學係商人作主與蜀中官運相反宜為恩童所許亡子尚須覓地此其母意故至今尚未歸土三年出游少者長幼者少誠有如張香濤封事所言者又當築室移居殊為累贅媿夫人尚在鄂渚邪一水盈盈兩邊費用恐非建昌永甯所能對付如有善策幸時相示蜀中遼遠相信尚捷以後有可報者弟輒飛達不必報書也

芥帆仁兄同年先生節下昨別怱怱辱承郊送謂當還城敘款旋以牽挽速行驚  
進長征便成萬里回瞻鈴下若隔聲塵春去難留夏長多憶清吟悵望當亦相思  
家鶴未來宗蓮大去八萬之數計亦贏矣天上玉堂一時難企暫還鄂息或亦當  
時然事會多遷公才已裕特超倫等亦非虛頌此則明者自定之但時扎報為幸  
錫侯泣湘如太阿出匣下莊之勇猶議避之湘吏自變汴以來習於頑頓才智識  
力迴出其下故上下頌聲翕然以此知蜀政之美繼自今者未必能及王英承伊  
初出茅廬亦如尊經新生未經陶鑄人才已竭君相尤難則不獨湘蜀然矣閩運  
於四月初到家因田莊未定暫難遠出請託干謁紛至沓來適成一無聊之局下  
生深居慙出消沮閉藏主人如此歸家將何所恃故北行不可已也傅浙生復有  
湘糧之望所謂慶封又富知吾輩當又窮矣醜裝尚可一歲否寶之嗇之秋初再  
得相聞先此奉謝

致許師耶

靜涵仁兄先生道席射棚文席頻奉清塵盛饒嘉筵渥承雅惠歸舟還望企引為  
勞東風報春西樓置酒談燕之暇時一相思幸甚幸甚閩運提挈妾女經歷灘湖

遙託吉星安旋敝邑湘城冬煖今尚著絛卒歲無衣可無漂烈米價亦不甚賤唯有大竊盜援一丈竹竿便可踰牆席捲之餘飽食油炒飯而去惜不得油炸城隍一治之耳歲首無事聊書所聞以供塵揮

### 致楊道臺

蓬海仁弟先生道席五月得四月手書欣若面對雲妻來時親詣弟夫人辭行並感疾吐茵而還來書謬言未別者欲為內助而反掩閨仁恐亦條律不能相恕也滇事得賢者調和必有協恭之美聞銅廠商人但欲不禁私銷似亦可行方今無所謂例闕究者畏事以例為藏身之固以破例為自便之圖鶴公當非其人蔭帥亦無此意何不憇憇試行之凡贊佐人者以聲名狼藉為不避嫌怨之實據季二等即由此起第欲持節則其時矣湖北候補如麻李小兄已下逐客之令豈可再往乎郭松已枯王鼎方盛天下事誠不可料比聞俄人將以游兵嚇左軍而走之英吉利為地山請命而黃竟體以為不可冬初必有怪局樞府無人良足嗟也采九吾之雙文久當明保因其佩服朗山致此遲滯俟沈公持節采鳳不復隨鴉矣閩運危坐冷氈形同熱客幸課督有效明歲可歸湘中並二館以待吾裴公據督

銷而作主將來首着盤中不患無鹽第如欲作校經堂生亦當奉調也賢從不待屬託惟無情無理之照應非老監司不能為之殊非閩運所能置喙不使饑餓則或可矣簡撫甚稱臬職此近年所僅有而絕無者以知湘潭人物不錯文格氣死何其小哉與循乃請本班則前日摺卷竟為何事今年吉士惟一王正孺耳六月着綿小感寒疾聊書所思惟安穩照察不具

蓬海仁弟先生侍席賢從來奉賜詞扇即欲繼和嫁女醫妾旦夕不遑黑官冷人時來相攬除在轎中無一刻自在居然一李仲雲為之啞然今乃心生一計進京投供云可選兵馬副揮伺候松筠舊友不亦說乎不亦樂乎翰仙幾得首道以在制臺前說官話超次用首府護理羣道歸咎馬子大清節悚動列城生平未見稞書不知有西廂紅樓閣運敬之愛之不覺內慙可謂純純老儒百僚之式也藏英通商軒然大波丁公本欲引去因此興高采烈笏山有護院之望亦不言去矣然有事總在明秋暫時難過倦口仍留成都李笏山舊例也紹曾指日高升遇此波折遂亦停頓官運年將信有時乎今年尚未把筆作一字無可寄者也不罵人也

不奉承人亦無可告者左文襄李文萃李文眉相繼登仙意欲討挽聯索性一副

也不做叫化子討飯莫同路討挽聯者亦然賢弟所見有佳者否恐欲尋張叔大之作不可得矣以死在議和以後也因便遣舟還家乘曉作一函奉問雙安不具

謝祝令

培棠仁兄刺史閣下辱奉惠書深承款曲政成期月頌溢雙江雖無脂潤之功喜有絃歌之效甘霖盡溥惠澤彌深幸甚幸甚聞運於去冬旋里三月還舟碌碌仍前無堪告語城中自黎公到任官氣稍各屏除能績既彰當膺卓薦預以告賀

謝黃夔州

澤臣先生侍講閣下前奉復書敬承虛佇文政兼美吐俗太和微惜遠麾末由仰挹彈指歲暮勞企如何巫山祠謬以意推果蒙鑒可謹以作銘系後待寄裁甄緣復有還湘之意將期面呈今竟不果東下又承許大令致聲索稿不揣荒拙輒令弟子鈔本呈候鑒定仍乞飭發丞長俾勒壁間亦雅化之一端也

謝彭兵

江州檇櫂勞車馬之光臨泉奉分廉助菜鮭於客設祇承厚意矧益離懷回望福星眷言湘路敬諭鴻川先生雄藩節度壽履頤和律轉春風聽飲音於樂職政成

吉月迎魏闕之新恩即慶熊轅遠占鶯語闔運扁舟出峽初臘還家米賤債稀屋  
寒人少幸新歸之且慰謀卒歲而仍嗟因使附書敬謝大惠祇頌春祺

謝孫道令

簾垂舊肆頻來駟蓋之榮帳設華筵仍費一金之直重施無報告別增慚敬諭仁  
兄慶集琴尊春回珂轡尋梅杜宅憶西湖橋雪之游調管京房占北極井星之瑞  
俱逢新喜遙頌佳安閨運一葉還家六花霏路江湖歲晚眇然舟楫之前風霧山  
深曾此棲吟之地客游雖倦嘉會可懷專肅申謝敬頌台安

謝唐徐

推雲仁兄同年閣下華陽設燕方共歡游錦水歸思忽催驪曲猥承盛饒再展隆  
次鶴情出峽瞻星迎春頌福新年多喜公府甄材竚望首推以符心頌闔運三年作客  
一舸還家經涉江湖蹉跎時序嘉平三日甫卸征帆人事紛紛尚無擺置亡子葬  
地猶待訪求思賢聘書已將敦迫有緣懊惱無命清閒所幸故里安和新藩公敏  
初春殘臘猶似承平李黼兄目疾已深僅與左侯一見筠老新移別宅意城亦建  
連甕李替郭興此為新事船還附啟不及詳情專申謝忱敬啟春福

謝方師耶

徐卿仁兄先生道席別時歡宴以思歸竟不暢飲過巴詢知賢子已還當復開懷命醕矣所寄一箱家丁三人共舉猶不能勝城中又新有大盜一夜竊七口箱唯用一竹竿縱登二丈牆先生之為累不小候取還時再當馳報耳然酒錢不比潤筆可葉子煙了之也弟歸家不見其妻詢知丁母憂而去家中匠役紛集為我起樓徘徊無所往步至郭侍郎處開口便問明年仍去否答言不去便云好極弟聞而喫驚豈招權納賄已有欽案派恩童耶久之乃是欲延主思賢一席昔之先生指腹定外孫之館今之先生館不落地書此相報為閣筆窮吐氣也人事息忙言多意禱容後續聞專此申謝敬頌雙祺不盡

謝羅知縣

蓮渠仁兄閣下西游錦水承光愛於賓鴻南泊銅官懷好音於乾鵲瞻雲道遠計日春來黃綬之官朱絃協治早傳新政以慰遐思閭運教學無成言歸守拙辱承張飲未報李投出峽平安還家冗迫湘城臘鼓感時序之遷流花市春棚憶燕間之歡會輒因還使手布謝忱敬頌春祺諸維朗察不具

謝鄭知縣

九州名士早傳置驛之風駟馬官橋仍值登車之日欣承求應許共游談訪舊情  
多懷新意愜敬維小軒仁兄先生槃才重展治譜恢張羣公驚注籍之年百政盡  
輕車之路益州錦樣雖新翻奇巧之花公府銀平咸倚判紛披之筆即酬勤勩以  
慰裴回閩運冬孟告歸清尊獲餞依江泛舸近臘看梅家園當饋歲之辰驛使送  
宜春之帖謹憑西使敬佈謝忱祇頌年祺不具

謝齊知府

敬翁先生同年仁兄閣下蜀游三歲居止接連齒錄無遺心交有契時承款曲每  
荷經存告別東還懷仁西美春洲俄綠府第延鴻侍膳蘭馨趨庭綵襲佩服榮出  
應節春和幸甚幸甚閩運於嘉平三日始至長沙家累紛紜年光迅速初無頭緒  
但有形勞回憶少城之游益羨壽觴之樂謹因還使恭叩春祺不備

致李藩臺

次青仁兄先生侍者去歲別後即聞梓里有歉乏之虞尋至用兵今春謠言尤甚  
靜鎮安撫遂已屹然所謂不動聲色措於磐石豈第下公蒙福而已佩甚佩甚二



唐齋粉棍法如神此後事已歸官不扶自直便可高卧天岳不入省城切要之言想智者能昭其所以然也閩運家居一載問舍無成近乃汎舟東游將之秦晉有舊攜蜀兵一人不能同往失伍經歲再補無聊藉隸珂鄉近在轂下指為揮霍當在不遺此人有曹交之容兼能伺候送茶傳帖不至失儀他日東山再起亦可備君家敏達執刀之選專遣走叩敬頌練安

去臘過夷陵即聞太夫人違和及侍養至孝之狀今正有蜀軍至長沙係珂鄉里民傳道慈躬大愈方深欣怵比自武岡還驚承遺訃頃讀啟狀悲仰曷勝孝事有終雖復節順然以人間難得之福驟失之於一旦其為深痛蓋較之鮮民百倍此又臨牋於邑自傷於終古者也焉敢為先生慰譬耶懿德難銘謹撰挽詞一聯不足以示縉者閩運家中喪病相繼今年不復出游亦半死之桐矣手肅奉慰巨孝不具

謝李和合

潤芝仁兄總戎麾下蜀都游客久誦賢聲湘水詩人夙同家學三年款曲九賜便蕃臨別餞筵又承旌送思仁江永頌福春來遙羨安和以慰欽企閩運臘初還里

人事息忙到家一宿便至鄉下經鴨婆隴感往年戰事兼想同功偶作四詩附呈  
清鑒並摭謝意敬頌雙喜

唁丁通判

伊兄仁兄太守旅次十一月杪從宮保處聞太夫人之喪曷勝驚惶高壽全終  
雖無遺恨遙念仁兄承歡侍養孝敬彌深獨奉還輜倍悲源本所冀勉崇禮節以  
副斯規聞運遠隔江關莫陳絮酒謹撰誄語一聯庶慰哀慕宮保起居康健時得  
相見並以附聞

致龍學士

芝生仁弟同年台坐別筵佳饌在路猶香小雪送行清寒悵望玉堂天上成連海  
中倏忽分張感何言矣歸期刻日幸及劉生寄聯得到於門牆來訊乃先於還客  
喜無大考免衣鉢之虛驚續有新聞疑彈章之實上清官成要閣學其來幸甚頌  
甚聞運空往空返不俗不僧稍減牢愁仍尋故業近又寫成周易三卷略有發明  
方督姪兒新注爾雅十二經皆有家本足與大監抗衡但苦煩囂未能精究耳聞  
夏清永敬頌同女餘值布不宣

前申奠敬尚闕弔書山川悠勞驛奔况悴比聞考貞成事請禮閑居幸抑賢哀以  
臻慈孝大兄奄逝傳重當門俱賴支維願加勤健也閩運於交游中連喪三良殊  
嗟獨活蜀游已久黔技將窮初冬決歸將移鄉僻益飽諳世味不能不倦耳匯東  
早去滋軒未來來赴宜由湘更寄並以奉復長夏梁陰冀勉自攝無任區區

與兩監院

臆翁仁兄先生講席比年共事渥荷優容取別息息未謀杯酒知我者必憐其冗  
迫也向臘人歸鱸堂事簡從容靜攝福壽彌康丹翁送考南竣東脩隆臆年饒臘  
肉當倍去冬尤羨尤羨閩運提攜弱小穩泛江流一月有餘征帆始卸至家之日  
延聘已來人少館多何其可矣校經堂已定請陶學使閩運便居鹽局一席官中  
又別有經課一館尚待高明院事得兩公主持必無荒情亡子葬地未定約俟明  
春其殯宮紅梅與海棠並開當得冥福知荷垂注附告瑣瑣專肅申謝敬頌春喜  
慶亭仁兄先生道席兩承賜問具仰深眷道遠未面悒快如何成都人來備言院  
事斟酌無微不至期永久惟退黜陳岳進用張生舉枉錯直民不服矣兩君親見其  
事莫能爭正豈別有微意欲使閩運聞風自退閉門思過耶否則黑白顛倒督學

不任過他日必反咎兩君矣張生以遠大自期其平日議趣固不屑屑於張孝達吳仲宣但不宜有顯遇使院生效尤降為附課使其自退固不礙其為偉人作窮官也今乃假書局以自進無辭愧之本心頑鈍至此深負所望闈運雖不復蜀游而與學使冰炭之心沒齒不忘願以此書示之張生使先評其曲直再集百士論其是非必若闈運所言之謬朱公所言之是則貴州可舉國而攻我豈張生一人之私忿哉若言有可采事非無因則張生終身不宜復言書院及考優貢之事此外富貴功名學問經濟及與闈運交情一切如故而朱公之陷於不知亦抑兩君之未能切諫必居小過正議直繩當播天下此近歲一大事不可不爭者也齋長附和亦為可怪士氣如此使人灰心尚何學之可講哉儒生迂直謹白所疑將俟回示乃後與朱切論也

致伍編脩

松翁仁兄先生道席杏壇密邇侍坐三春桂樹淹留思歸萬里朔風催別時雨懷人延跂音儀有如饑渴春回歲始道遠江深惟頌福崇以隆道訓高堂歡養有樂間居旨酒思柔共尊鄉老琴尊之暇金玉無遐闈運出峽平安還家悽惻殘冬景

短閉戶廬深憶良會於前年羨滿門之多福筠仙主講鄉塾強作替人明歲伊唔  
又更新士蠶絲未盡敢辭煮絡之勞繭紙纔鋪莫寫纏綿之意輒因還使聊布謝  
忱

上錢閣學

夫子大人函丈前年冬初因汪君奉諭作復亮陳道監去歲館蜀靡有甯時今春  
聞仍典春官再師胄監道躬萬福望宿聲高坐閱浮沈斯為大隱海冰將合沸議  
無驚詠京華歲暮之詩想儒館盍簪之慶自愧杜陵之卻憶尤深馬帳之歸仁驥  
首朔風心其翩矣朝多新進事有危疑清而不要之官天所以優賢哲闈運年行  
五十名廁三千庶以清貧仰希沆瀣然旅食猶裕卽費殊艱敬奉微資與黃生合  
為消寒之數非敢為獻聊以將誠蜀中英俊頗多商量較易惟將家不易未能久  
留明冬決還有早無遲也此來攜一子四女家中留三子二女自領一妾婦率兩  
婦在家游資不能寄歸家用竟無所減為一已計不如歸也吾師頗知有老宿冒  
遠方來教者否不獨蜀中虛席湘上亦新立校經堂方謀名師闈運方欲從學庶  
幾所亡餘容賡言

致穆師耶

芸閣仁兄先生道席成都聚會雅照殷拳臨別饒飴隆儀稠疊受非所望好永勿  
讓敬想興居惟祝綏福闔運於初冬解纜臘首到家幸託星臨俱臻平善仲子葬  
地未卜迫欲移鄉時屆殘年惟多喧擾不識明歲能少休閒否左相已去涂撫未  
來湘城尚無新政惟盜竊頗甚天氣大煇今年尚未皮衣小有疾病弟已受思賢  
講席之聘不成書院規模尚可藏拙郭筠老必欲移交故不能辭也錦城風氣喧  
囂皆由當道諸公狃於故習督部初政尚威近頗多假借似不相宜此在贊佐者  
之善為將伯耳

與曠優貢

鳳岡仁兄大人閣下得惠書循誦歡喜今春還館聞遠試權局自恨薦賢之不用  
故不復通問猶以為旦夕當還也遲遲又久乃聞所言不聽反移他去今日官廳  
議論又以前上稟牘為鄂生所紅勒以為喜笑其果有此舉以裁成大材如漢文  
之於賈生邪則鄂生非其人也傳之之誣邪則噲等不可為伍也三篇六比文得  
官何足愛惜不如投劾歸去從吾所好養其浩然以待大用蓋仁兄之質地近於

古循吏若姑與委蛇必至兩無所成且事有弄假成真者即不能有剛毅之實而為剛毅之行亦足以增長魄力開拓心胸一遷再遷甚無謂也蜀中吏治委靡鮮有豎脊疆項之吏闔運所為深發憤者也今督府之待闔運不能不為羈留此外羣賢俟督府去而將加白眼雖復巧言令色足恭脅肩終亦不能守此千四百金之富貴唯有一切不理高視闊步而已又可笑也與循遲遲得一第誤歸本班更不如捐班之資深夏觀察語大不對題麗生差強人意然其人為家變所賞蓋亦脂韋之士如張孝達非不卓卓而能在總署優游皆不足為直人此等正當如英吉利法以棒敲其紅頂豈可一日與游乎若有書致譚幸為我告之今年不作東游相見計隔歲矣天寒伏惟珍重

致許師耶

仲笏仁兄先生道席錦城盛饒節府雅談餘韻旋聞歸舟已發想詩棋之暇豫有杜少之風流一忙一閒何能不羨左督馳赴新任蘇撫乞休梓里新章又當改換淮軍月餉懼必不支近日申報復以最不配服李中堂之衛靜瀾充補簡公一席關懷大計者何以策之闔運於臘初抵家非復前年歡會因思節樓賓客亦當追

憶季懷至於龍鐙音尊比皆當密靜春盤生菜正賴阿杜少慰寂寥耳天道貞元復當開熱他時良晤可為滿引一觥也手肅申謝即頌道安

致王編脩

正孺仁兄侍者奉別十二年同城半載僅得五六相見傾倒之懷未盡百一然友朋離別不過相望音儀耳若學業搢術切瑳觀摩無煩晤對此後再十二年一見猶為數也老伯賜餞賜金當脩牋謹謝既念公政總集披覽為勞又當煩長者作答謹因鯉對時為啟下忱過節交還宜縱談時事奈此處新聞書到時已成舊話又無可采即亦不贅所屬者老人告歸得請可先相報較卹鈔為捷也閩運今年還家有悲無樂做省經席已請陶子珍尚有一席係郭侍郎遺缺當王姓頂補者便以見屬家夔石先既不辭閩運亦學左相謝恩拜命矣風便書來在省城為易達餘俟續聞

湘還奉手書寄到連贈立軸伏承移居城中廣大清閒錫蠟之居牆壁錦繡澎侯馬廐今館賢人甚盛甚勝又於春杪見鈔登兩疏論尚書者典雅明通為我朝僅見之作論公費者陳義甚高自許甚至然於正義尚少發揮究嫌喧賓奪主宜將



辨法多敘二三十句雖敷衍不妨也孝達登朝將盡摠所蘊以經營八表吾弟觀之助之規之勸之贊之揚之當有相得莫逆者不可效王荊公故人以宰相疏之也垂老之年復逢事變患之惄然自傷然昔賴諸賢宣力於疆場今望羣公制勝於尊俎英英袞袞皆吾友朋附驥尾而青雲馳椒北而止息則非已所能自卜矣書籍只有此數舊藏大家今則童生武官動知經子書目無須於問答徵求輒見之公文益少益昂自然之理亦無雍乾之世布粟流通咸同以來金銀滿地益富益貧分合多寡之數也閭運初欲樞衣於西東二撫略獻芻蕘以盡平生交誼乃為西道所誑因循至今忽聞婦病倉皇馳還兩月復返仍居舊館並無課讀閱卷之意亦無修金節禮之心主人朝移則賤生晨去天下事大類若此亦可傷悼至於日課月程尚有左相一息尚存之志亦不至全負所期耳暮氣頽唐頗悔收藏之陋字畫真贋雜糅贗者或亦亂真倘有廠店之游見有隆萬以前畫軸及時手著色卉鳥鮮活者價在十兩以下為我陸續致數百千軸十兩以上雖寄贈必辭也此事當優而游之斷非公車所能辦翰林名實正在此耳夏日正長木天多暇惟為道自愛不宣

致張臬臺

子衡先生仁兄司使臺下前年賀全福來具述起居並言將購藏經書屬訪時價  
比附一詩上問餐憶詩曰不見瓶公二十年近來新句萬人傳名花開落皆春已  
匹馬東西作戰仙金印拋將滄海去玉琴閒憶北窗眠似聞  
詩味酸鹹外那用將鹽著口邊以後鹽訟大興左師敗績全福遠賜郵筒莫達竊計必有報章與  
三百新票俱空矣昨得手書並見賜大集未得拙詩也全福荒唐乃至此乎然心  
心相應具有感乎何待遠引果臣以證知己三月三日春陰霽然午坐小樓讀畢  
一過賤名乃在味根錄中又莞然東望想見爾時談燕如夢中也鞞鼓笙歌皆已  
岑寂唯餘宿齒七八人何論富貴功名學問但得結屋鄰居雞黍互過再二三十  
年足了此生而諸公尚各放光明乾沒不已閨運亦隨俗浮沉不遂倡導之願公  
其有意歸乎徵費四方除茅二澗真不患無鹽也長沙城居煩擾買山未就方且  
將游三輔仍館成都一二歲間再當還隱計彼時左彭衰矣托末契於後生何必  
老而為客招隱不如反招隱他日相見快論其懷十餘年不通書輒先布意敬問  
侍安不具

致錦兵備

芝山先生仁兄節下到館息宥尚未脩牋頃奉賜書欣承安吉今年海關稅減商賈蕭條台端極力振除得資源濟當道諸公均謂因難見巧秋冬必有大旺以副蓋懷也和局為庚子以來未有之榮夷情已可概見而內外諸公不探其理張皇卻顧正墮計中藩使痛哭於廷制軍聊以行國忠憤之氣鬱在坤維他日當有效見時乎芥帆始抵箭鏹其事易了前委二件通判已奉檄會丞尚無報也女份到即大病昨始全愈舍弟仰荷札委俟告之大府悉依指揮耳小坡暫支荒月遺缺當即馳來既有家蓮之例私話可作官話定可過冬矣禔雲昨始到省子實亦已固位沈朗山燒去官囊未了官事詔山獨為笏擊奪其千金以與周崔次民祥人皆有起色伯楷聞有出使之選未知誰所舉也張月公以起解鄂生風行雷厲此間頗怪之交情頓盡惟閩運未隨衆罵之公事難於認真台端久經閱歷當為一歎廣督為晉撫所得今年局面似無更移秋後即當迎致妾女安排過年殊非意料所及恃有東道屢煩免單無亦稅絀之一端耶驟暑新涼手書叩安並頌頌福不具

芝生仁兄先生兵備節下三年厚眷非謝所宣兩次傳贐私衷悚仄既不能效會

文正十分取一又不能學左李高長跪受金斟酌勞神反抱怨仁恩之非知己耳  
投桃報李今年別有反璧之時也月公涖任交替得人暇豫春游定多福喜甚頌  
甚幸聞運於臘月初三到省左相已於先日由陸登舟一見無緣殊未償廿年離  
債唯聞其據鞍矍鑠猛氣凌厲尚無異往時曾伯亦暫還湘鄉彭公尚留衡陽明  
春始有勝會耳龐藩新政公敏湘吏欣然涂公不日到官必多黜陟聞運到日即  
受思賢講席之聘館穀千金固不待言所懼者生徒不及蜀中精神或為浪費果  
就與否尚待參詳亡子先歸其母慎於葬地至今不能入土聞運亦不便促之餘  
有三兒七女幸俱頑健唯說說螫螫蝸居所不能容則當移一大宅尤勞求問弟  
向不理家今失次兒諸事皆須自營以拙妻悲感悉謝世緣家事無人可託也念  
此仍有遠游之志大家撒手仁兄能無哂而憐之否船還事冗手肅奉謝

致陳進士

竝唐仁兄大人台席前得手書猥承謙謝布帆偶落兼荷勤詢具仰高情無任慙  
荷船山解館遂反山莊心緒未康致未入府前歲承香帥念舊歲損齋餘比即作  
書謹辭適逢交替峴公飭送如約嫌於厚張輕劉故未敢卻之卻之自蹈不恭之

愆今已逾三年拜賜多矣國事可憂何暇及私尚希代致款忱獨此間款閤運非  
矯廉之士諸公有過惠之情原函鈔呈庶知本志若實甫核減之說方將據案而  
爭豈有營情巨筆而敢輕鍾祿請領今年而辭來歲酌爵之局或病或彈當復闌  
珊亦可歎也省城歲盡公私寥落江南除夕冠蓋如雲仁兄何去何從幸以報我  
明正晴煖或當入城訪朱字田詢其虧空便可仍陪雅宴也專此奉達敬叩歲安

湘綺樓箋啟卷第五終

湘綺樓箋啟卷六目錄

長沙湘潭王闈運字壬父著

許篤齋一啟

魏槃阿一啟

趙伯璋一啟

常晴生一啟

惠師僑一啟

吳董清一啟

劉峴莊四啟

劉采九一啟

爽召南一啟

孔楷階一啟

葉煥彬一啟

胡翔清一啟

譚鏡清一啟

劉鏡清一啟

廖孫咳一啟

張雨珊一啟

馬話山一條

夏子新一啟

陳復心二啟

楊彥規一啟

李仲山一啟

陳小石二啟

李勉林三啟

張子虞一啟

席沆生一啟

曹東瀛一啟

曾仲伯一啟

張登秋一啟  
瞿子政一啟

陳六笙二啟

朱曼伯一啟

但少村二啟

俞虞軒三啟

趙次山二啟

譚芝耘一啟

裴少岑一啟

龍驗仙二啟

端午樵一啟

黃花農一啟

陳完夫二啟

楊兆僊一啟

夏午詒一啟

湘綺樓箋啟

卷八 目錄

二



夏叔軒二啟

沈夢谿一啟

趙晴帆一啟

秦子質一啟

王子常一啟

程岷樵六啟

伍編修一啟

劉端亮一啟

湘綺樓箋啟卷第六

長沙湘潭王闈運字士父著

與許生

前得書欣知慈躬康全聞當重來因未作復昨得信知定留侍甚善甚善讀書日長事親日少震之言是也歸有餘師但以不能朝夕為悵悵耳火食之說以拒虹田之徒若篤齋者方當分吾盤飧用獎勤劬尊公厚意猶以常典見侍者也因使附還乞為代達入伏未事所作俟秋涼諸生去盡乃當詳覈吾賢學行俱可大成惟濡染稍深於諸儒說猶暗有牽掣要當一求經證以廓胸襟乃後參以眾家示不專輒徇名之意最難掃除舉世非之哀之於聖斯乃區區之志也嚆矢而已道在則何敢言此頌侍安

致魏同知

槃阿長兄先生侍者二紀重逢八旬歡聚故情彌重新別旋悽得手書相念拳拳即知鄙悰之尤戀也臘遲寒淺年度春回吳門勝游更增遙憶闈運於冬至前抵長沙室如懸磬幸啟縣志館致送千緡隨手開除一日而畢假不留吳則此項早

歸鳥有天留錢樹人挽小車公有同馬可為一喙途中得詩一篇酬葉臨公錄請  
代致又附拙著三種與鄭君共觀之湘中民慶有秋人家康樂莊田多種營室可  
成明歲當在山版築鄉居差供饋粥妻子付之敝屣此則老兄未能耳邵去鹿來  
猶吾夔子譚興張廢翹足可期讀律諸公行亦倦矣徒供談柄何損雅懷江梅正  
花伏惟繇福不具

與趙同知

伯璋仁兄先生台席吳門快晤傾企風裁湘水邁歸邊瞻汪度過從稠密游宴豐  
勤愧乏酬儀但歌永好別後看吳鈔尚未見上游借重徽商息重楚客貂輕船到  
橋邊唾其笑矣閩運於十一月廿日抵長沙未久卽還敝縣商度山居臘底始仍  
還省債家紛集今年僅償其半已費經營明歲決計入山誅茅結屋吳游煩費津  
館塵器閉戶守貧庶無大悔家鄉豐稔穀價復昂敝莊欣欣大有起色此則苦中  
之一樂耳書此申謝敬頌年祺

致常知縣

晴生仁弟親家台席八月得京邸書旋聞榮到以相見在近故未作答九月過省

功兒乃欲北行以其少長鄉園宜觀上國因留照料遂因長沙九弟來詢知近佳  
並得委任圭璋特達公道益彰濁世雖禁亦有名義功兒昨見按察已述鄙意督  
府則未知見否要俟請求也半百雖輕正不易得非先公清節藩臺厚意何以致  
此但孤忠被謗當有特恩錄其子孫不從凡例今年歲暮不宜更煩竿牘明春必  
為作文上之督撫以申私意故帥必留督蜀新撫雖無交情可因制臺轉達也初  
到官廳忌妒者多以緘默敬慎為主恐弟尚有見才之意與俗官齟齬特以此告  
不作書亦此意也藩臬督撫時有齟齬屬員必不可代之分黨摠之大人恩典巴  
結差使之不遑斯乃候補祕訣耳書院偶有兒童戲劇皆已正辦所以辭館者以  
讀書不甚認真脩金又不敷用兩無所益非與道臺及諸門人鬧皮氣也閩運生  
平自視甚重以為自恭醕以下皆敬我者必不與人計較來書云云猶秀才習氣  
非公子及太耶所宜也承賜八女添裝適已還東未敢仍留旬用二表謹存鏡奩  
仍交夫人代收俟八女明年過鄂便以賜之閩運今冬尚未知所適或至鄂或還  
山視天氣為定明春三月仍至東洲收束脩近又欲別開一局亦懶未暇諸女則  
避盜入城不必再至衡矣夫人至省寒雨纏綿未能迎款為歉專此復謝卽頌邸

福新喜

致惠同知

師僑仁兄大人閣下蘇臺重上新雨得朋文酒之游尤欽雅度別後總禱人事未暇修箋亦以酬酢處鯨若以例通謝反孤雅眷因循半載無日不瞻憶清輝也想捕務整飭水利流通州郡需材當復借重然仁兄兩司材也屈於閒官終當特達幸無亟歎塵魚矣小坡屬校廣韻已畢彼既入都有登科之望當俟揭曉後寄萬全已歸去不並求代致閩運還山暫得消息恐後有相尋者仍須出游以避之久慕嵩華思一游眺夏秋間或西北行耳專此奉問敬頌台安

復吳同知

避道清揚未申款曲荆沙發軫涕潔聞驚幸得邁歸實深危悚前得來信重荷寵存作復稽遲亮昭欽企秋清木落峽口多奇山水銜知琴尊多逸幸甚幸甚閩運暫游幾困閉戶息心一事無成五嶽遼遠唯有老懶以作優游羣公居得為之地一籌莫展想登廣武以憶蘇門高興所期願以時示

致劉制臺

峴莊先生侍郎節下伏處湘瀕聞高名舊矣榮晦異趣末由相逢今秋在江淮滌  
丈盛言節下之美以為不可不見至南昌霞軒亦云然然聞運客游九州寡於介  
紹轅門尊嚴恐適傷賢侯下士之名故不敢徑詣也鏡海深蒙知賞亦言不可輕  
干空懷慕仰失之夾轂甚歉甚歉方今時政因循兵氣未靖士女游惰侈靡日增  
吾鄉伏莽尤多江漢殆無復綱紀聞有能政如節下者雖在山海猶思自結况異  
苔同岑交榆映社者乎他日緣會終當抵掌華軒先此道意以代踵門想宏遠攬  
恕其率爾敬頌台安不具

正月十日奉惠書並賜銀五十循誦祇領竊尋碩論彌深欣仰度領人士傳頌咸  
仁互市賈胡無復驕肆蓋由內政之先理故覺游刃之有餘益知張皇夷務即不  
知治本安得入贊密勿為國宣威俾當代識有轉機乎又聞兼筦稅司使金如粟  
脂膏不潤溥利無疆吏士歡顏單寒有賴絲蠻歌其教載衿佩喜於嗣音德化和  
平嘉徵有子明公公勤積累早應鍾延而必待海嶠之謳歌乃適乎斯干之頌祝  
此可見天之施福亦待時以成美談也凡在鄉閭無不欣喜聞運衡陽充隱山潦  
為災移家省城已無故宅買山難俟卜宅城中雖得三椽仍謀田舍軍志近始初

稿大約冬杪可成其意不在表戰功而在敘治亂得失之所由節下鴻籌所及雖未施行者不妨相示非欲聞斬級禽渠之功也劉陽任雨田編修溫飭佃僮尤敦內行告歸侍養家計頗艱王巡撫僅能歲致百金此外如釐局鹺綱又非所樂早年南海為陸賈輕齎近則蟻蒸腐來無復綱紀因聞新政整飭流品分明義之十萬之牋延賞人船之贈古有其例亦視其人銜玉誠難薦士為上用特介之左右節下其能修雍乾之故事邪專肅通臆故達謝忱

奉別經年側聞敷政每與陳俊臣歎息以為今多暮氣如得明公同志一二人砥柱方州其功更在勦亂之右竊喜精力彌滿福壽無涯江介重游歸仁有日方期之十年後耳聞運蒸陽重寓居然老宿此邦人士新築小樓俾攜小兒女孫輩同居藉作休佚之地既感其意誼當復少留自計生平無少欠缺惟少更世難多識英奇事變時移公卿方以軍功為虛誕有宿將老兵說士劍客或及身漂泊或身後荒寒說項既不見憐分米又無其力近歲海關鹽局皆勢要請託錦上添花二紀之間未嘗染指恭逢明公大登斯路通飭查覈想已洞照夫冗食者既在所裁則廉退者宜蒙獎厲值公道章明之日有披雲自訴之途敢將應予矜恤者開單

呈覽伏乞指撝總辦一一量材武安除吏盡漢武乃得除吏此亦漢學之淵源湘州之佳話也此外有二武人一係閻運堂弟曾從武慎公卅年晚得雲南武定參將從武慎復歸乃樸山之舊部劉武壯之本管官也耳聲家貧安靜自守晨夕耕作不免饑寒其一蘇文藻乃駱文忠親兵人甚明白謹慎粗堪驅策今遣叩謁伏冀垂念舊勛恤其儲胥於營局中任賞一差俾終溫飽斯皆田子方之所以報文侯非閻運一身之事也雅道久微古風不復左李猶難語此他賢益復可知非遇閱規末由披寫仰鑒與否誠不敢知韓退之所云試一鳴號耳又閻運外甥曾紀元略涉多通人甚懶散一衿窮困亦屢為海上之游如幕府需人似可備數並去年所薦胡子夷均几案之材也湘中近歲章句詞章之士實勝往時而楨榦之材益寡閻運與後秀諸生講求堅苦均無能信從者此則謀生路闊進取途多世極繁華斯人趨自困非復絲薄所能挽回而明公居高位握重權但可推波而送舟不能反奢而示儉此又時局之所由成風氣之莫能轉者矣因感據情伏惟鑒照不具

甲午以後遂不通書以公責重任大閻運湘潭話多未宜費也春雨閉門忽有軍



將來見出武陵劉采九先生書言周鎮習熟戎行薦與俞中丞而不用謀所以位置之闔運因告以偃武修和舊事莫提之義疑信參半以為託詞也客去思之方今王中堂張制臺不喜湘軍可矣若闔運志湘軍者也竊聞田子方之語越句踐之事親見其大將軍告身不博一醉亦為寒心方今能收恤舊將者明公一人而已江南地大物博一頭指收此一人不難再來再收視其無用而決斥之殊不必如聶仲芳未及下車而驅逐同鄉用是不揣冒昧依昔年薦鹽局之例再奉書以干執事亦藉以達姓名於左右知自疏之無他或冀勤政之餘發一軒渠等諸敬新磨羅衣輕之流斯野人之獻芹矣專頌福安不具

### 復劉山長

采九仁兄先生同年道席瀕行一面詫為前緣驚豔開齋莫能喻也周將來又奉手簡重有所託怪其諄諄不似四兩八行之例方今天子重和羣臣諱武昔之良將皆願與九夷執鞭我輩老儒尚何沾溉來書雖不得已毋乃非佚老之道乎既蒙推愛謹即破例與書劉太保併封呈覽視其有益與否抑臣更有請者似此等武官湖南以萬計天下以巨萬計一人有慶兆民賴之公固擠破門我亦寫脫手

欲其不來除非不行祝其不行而又為寫信亦是左邱明之所恥如此在我恨兄  
兄復誰恨又不得不歸咎於老滌也兄幸以翰林改官文武不相統轄何故而生  
此事耶若弟之聲名狼籍樹大招風自愧無能不作督撫逆來順受唯唯聽命而  
已想久不聞城南童言書此代面

致爽道臺

邵南仁兄世先生侍者去歲得沙頭手書拳拳之情悲憤之意循誦感歎幸承尊  
公起居相與欣慰和議數衍當可還京令弟已移官否久不看朝報一年事尚未  
知也衡前手書來乃知筦艇江漢以蕭散之襟懷值飄零之身世惟藉差遣日殊  
非所望時事已無可言老遜山中未知免否題襟載酒其樂難追惟不向賈胡磨  
牙差為健耳衡陽馬生名士之子以貧世其家流落武昌為覓菴館未收十斛麥  
遂已娶婦坐此困累失業無歸台端局面久定想無隙處或有數金司事閒散筆  
札俾得餬口亦雅度所樂聞也因彼求書遂得通問今年復還蒸上頑癡如故秋  
清桂香伏惟調適不具

致孔編修葉吏部

楷階  
煥彬仁兄侍者心田再集新學遂灾狀頭喪元李帥入獄吁可駭也然不揣其本  
而淫刑以逞人知懼矣其能久乎維持省城惟在居者祭酒滇道一光一黯皆非  
蘭亭所故暗中補助其在兩君凡與官語切須簡要與官往來最忌往見聞近又  
延至周俞意在大捐此則又可不與要之城多岐而皆喜自結湖南專跋扈之  
名廿年矣有一澹臺乎盡陽鱗耳以逢迎為跋扈乃湘吏推諉之詞非實事也能  
庶常聞又被指名其父甚懼罪不相及乃周典也父為子隱又孔經也彼來問計吾  
無以策之今就兩君而謀焉未知已來謁否總之陳撫臺害人未必非湘人之過  
熊所言開大學堂張王有力焉淡言微中而怨愈深方今曠蕩之時各宜釋怨不  
宜攻擊祭酒已無成心牽連老熊是何人也望進而解之專此條程故頌秋祺不  
具

致胡大令

翔清仁兄大人台席秋初在省適從者已旋衡館相去一日無緣復覲聞榮任有  
時不出季冬從容陪宴未卜何方遙企清塵以為悵憶前委作神誥謹以擬成茲  
遣族子代偉齋呈鑒定此子舊習書算頗稱善賈時事艱窘失業多年欲改從局

差第未便為之干乞貴局雖人員濟濟尚係大夏可依如留派錢房當能勤幹或司事有缺由台端稟委尤為感荷潤筆一差本督撫舊例仁兄指顧超遷敢先以為賀如萬難位置或於衡府商店先覓羈棲以待俟補總期無空返耳專此敬頌冬祺並叩邸福不具

致譚大令

震青仁兄大人閣下前得手緘尚未奉復緣子獻約過後遂不來也臘暖春回伏惟侍奉萬福政紀旁施為頌此間自琴從去後無日不思蓬公尤甚於部民知公佐敷之效也閩運明正遣嫁第九女二月當往河南觀場一了家國之恨京城不可去可去亦不去矣小兒被舉特科亦令其往試不從政以今政無可為也尊公頤養益勝但小縣未必供甘旨方愧無以助養乃承嘉貺益以不安明日送竈家人均作饅餌來使促發輒書兩紙怱怱可笑伏維安鑒兼叩年喜不具

致劉大令

鏡清仁兄明府閣下去歲賢子送到手教具承存問頃讀來諭猥蒙賜壽嘉詞駘驛慰獎勤拳敬謝敬謝量移借重皆采循聲為缺擇人上游專政局外無從置喙

致負遠期方伯故人之子義當規以廉公若及私情是負亡友前曾薦賢譚許以兩公皆不能無私假私濟公尚無傷雅今茲調劑非彼徇情有負垂青方深愧赤隆儀二百何所取焉謹以原封退還來手贖子及王生所留聯幅暇已塗鴉附件荒函希為轉付順頌台安不具

致廖典籍

孫咳仁兄先生道席昨使來適有稀客未能作答來札甚謙意甚厚惜引喻失議耳豚肩之賜以擬換羊書蘇黃年輩略相當奈何欲拜門乎交莛秋蔬比韭花之佐肥粒恨拙筆不及楊少師然皆詩料也第詩不苟作酬方家尤難興到會有報與壽酒皆遵命展至九十月唐侯當不作裕公也廿四日有郡館之要會當相見日內童僕盡出竟不能出游此簡命船夫走走送用違其才亦當賦舟人之子耶送炭船來奉手教洋洋乎洋洋焉知王介甫之非以去要君為鬼怪輩害事也功成身退自然之道龜山蔽之斧柯奈何午後兵備來談言及唐劉佩服之誠方以不得大用為恨公論自在私意將不得申闔運亦隨風轉舵又附于在外言外之例知去就理多端也且如公去則明年送炭又靠何人然則為國求賢公私兩利

孰若附和一人徒增林下一詩酒朋乎恐公以買炭虧空為名輒送卅六元交五世兄以清前款黃色人不肯杜後患糧課又來日內正與聖賢相對此百五十石消得著也涼秋始還其期甚遠張制軍有巡江之議進退維谷竊恐公亦拜巡卅之命則奪我鳳池而仍棲枳棘又洋人所不料耳專復申謝即頌近福不具

致張孝廉

雨珊仁兄先生台席再謫衡陽又觀綠火幸託清吉坐賞高秋每念城游且欣且懼側聞經畫克饜羣心但免訪聞即稱雅正幸甚幸甚衡州舊有長郡會館兄想亦早知因地太偏以多方恢拓財力不給久議無成今生意稍興客游稱盛始發捐簿廣募集貲大要仿古什一之法量力攸助弟亦書捐五十元則他可知矣貴和豐公司分在衡州者獨為興旺每歲可出入二萬金以外例捐二百金王者以老總為辭必須請示能游五侯門者獨有闡運特此呈送捐簿務乞書捐二百金發交分店功德無量所有好處弟序啟已詳無庸贅敘也專此恭頌近安不具

致馬生

用度浩鉅專靠出費風雲雷雨一信百金久出筆單而令叔以瘦鴨換之故為難

也既承居間今送上爽書一函兼示其意後帳免言不誤主顧亦吾賢所宜知也

致夏觀察

子新先生大公祖節下奉別後旋聞榮命未及箋賀亦以解館在即擬親詣轅在  
再旬時遂至歲暮伏想釋煩居簡綏福迎春新使方畏人言或仍借使君為重耳  
闈運往歲必還省度歲今以故鄉新起樹藝局暫留照料不獲入府同縣萬生前  
因余太華轉求忤懔屢諾轉啟見時或又忘之萬生朝夕難支闈運因循歲月檢  
點年債此亦大端用是特介一函俾其面叩尚冀假之盈尺以恤孤寒專此仰干  
並賀歲喜

朱明盛長方歌南鎮之功青使宣傳復備東階之賜捧瓊增重結軫增懷故諗子  
新先生大公祖靜肅民譌恢闕國政撫孫盧如赤子益智無涯贊湘郢之謨辰揚  
仁更遠企瞻帝日定協凱風闈運招屈有心和陶空作樓船望海敢言競渡之能  
角黍登盤竊慕含飴之樂徒牽冗俗未遂樞趨輒附來鴻聊隨燕賀敬頌午祺並  
申謝悃

去臘承賜年費禮當恭繳因戒行在即恐勞諭留祇領不辭祇深愧荷新春事定

百度咸宜重惠來章藉諗多福閨運濫設舉比修逾十載正當歸老適遇貴臨方  
幸賓主之歡重續棣華之好緣三女皆已長成方當議昏久客衡陽便成耽閣兼  
年已七十精力不支乞假還山事非得已講席已薦代者首士想必啟聞月課甄  
別例係專主課卷甚少一目了然如其擬題啟門徒程載傳陳完夫均可代擬謹  
先繳關帖以免縣待餘俟續上先此奉復敬頌台安不宣

復陳觀察

復心嫻世八弟無恙頻聞言去實亦望歸官本遠慮時多荆棘暫作狡獪無損本  
真浮沈候補之廳日聞差缺之說暗隨俗轉習與性成又不若珥筆木天自稱侍  
從猶得半日閒也張幼樵所至句留遂淪牛相由傍觀之竟何益矣楊世兄多儀  
見餉具已拜登唯四百朱提不合文例向來朋交銘志不受筆金楊銀想已送交  
匯票不便取用乞即方便撥還彥規俟得便時再交由匯票則不必也彼此皆無  
急需終於反璧而已何必亟亟乎兩弟皆到書院暫居均能將就閨運今年當遣  
嫁兩女暫不出游端公質美未學恐尚不如張也行旌近在何處念念

鄂游來往惟恃北道主人既勞從者又損卹廚得半月款敘亦已足矣羣道縱橫



各有所主出言尚須謹斂恐人描畫也劉君勇無苦差可當伺便或有優差龔文  
生則須苦而兼優苦有出頭優無朽腹遇有相當或兼或本皆可以鄙情達之要  
津專主之政但不可自己出耳四哥到後十二便可送妹還家此實便事兄弟姊  
妹多又各從宦易成路人不可不傷也傷如之何不客氣而已閩運到家後即日  
南上每行損己損人頗悔輕出然不能已也俟嫁女後便當扁舟江湘不復上岸  
矣功兒本欲坐送船至鄂緣官舫遲留將俟月初乃來疆臣又紛紛調動湘省亦  
大有更改尚不知孰勝負也

復楊道臺

彥規仁世大兄觀察台席曾隸門闌未陪尊俎側聞宦迹無忝先箴方觀時艱願  
隆楨幹先公豐功碩德久應鼎銘昨讀行狀實窺原本略舉大德愧不精微乃蒙  
廣敬甄文謙詞重幣庭實旅百金次見情觀禮知仁孝思維永敢不祇承遠貺昭  
示朋交惟閩運舊例凡託在知好即不受金桂陽中丞是其前比已令復心世兄  
轉寄尊處非敢辭億受萬聊以重禮輕財想荷照知彌殷敦謝台旌計抵白下時  
局必有更張能便還湘亦云良計專肅復謝敬頌台安

## 致李巡撫

仲山侍郎大公祖節下長沙上謁祇以門義過從未為傾服也昨聞三奏請對遂  
 絳吏議相去遼遠未知吁謨欲陳者何要以舉世汶汶之時獨醒獨清江湖魏闕  
 孤忠萬里鬱結憤發斯誠烈士之偉度朝陽之鳴鳳矣富貴浮雲時來得意必有  
 超世之量乃抱孤憤之懷使他日史臣猶得歎息想慕曰某也一疏某也一策則  
 千秋之業何必臧洪遙企清塵曷勝景仰近日行抵何處作何歸宿雖非所措意  
 亦願謀長因感橫流特書奉贊敬頌台福

## 致陳兵部

小石仁兄媿大人史席去歲先秋渡海本約仍還入都故未告別人事牽綴忽又  
 一年秋初戒行又為衡人牽綴堅約明年講學一歲乃許告休致事之難不獨在  
 官者有經手未完也江文通詩云送君如昨日每念天街元旦錦城絲管未及一  
 彈指頃況去歲消息之相聞乎循覽來章情餘於紙殷勤下問尤見宏規黔中正  
 旺功名必遠庶幾文誠之好善而加以精明則曾胡不足多矣八郎求師自以孫  
 伯璵為最宜彼能禁約家人文理其末也世家子弟幸有陰藉何必役役於場屋

舉業惟近正則自有長進孤居沛南不如旅食京華前切言之而不見聽仍望念  
舊篤姻為謀長計即得與仁兄同居尤佳觀察未深思似又避嫌閩運未敢干豫  
以為負負來示云欲出似亦過慮若時勢不久積金買田豈能安居如有十年廿  
年可安郎署一麾居然實任考差內轉富貴多門汲汲目前殊為蚤計今人鼠目  
見二李軍功則思投筆見七耶指使又願學洋誠讀史書始知如張翁紅人自古  
多有其才具遭際同而升沈頓異者又不可數焉見我之必得耶孔子知富不可  
求乃樂疏水所謂君子去仁惡乎成名者為學人說耳求之彼無可憑求之我有  
可據聖人非教人齟菜根也天資廣博當味斯言閩運從來不為高論世人自躁  
擾而已承示索詩比有錢店兒已刊行二本容即寄上來篇亦當細讀加評奉繳  
閩運今年多半鄉居以早年發願點畢廿四史各為數語係每篇之後以備遺忘  
資談柄尚有元明史贊未畢城中客多一日點一本便覺為難稍一壓積無能補  
足故於山莊閉戶了之今已完工矣明歲六十期於佚息不復作學生日課也家  
中幸託福比尚無啾唧親丁十六口分半城鄉歲時聚會惟奢僭之習尚未能改  
然比之少奎香濤又為靜儉在城早起秋涼晴爽輒作二紙奉問起居并設孤之

喜

前聞峻擢甚喜既又念受任危難游於羿毅六轡不驚懼有隱忍以求合者富貴浮雲偶然事耳立身當自有本末平日討論籌之熟矣未敢以世俗所榮為賢者賀也成都之詩尚憶之否喜青雲之果致恐知己之傷明誠私心所憐憫而不容無言者清淮奧區總漕閒地假以歲月可優游矣慎五亦尚不忝康侯則無長進今欲借一麾而投之多虞之地第不便措言如彼來相商幸有以教之近年移住山莊小有營築差足容剝不問時事族子代縉老客江淮弟欲令其謀一丞簿免於跋涉借援樾陰未識能否差委特令面叩恭頌任喜

## 致李制臺

勉林仁兄先生道席津沽半歲日接清塵世載交期因茲彌篤還程滯促皆累蓬心未得專函時見邸報知近履益康有署攝補官之望非復江南萍梗矣貴縣大盛已兩翰一撫尚有一暗學差乘時而興獨無船政之意耶甚企甚念閩運至吳略辦嫁裝到家歲盡幸敕縣送潤筆半千藉了去年今正入山誅茅剡土為消夏之計而工費驟重失於量出遂至觸藩所喜諸女提攜並無疾苦老妻久病尚延

喘息假我一年或者翩翩劾剛雪公壯老俱逝同袍落落唯餘後臣筠仙矣聶陳  
坐得美除使人健美既念兩君又為君慰也要之事皆隨緣不由人計其有不能  
不計者則亦緣會使之四十年飽閱升沈此心古井杜詩云顧惟螻蟻輩但自求  
其穴及至棲皇蜀中不如螻蟻所自許稷契者安在假使當年無求穴之心仍然  
稷契自許果園雞枩差足供給豈不至今壯氣哉每一思之傲然自得伏居奔走  
同於應世非曰君之失而我得之也六女已於前月嫁訖黃家號稱百萬諸子分  
產各可數萬耳指日窮矣近惟席研香十子各得廿四萬金為湘之冠然無名坐  
銷亦復何豪文卿尚云難支穀齋亦復苦貧湘人局勢不振如此因暇寄問起居  
無任馳想

去年旌旆過衡灑掃奉待以為必維舟一夜藉話離悰乃順水風乘流檣於洲下  
比時欲一過訪而念厚祿故人之詠遂以自疑文孫昨來首探敝舍既已相覿致  
命見存七十之辰兼金拜賜拳拳之意朋好相誇皆謂前歲之疑淺之乎相測也  
然士貴自守交在知心兩者雖妨各行其是知我者當不見責耳美政流聞似云  
太刻方今泥沙浪擲不在聚斂以填巨壑培養民氣整飭舊章一士之賢足當一

國區區效法疆富適足自傾昔李今張皆成誤國時事大壞名亦隨之死謚為忠生而何益此所望於遠猶辰告或冀醒迷雖不與樞機儼然潘鎮桓文可學靡裕成功羈旅通逃猶稱盛霸何倭俄之足羨乎久不對談聊資拊掌庶幾言之無罪耶文孫開闢誠謹足徵祖訓他日瑚璉少全所云晚福無涯者此最足慶也小兒皆守筆硯各有一子繞邨四孫差足自娛十女僅嫁其八俟兩女婚畢便可恣意遨遊不能效向平五嶽當如少伯五湖耳拙者均為門弟子刊本印出俟到鄉檢上奉政城內息冗書不盡言敬頌年祺

前因賢孫上箋亮已入鑒整軍肅紀具仰風規移鎮海疆即將授鉞但領海剝敝又甚江州近年制撫惟合肥稍勝然開賭籌餉仍襲張餘振而被之殆未易也國不患貧久成腐語誠近世人心之害矣聞運出游逢亂遂不成行仍還衡陽且待明歲前有幕子鄒生以鹽吏分粵即欲附啟恩恩未暇茲以廖大令赴轅聽鼓特上一函廖君開敏老成衆所推許試與差委或助敷資鄒子乃弟葭草當已上謁未識蒙省錄否粵吏如毛爬剔不易然可用者固大府之所未耳非欲說情邀恩也人便再得相聞敬頌台福不具

與張學臺

子虞先生督學節下去歲恭送使星未展傾敬太夫人慈壽棧賀稽遲想荷仁昭  
恕以方外伏秋校試冰鏡無疲幸甚幸甚闔運湘瀕卻埽竊承風教雖漸老馬願  
附膺龍大比之期知許登進有清泉學生庚禹文好學深忠能通公羊禮記在館  
三年試必高等前蒙首拔以文場未得冠軍如何調入校經俾升上舍漸摩風氣  
可冀接步瀛洲用敢牋達以副宏獎之懷闔運比因家務牽綴未能上省文昌新  
曜甄拔飛騰遙望月暉惟有企羨專肅奉問侍福不具

與席道臺

敝處與胡文忠家歲由貴局支送六百元乃張督部優賢報功念舊右文之雅非  
乾館也彼以為賢而餽之我利其惠而私之則不賢矣是使督部濫惠而受者無  
名故必辭也潤公雖亡人知其心必不欲其家受此虛惠其子孫不能辭故代之  
辭潤公意也如是乾館則必求而得或薦而得萬無偽辭之理而易世兄不知大  
義妄列於表以蔽張公之美而彰胡王之陋蓋其魂東魂西魂不附體之所為不  
足責也又隨大例減去兩月則更謬矣減去兩月何不裁此二分且不必裁而固

已一辭再辭又何勞易公之歲省區區乎代者不知其由但依易例弟又遠在山谷從不入城故嘗然至今也幸逢閣下明達無私故敢布其誠心去歲小兒所領悉令繳上今年年終報冊求向名下注一辭謝未受明年不再列表以免剛中堂之流查帳追繳諸多未便

致曹禹州

東瀛仁兄侍者七月得手書並淇縣圖敬聞治狀兼金二百以益盤餐厚意拳拳祇荷無已前屢承寄貺以為出京後無復嘉羞矣不圖鶴俸又遠分也然銀子不如杏仁木瓜瓊瑤詩有輕重相念不在多儀也幣美傷德願以為意閩運聞河南會試猶欲一行昨聞豫撫告勞將移江介則夷場相接近不可櫻七十之年不能屈辱不獨白帖無分且不能為君後進也山居營築足容兒孫行將扁舟沅湘載東施以招屈子耳既未聞近所行泣此書仍由軍機轉遞行程展轉到當歲暮瞻望河淇眷想舊游蜀顏伯琴亦吾故人見希道意即頌冬福不具

與曾公孫

震伯世仁弟侍福奎 同徒勞飄流遂久聞東干哀凱亦復無成當世貴人聞風相



避誠宜閉門養望收復聲名子建自試之文竟何益矣昨後山農人來言南州開田分為四股君得其一求為莊頭有是哉又將與俞撫為緣乎墾田雖本業志大心勞詩人所戒也山農吳祥發往在水軍以其貌似郭武壯故加拔用令領一哨今還力田亦尚是焦大包勇一流欲從驅遣故令一見亦藉以通問並探消息聞又將還桂聽號房之命似又不如家居侍親但不與有司為緣則外議息矣才具門地皆第一流待時自效必蒙衆許此數年中誠未可出也貴人但當鎮物宜以王瞿為法然稍靜澹所求必獲老氏欲取姑與之法想荷深照遲得相聞不宣

致張瞿軍機

楚秋世兄台席別未永久事遂浪楚當束手之時居具瞻之地未敢為崇高慶也舉朝皆在網罟中而猶欲言政治誠非野人之所喻矣上既苟延下遂苟仕又所謂打渾水捉魚者耶陳儁公叔子兆奎字完夫年少好學相從十年經史詞章皆有體段因去歲停捐入貲赴部既其兄命亦當一上曹司人海未宜溷之欲應特科以定行止兩君既皆世好又當物色新進之時如此人材亦不多得因令修禮門下尚乞進而教之闔運尚有二女未婚俟畢當汎舟沅湘作浮舟屈子身世粗

了幸不發湯以此傲曾左耳論時事與羣賢大異如欲聞新論陳生口具京華諸  
舊識當已寥寥一片冰心未敢多愧老懶省事未別具棧祇頌郅安不具

致陳潘臺

六笙先生大公祖節下秋半上衡正值過縣鳴鏡江響挂帆風利瞻望弗及離情  
眷然比作小詩補酬東洲之作怱怱未寄旋奉來章篤念之情益形疏簡值閣運  
解館久稽還答尤為荒略也伏承遠謀未雨近慶安瀾鄰警聞威知復弭帖珂鄉  
仍有兵事思往日團練者不可得黃植庭又一鄭夢白也雖有彈章正無奈何幸  
得安居從容度歲公子在近亦當來否眷屬團圓甚慶甚慶閣運還山踰伏并不  
入城時事可驚游情頓減明歲仍還故館俟時局定後再議東行便道奉謁耳閣  
運表弟蔡浴春幼孤情農惟貪坐食前充衡麓局巡丁有年因屢調疲奔欲移岳  
澧肥缺伏思大公祖經營關樞可役多人遞則後時特令先叩或暫於岳澧麓局  
令得嗽飯數月以待開關雖瑣瀆妄干事實切己但指揮可定不費吹噓仁覆為  
懷未遺微賤區區之求必荷照察省欽兄未及別候尚希致聲專復叩安敬賀歲  
福

六翁先生大公祖節下去冬至長沙度歲頻詣公館探候起居奉到手書慰問殷勤情詞周至彌增跋慕論藉康強旋聞移節華陽正謀入蜀計日瞻對致未復書夏秋因事至衡復問蜀警事傳偉績送荷恩褒補卅年前勇號之遺躋卅年來應升之品且知凶徒闌入禦寇門庭壯哉是翁奎員昨古於此乃知知兵之效也老客聞之增長氣勢望青城浮一巨觥甚快甚快閩運因第九女許嫁衡陽復來暫住船山一席曠館兩年廉頗思趙人待開府兩川無忘相約勿效晉行之不待也媿屬已安抵成都未省城信難真竟未知也學堂萬不能行非無師之難無弟子之難張楚秋管學而首議不改船山則又非無弟子正無管學公聞之定拔髯耳

致朱兵備

曼伯先生兵備節下申陽過客再接清塵適館授餐情文周至北轅阻雨南士思歸車殆馬煩未能上謁企瞻鈴閣但有欽遲會合有時行當更覲春禳多福頌幸無涯舍親陳杏生近得依仁又叨世末近聞電局委員可以更換吳仲樸侍郎與公至契信陽實隸提封欲求特予吹噓謀所以位置俾資餬口冀積新資使窮老諸生得成歸計恤忠念舊固高誼所優既有所懷輒敢私布如非杏生本意尚望

開導使早得還鄉似勝於依人作計耳專肅申謝敬頌道安不具

致但糧儲

少村先生大公祖節下今年恭逢正慶擬詣公堂介壽賀春藉舒誠懇人事息促未及修箋適拜賜書倍承眷獎獲觀石刻足副遺徽叔鴻近學翁劉無假魏習氣惜拙文未及六朝耳閩運初約五朝前泛舟下湘會得大雪自除日至初二夜浙浙未止逆風淺水懼阻昭灘謹遣使奉書輕齎急進並去年一聯無之容二月間補上並送虞公也鄉中無人照料婦女輩又復來衡亦俟春水生時同還山莊耳專此奉復敬叩壽喜並頌春福不具

少村先生大公祖節下前在省宅避干謁之名致未走詣將俟秋闈奉謁又值監闈遙企光風曷勝欽遲校經課卷久未寓目虞公見委實亦欣然及閱撫課無卷可取黃茅白葦迥非早年諸生不以讀書為事誠可憤惋比即致書辭館兼請停課次公置之不理兩司竟未之聞又與書家中諭以退銀繳卷頃讀來示亦陽為不知三百五十八人苦我甚矣下交五十載義不敢原封璧回又依撫例悉心評點封呈鑒定分為四等取錄上三等遂偕定名次用省清裁其不取兩封及備取

一封亦略有次第但未填寫等之自檜公若憐我乞告知顏朱後勿再施號稱辭  
差而當差如故亦公恥也今夏幸不甚熱入秋更涼伏維珍重閩運將於秋節前  
暫還山居期於麓山登高以候清塵肅復故安無任馳想

致俞巡撫

虞軒侍郎使公節下長兒來言薦牘下及小儒不期豚犬之才得與龍門之品方  
漸失教更獎傳經仰承慎重之至公已復昕宵而自勵修箋待上新詔旋聞移鎮  
太原爰綏左輔臨汾三唱慰公還晉之心負杖重觀感此傷離之意想須和煦候  
送旌麾謹遣鄉傭參承福履三元瑞雪歌郇黍而占豐四郡黎民冀召棠之暫憩  
閩運尤蒙深眷倍益遙忱肅頌春祺並申謝悃

正月初即上箋遺長兒齋呈材官來奉賜書閱三日又由驛遞到手教欽遲欣領  
誠悚誠感公之惠澤在湘非獨被山民也而尤拳拳於物外之一人則襟期所寄  
必有殊於世俗者出處之際何待贊詞方今時賢誤於輕率其鎮靜者又流入模  
稜一流淡泊安靜非公誰任日疾得閒自愈愈則當起滄海橫流處處不安蘭亭  
豈永和時耶暫時從容一從漁釣仍宜訪求異士俾代煩劇他日總其大者可矣

與其求之吏民不若求之舊友和局必不能久任事能有幾人公殆有訪子陵雲  
卿意耶吉行不須侯嬴珂鄉老叟之錢長沙亦應有也仲春初即當詣謁昨已憑  
唐衡州傳語矣趙冊遵命題名藉使奉上送行文已起草因字畫太率俟錄正本  
再呈鈞鑒送行詩則未遑作作成時即題寄冊一並齋呈日內遣嫁第九女須初  
一壻迎去乃得擺脫留使四日恐訝稽遲自城還齋夜書四紙莫盡瞻依答謝之  
意恭叩道安先賀榮喜

虞軒先生使公道席城陵磯前逢來舫比俱欲停船適兩輪相切至近頃刻皆過  
瞻望歸旌唯有歎羨旋聞就養夏口復擬通候適裕容屏來湘面詢起居寄聲叩  
安塵思塞胸頗憚修箋日復一日乃荷手問懇懇拳拳不遺野僻知明公閒健精  
神充周甚愧甚喜承示游蹤如陪杖履桓樓梅隴先後相聞釣石猶溫清尊未竭  
近復思還京口眺賞金焦高興遠懷定增詩畫但風颺所及聲息惱人未若山陰  
糕香酒熟謂宜扁舟湖上先探林梅仍泛雪溪暫歸戴宅閨運將薄游滕閣洗馬  
濯池臘節還山再詢動定湘中漸復巽競咸思鎮靜之功幸歲稔民安聊可卒歲  
專肅奉謝敬頌福綏無任馳想

致趙巡撫

次山先生使公節下還湘未敢上謁四月二日出西門道逢軒車飛蓋雨中前騶簡少心目為之開朗知賢者固不同也即此風聲官士傾動因而施政必有移風易俗之能自六十年來無此明君良牧矣五月朔奉手教具承綏福發到課卷加之獎借披覽終讀悚懼恐惶身無田子方之名而被魏文侯之禮謙稱下逮交誼遂疏不審何由屏之門外闈運與節下年輩相接氣味略同晚之號何由而生教之稱以例而及固當引分自遠不附苔岑將俟收回乃後安帖耳校經課士與自吳公將及百年名臣舊學並循得此路闈運以生童而躋校閱亦既卅年人競研經言皆有物自甲午以後士皆驚於進身稍知名字爭趨局館唯不通童生及外縣村儒一人數卷妄希官獎今發來六百餘卷遂無一通人不意退步之速至於如此謹為批抹以待鑒裁此後可停止月課以示甄別亦令有志之士知所奮興事有改弦此其一也如方伯列位必循舊例則襄校一席請付他人闈運必不能以有用之時光疲於無益之評點輒呈所見伏候參詳如不責其妄言幸轉告之僚部新晴驟熱惟安和珍衛不具

承詢停止書院改立學制救敝正俗莫急於此竊以為國家學政本有專官上失其職咎不在下今之改學則務在糜費官款無出專恃民貨以有事之秋興不急之務并心外國專聘倭師就一學論之堂舍器具費至萬金教習監督薪水數千購置書器錢亦千萬一縣物力必不能供常德奪產殺僧郴州遂至民變湘潭益歸侵蝕盜鄉徒事鋪張以此開宗何能造士且漢儒稱盛良史譏為利祿之塗宋學廣開先儒尤憾科舉之士儒為國靈有由然也今須先明廉恥分別士民次整儒官以修專職謹擬學規聊備瞽說人存政舉則在明公

### 致譚兵備

芝公仁兄先生兵備節下臨別殷勤荷承重餞儀文稠疊感愧交并一月馳驅幸已卒歲閉門卧雪春戀清光遙想戟門新成大夏師範之館當亦興工朱守傾心唐翁助喜樂可知也歧予望之闔運專館已辭餘緒未已明年允再一往期以春深船山一席遠難兼領又聞運少時見何煖叟動兼講席曾面進諫詞不宜老而效尤貪得微祿謹即奉璧大聘附繳四金丁叟處未另致函希為代致北事大約啗喝以糜費國財南道主人力小任重竝健者之不如是可愧耳附呈近作數首



南豐橋一簞聊為歲饋敬頌府中金福順賀年喜不具

致裴通判

裴大世兄執事前得光祿公赴狀時正值東游過淮安迎女攜有媵屬未便艤輪訪弔本擬歸塗登堂乃值北亂息息恐江湘阻隔飛馳而返至今又四年矣日如駒隙碑志未成得讀行述及來書知己從宦服官在近是時又適有鄂游以為不必作復即當見面及昨至江夏詢之督撫云未在省撫臺云曾見一面似不荒唐將來必有位置云云及還家又接手書具知在鍾祥幫審甚以為慰七年不通信者有此委曲未嘗一日忘光祿也聞運有三宅一在省城一在湘潭西鄉一在衡州不常厥居故通信最難行述中獨不記尊字故不知字

唁龍郎

驗仙世講廬次三月聞尊公棄養追念游處不復能作哀弔之詞誠以求友九州知心無十就中最久最契者惟餘靈光二鄧同時其知我不及也尊公既病廢閨運亦蹒跚世間固知同死然豈能忘情於矧濡乎以此言之則今之唁慰猶世故也子威來聞當門知禮稍以為幸為學在通不在多在實不在名求之至淺至近

乃至深至遠也即以喪服論今欲制斬衰服屨并經豈故紙中所能搜辦宋代諸儒近時徐秦程江等著書等身不能制一衰衣讀書尚何易言由此三反即可發名成業家事有賢母支持自無勞念耶

與龍郎

研仙世講姻仁弟侍福去歲一書已久不省昨到城乃得輪撥寄書及百金之贈詳哉其言之也政聲遠聞甚慰官橐所餘盡付工商雖不自利仍與往年卜學無異此經濟與經術分科之故吾所以不東游者惡夫盤詰非惡商船也來書所云似以風氣未開為疑則仍陳巡撫之塵言豈曰新乎四郊多壘非士之辱幸及餘年優游卒歲婚嫁將畢行當扁舟沅湘作歡喜屈原不及國家事也嫁第九女揆拾殆空得來銀濟之甚副所需然不必也寄貨與我亦譬之今日言生利贏餘者不知其幾千萬一擲泥沙耳何如留此此須以濟窮困厚意長存努力自勉為光多矣易昆甫有嗜好知吾賢已節嗜好尤所喜也適將往河南作經策便復二紙頌堂上福安餘俟邯鄲

致端兼督

自別桓樓如有所失非獨感公款至亦以擺落塵俗開拓心胸俗吏儒生不能拘  
限具此識力乃後可言設施間氣所鍾一見為快想公亦照之也雖然今日疆臣  
供人指使而王瞿又無所指使規模雖闊實際難言況復五日京兆二品教官比  
之曾胡猶多不逮惟冀澄心養望察吏求賢毋遽遠謀以勞心力學生狂議度外  
置之無所用裁成誘掖此皆張公所自招耳范仲淹傳彼未嘗讀也在嘉魚奉上  
一詩計已達鑿官舫遲留五日始至長沙無名之費斯亦一事鄂中似此者無數  
泥沙錙銖自古然乎雨窗奉謝敬頌台福無任企仰之至

致黃潘臺

花農司使公祖節下天津通謁未接清塵星使經過徒瞻輶傳前以山莊之鼠竊  
復承冰案之鷄驅陰樾知仁修竿尚簡恭維新命將泣大藩趨送仍稽捧書滋悚  
校經諸卷校閱稍遲以月前陳情撫潘謹辭不敏乃更駱驛遞到應接不遑欲踐  
前言懼違台命令亦評點呈鑿務乞詢之次帥及方伯曾否照察區區此後兩副  
使課卷萬不必再寄敝處免致往返延滯無任感荷專頌節安即代叩送

與陳郎

懷才欲試人之情也懷才得試而見用則患所以立而憂及身矣懷才而不得試則羞妒忿激不肖者至悖而思逞如康有為之為亦人情也楊度但以慕名之心轉而慕利暗為梁煥奎所移而不自知前之師我者亦以名也非求益者也與夏時濟同與廖登廷異廖登廷者王代功類也思外我以立名楊夏思依我以立名名粗立則棄予如遺矣故康廖猶能自立楊夏則隨風轉移今日師日本明日即可攻日本師之而日本不得其益攻之而日本不受其損其能損益我乎彼無名利以招致人則不能有黨徒為可笑而已不足諫也功兒計已到京我女亦已至邸乞轉告功令轉告我使知我知之而已考特科應酬事也想不必得意失意惟煩寄語吾黨之懷才欲試者衣錦不可夜行名教自有樂地發財升官不可力求歸來歸來桂樹叢生兮山之幽又自有一番景象身外事不足道也五月廿三日晴窗朗涼書

報完夫

完夫世第文席前聞李甥言亦將為榜眼所邀頃得書云定選州進退雖異容身一也貴州有尊公遺業大可為義軍響應楊哲子之所羨豈但為譚劉恢張而已

竹軒近頗有張法

張法即設法春秋所謂文致

大概學胡文忠非由兒教也屈已推賢則好善

優於天下吾雖不能助之何能拒之所謂前言不知何指本約有急則往非欲興文去年已約午詒來山莊度歲竟無回報計今當束裝也還州想在二月此時亦可同遊否攜妾從師正與後堂絲竹同義一洗擔簦負笈之陋劉仲長所云為寒士吐氣者其功賢於開民智矣

### 與四子婦

二月到省知懿兒不告而去追至漢口已渡海矣此令兒及羅順循設計辱我不知我辱湘潭人亦辱也即欲假官力電報追回以事太操切傷父子之恩又高攀貴門而今有離絕守寡之事重貽堂上憂甘自受辱而已輒為之三日不食既而思之杏元小姐被奸臣陷害此事古多有之自不合生癡兒不宜怪人以此故豁然矣然令兒則終身不願見也瓜分之說外人無此心妾人借以求富貴耳彼入我京師而不能滅我比之吳三桂迎攝政王時一能一不能已自判然就令瓜分去無道而就有道有何不可孟子曰人役而恥為役猶弓人而恥為弓我不能自立而身為奴虜固其分也又何辱乎女之惑於妄言必無他心誠杞人憂天之意

耳令兄身為男子而區區以無業自恨欲求衣食之方則其見小手不能縛雞而欲憂天下之亂則其膽大能言而不能行則其技窮倡率一家皆為無益之憂舍家庭之樂求流血之苦則其志迷平嘗怪易中實魂東魂西以自欺欺人而於吾懿親弟子中親得之更可怪也近日事又大翻矣特科第一二人皆被黜落相綺弟子不取一八乃以石屏州人為狀元雖不知詳細甚悔令功兒應該他日或誣以康黨未可知也語曰無過亂門過猶不敢況欲入乎從此又長一見識不復施庭訓矣前十餘年令諸女學裁縫以當就案邊授受遂輟此議我女嫁後學之今女亦能縫是吾望也賞周嫗衣男工不能及何敏妙若此樊一皮襖試能縫否見與六姐書語多幽憂女子之職在奉祭祀待賓客育兒女以養人為職故坐食而非秦也維鵲有巢夫人起家而居有之有佐夫之功家國所係以存亡夫或不能獨成夫家子或不肖保其宗祏繼絕存亡將於是乎在今不憂王氏之衰而目營四海輒欲自致富厚為旦夕之供養將令吾家皆仰給於女而後為婦職何其已欲立而不立人也夷狄商賈之行而楊王何取焉推撫資孫之心足以為賢孝推憂己無業之心不過為市僧故擇理為難也此後慎無謀食無憂國上侍賢母下

撫兩雛閨門雍和有慈有威池蓮院竹冰月清風時復微吟寄懷遐古此亦人生之至樂生民之多幸何必坐愁行歎僂馬如不終日哉山塘工匠需錢穀價又賤存銀稟命便可與王傭放散六女等七月當歸九女在劉家甚相安一家皆驕養之以為千金小姐已則自比于宦婢傭女王氏女學於此得效不必從龍八潭三諸蕩子游乃為民智開通也趙撫佳人倭氣頗深吾亦敬而遠之信來不復以詠諫而已中伏第三日書與兆仙

致夏編修

午詒姻世仁弟侍福頻得陳譚信言文從當歸頃因江使問訊還侍節堂幸甚無恙考差不得耶抑未預考耶兩者皆失之矣尊公見召又承隆禮想亦趨庭之力然事未易言也已有詳函覽之自悉衡陽鍾生頗講肝膽九女壻言其可靠欲覓緇口之方彼與周敬湖相善妄思依附特與一函希稟知堂上指揮各局試其能否如或可用亦椽桷小材足備任使非盡請託也其或不中則於鹽局覓一小差不飢餓足矣冬間當乘標渡醴一謝尊公藉得相見專此恭頌文祺不具

致夏署撫

叔軒仁兄大人節下奏別又將十年時聞佳報均疏賀簡伏想因宜施政即事多欣為頌為慰賢子一疏幾於奪官闔運因此大為孝達所憾雖絕交已早而彼怨方長然經此大創遂無公議得賢子為鳴鳳使他日考國史者知當時尚有一人萬古丹青以衰年謬附不朽誤中之誤竊自幸也隆兵備疲老龍鍾得依樂國一切安置務乞加意從優旗習不知理家多屬股削闔運實愛莫能助不審能飭紀綱定一常額俾得量入為出否其所存僅了日食若為之開源尚不若為之節流也到城思息餘俟續布敬頌台安不宣

叔軒仁兄先生侍郎節下前歲寄書後以賢子時有寄訊動定輒相聞知謀國泣官皆宏偉略不以封疆為限誠副傾企之懷欣胡丁之得朋也在衡州微聞貴州人言將詢及芻蕘方深屏營八月底因趙次公相約入城道逢軒車疑是來使遣問果然特派大員致其幣聘展讀手教謙抑彌光雖文侯之於子方留侯之訪綺季無以加也滄海橫流有此雅度已度越岑張矣改學之說闔運久欲建言曾與孝達面陳墊秋書諷又上箋俞撫皆不諒區區秋間湘省沸騰擬呈請奏又聞慈聖意在停止嫌欲尸名茲承奏允已於九月三日具呈督撫求為代達並與書次



公條陳建學之宜鈔稿呈覽如以為可自無須延師或宅安學使到時會商整飭為善至於私情談宴江湘接連訪戴之舟無勞具楫聘金路費皆不敢承恐湘兄不肯收回俟見時再為面繳聞運暫還船山固守本學陳復心次兒已奉左全孝指揮撤我舉比矣誠可閔笑也

致沈山人

夢谿仁兄文席周生來得手書知不必作復韓生來又惠賜樓記洋洋千言內敘肅李數言發同人之所未發循誦款惻再拜領謝知深人無淺語也年穀豐多可以釀酒亦宜因此時暇以自娛不必再勞筋骨以待大任瞻望山阿悠然自遠闔運循例應試為雨所阻還作一詩錄呈鑒采東洲避暑萬事不關蒲枕竹牀有同陶卧張正陽在此說詩日有新得嘗愧小慧未儕大雅來詞過謙恐非苔岑舉世營營而十步之內得二芳草所樂同傳以繼長沮秋初或還遲君枉駕先此奉謝敬頌道佳

致趙師爺

晴帆仁兄大人閣下去歲從族子處得手書知前計不成反生枝節以為歉仄昨

由郵遞到四月一函藉知起居老健守貧更無人問猥承特鑒遠想深衷愧無置  
驛之能乃辱無魚之告循環三歎悚荷兼縈仁兄古道持躬可敦薄俗閨運夙無  
介紹一見傾襟以紱子時受良箴知當時鮮同直諒仁而不遇義所當欽是以  
不揣孤鳴代謀優老自恨無力口惠為留茲荷輒咨敢陳憤懣方今隨俗者衆知  
古者稀江南大吏誠多舊識然皆以虛名相假有貌無情今若挾要津一函猶當  
審其最要山中老朽薦一布衣投書既未必開函延見亦徒資匿笑况足下所彈  
者古調而今世所貴者時趨北轍南轅何由會合如有訪求毗佐物色驪黃虛左  
以迎侯生北面而師廣武尊性慎密加以撝謙又未能抵掌而談揚眉自許則兩  
無所益或反敗名是以環顧四方竟難位置為養老計但有滄新此等聲氣所通  
吹噓立致如閩運等輩未敢與也然信陵孟嘗容有其人亦未敢厚誣當今必操  
衡纊因君厚望一發牢騷耳閩運不樂洋船聊行鐵道遇雨而返又成浪游已於  
四月還衡仍理故業所主者船山書院非文峰也而尊函亦竟遞到適與新中丞  
筆戰羣儒十日方決又值端節債主紛來裁復稽遲想不為訝紱子近在江漢歲  
入頗豐嗜好愈多殊無所益老態龍鍾為督部所笑幸未勒休而已知念附聞彼

想不與百姓說話矣早熱伏維尊候清和為頌

致秦知府

子質仁世二兄參政節下夏間得手書具承存記前聞統軍挂管凱歸請覲或云備兵瓊島為人所擠意雅尚必有違俗之嗟幹才又無投閒之理隨時升沈與世委蛇亦宦游之一樂遠山殆不如也局中可知優游為善此時無所謂自見也聞運前尚有子和處撥用五十金未選以在家日少無暇及此茲承寄贈即謹拜領仍交令弟子剛歸入家用示君兄弟同財之義眷念故交之情手書為謝即頌近安不具

致王知府

子常仁兄先生台席奉別廿三年人事變遷故交存沒不啻如丁令之歸城郭麻姑之歎海田千斛愁化為五色雲皆文波詩料也以此閒散遂至耆年孝違變為洋人爽秋遂從鼉氏尤可駭矣獨吾兄名字時從佛名朝報見之兩舉特科皆為領竊喜其健在笑其多情雖無因致書而清揚宛接今秋偶入城居弟近分子女為三家一居長沙城一居相見架上有書二函曾未發封啟之乃大集世卷唱和詩廿卷詢大潭鄉一從游

兒云初從都中還不知所自來小孫又言有手書已便寄衡陽弟竟未見惜此墨妙喜讀多文盛矣富哉交游門下之多賢皆使君倡導力也又閨中友侍並有清吟不必女學無妨纏足尤足助吾張目矣日對百客不勝其煩猶盡讀六十餘卷而後還山念去後無從置郵謹因同鄉葉君先寄此信餘情不盡亦無由得盡得君心照而已專頌道安暇輒相思

致程通判

屹樵姻世二兄侍福去歲輜簡足徵衰懶入春多喜亦闕問箋頃奉來雲為頌為慰閨運城中百日如行荆棘廿二日到莊次日即被教從甚笑甚愠既承雅命在家一日必代閱官課卷一日上學則必不能以撫臺迫我以制臺嚇我皆所不受也但不必宣言俟出游後無處蹤跡自然止矣此頌雙棋不具

屹樵姻世二兄侍福奉書感荷端節前必不能來當俟事定遣船之說希即轉告前途免勞往返煤太累贅油可得十錢相應乞交餉船便付湘潭城內可也山西信甚不佳出主意者又重辨奇之奇矣此間數傳衡警必當應謠言也惟小心照料為望

聞木料業承代購甚感甚感夏水大至附便至湘為宜不必急急也鹽局章程定  
否有子姪數人專望混飯去年已面告可亭世兄誌其今年未聞消息貴郡局事  
知不能辭已開辦否坐待又恐失時今遣舍姪月生先行求見或柳或桂務望賜  
書往謀一事其人久習商業頗為穩實在敝族中尚為老成不比瑞生卯金之流  
也能從指揮則尤妙耳聞粵鹽亦發小票閩運有改業之意每年以衡桂館金十  
元試辦不知可否如可俟四川還仍來教書學子夏名商也

屹樵姻世仁二兄近好別後馳驚無暇幸於月初脫歸約以明歲再往館已辭矣  
因竹軒欲借作膽心不能不再去也印書費心如書經叙成乞交榜眼帶來為幸  
船山不能兼顧今遣送關書其聘金已兌用乞於安記取票銀四兩令賢子加封  
籤並飭紀送往觀察處為懸信物并陳即希照送真南京鴨子一隻真假南豐橋  
簍聊佐庖廚又周嫗求九少爺裱篆屏四幅乞飭并交夏帶為感今年辭去二  
千金留下一千金夢寐不安年終尚須還文債也竹軒大有長進宜其開府惜閩  
運不能輔之以無交情之故其不能不去者禮意隆重之故并以附聞即賀年喜  
屹樵姻世二兄閣下得書並惠寄袖脯感謝感謝衡城暫別變故多端世上千年

可為歎憶福門安吉春宴多歡頌甚頌甚江西約須電追即當奔赴講武非興文也去臘已約榜眼今無回報來函及陳信均未提及豈不居衡州耶船山十年毫無功效自應辭退不關竹軒關書例須三退如再送來即存尊處弟來去非紅書所能招致此理易明所以必退者便於彭傳臚薦人耳叔揆如須出游可同午詒同來我若先去亦可後來與午詒同伴但告以係鄙意便不嫌攀附矣此頌新禧屹樵姻世仁二兄閣下前退關遠仍遺落已應再送之例矣今特專使三次送繳乞致觀察為幸學堂與書院本是兩事但不可提書院租亦不必言不提俟學生齊教習到再議可也監督必須教官不用本地人無人想做監督自無人想興學堂矣此則官紳可自主者也鄉中應酬極忙節後當入城避之狡兔有三窟人無奈我何矣去年面求收蔡氏子今遣叩見其母苦節此子膽小想仁者必矜恤也省中日日報假仗一敗一勝俱不是真事學堂人頗減色唐老守亦不必高興矣春雨新雷元宵添一詩料從無詠元夕雷者此可為譚觀察一課題九郎來否紉女昨生一子劉塔想已入城謝媒瑞女入城請二嫂以近狀告之並頌潭福不具

致伍編修

別後數問起居無異面對母羨福壽難在聰明昨得來書猶如壯艾驚壽三歎若再晤談重宴鹿鳴諸老避席敬鄉富貴二老更不及矣此身健在他復何干坐閱盛衰益增學識去蜀廿載不減不生媿屬平安聊以自慰改學說起久欲進言以名字章聞嫌於生事適緣夏奏即具呈本省督撫請代奏飭停躬至南昌辭聘還里因緣湊合得讀來書藉此要津復箋函丈日對百客心緒粗疏凡所欲言真同全史如錫公告去或可西游重訪君平一傾積想斯為快耳導養多效冬福備佳幸甚幸甚

### 致劉道臺

端亮仁世兄昆弟同鑒九月在城即聞君家兄弟集於侯家此時應酬不遑未能奉訪李伯強兄見過致意云當枉顧祇候數日未得晤談登舟日始聞兒子言賢昆仲適以其日到舍款仄何似仲冬由衡往醴亦於舟中得賜書具承謙速垂問殷拳甚感甚感中丞公年輩稍前尊甫弟兄均同游至密羣紀之交與曾氏同世則有之太猶未也來稱過貶所不敢當至敘述遺業傳其齋志朋輩之內惟我深知直以未得來命故無從記述耳媵以千金微嫌幣美行時息促遂交衡友暫存

今年又將遠游無暇料理資產俟歸時終當奉璧也碑志各一篇先行呈上以慰  
孝思行述附還或恐不當尊意仍請大手筆點定除日手復不盡所懷順頌潭福  
不具

湘綺樓箋啟卷第六終

湘綺樓箋啟

卷六

五





湘綺樓箋啟卷七目錄

長沙湘潭王闈運字士父著

龐巡撫一啟

馬縣丞一啟

端尚書七啟

樊藩臺六啟

張署府一啟

朱道臺一啟

蔡郎中一啟

唐知府一啟

胡吏部一啟

莊臬臺一啟

鑛局協辦九啟



湘綺樓箋啟卷第七

長沙湘潭王閏運字士父著

致龐巡撫

渠菴侍郎使公節下因游九疑親見衡永水災巡道告振明公施仁銀粟沛然萬民感戴復蒙朝廷頒帑巨萬出水登席皆公賜也但湘省阻境已成積習鄉市閉糶難可理喻今公私積粟大半漂損下戶得賑商士之食不患無錢而苦無穀上游四郡並乞省倉半歲之糧將何以給閩運不揣冒昧已電請督部乞糶米五萬石減糶得銀仍由相省往下游採辦如此一周轉每月可來米數萬石鄉穀自出民食有資想督部必有咨詢尚乞主持酌辦芻蕘之言仁政有取謹鈔電呈上恭頌鈞安

致馬縣丞

少雲仁兄父臺惠覽昨得賜緘兼頒方物比即附片肅謝未克詳陳伏驗為爽暢行將開新岸綜理詳妥商民咸便即看倚重藉慰公私幸甚幸甚弟陝游習勞奉託遠託還山度歲旋值衡書二月初旬尚當重至東洲冀可把晤茲有族子王秋

江頻執權後聞新局初始欣願效勞且須早至故遣先謁尚乞錄用為望餘俟面敘恕不縷及順頌雙安惟馨鑒不具

致端尚書

陶齋尚書使公節下十四日得行臺電問實惠百朋仙侶同舟吳鸞銷夏李梅之福非野宴所敢希也荷公念問已如賜冰不抱不飲撲塵三斗思所以報惟有書畫鎮江丁氏舊多藏弄茲因貧儉物將擇主政暇甄覽儻有賞心量宜予價可空羣馬茲因陳善餘慶年齋呈鑒定便可居閒閨運因避船山遂同徐孺將來秋水復作李膺相見之期待公還督小暑少涼謹上一啟敬頌暑安不具

再啟者武陵陳銳字伯敬秋士多悲文詞秀逸三試不第作令江南權稅高郵化雅為俗如幕府欲工作記倘在翩翩之選或者待以吳質出宰元城他日得從袁海之後則公誠大范寒士矣

陶齋尚書使公節下自公移鎮閩運日增光寵戶外屢滿篋中書積未十日已三上書矣韓退之以三上書而損名蘇秦以十上書而金盡公將何以益我乎復心次子仲馴前月到洪言公令出洋為小兒所勸沮懼孤盛意歸咎於我閩運今留

讀書想亦有師範可學輒以奉聞郭鈞仙兵左不識曾相見否海外以為新學之宗閩運舊學之師友也其孫為劉坤一所誤冒昧報捐道員適隸宇下前政派充沙田委員新又有鎮江定亂之功想能推愛儲胥加之拂拭或為予函當塗今需甯利則局面較闊戴德尤閎閩運例無暑假日日到堂願為委員所嫌幸去日無多少縱逝矣秋風容易公當占我於衡山雲下手此奉託敬頌鈞安唯鑒不莊

陶齋尚書使公節下開印班春伏維錫福下民仰望知慰巖阿三王四胡湘中舊彥今皆退處且凋其二惟女壻胡元玉曾事次公太文不俗未參曾熙郭立山又舍舊維新衆士所怪或者升局襄辦本用潭人以配黃梁庶無愧色明公甄陶萬類各得其宜履屐所存必盡其用特遣進謁量材器使馬還山藝寒不能即侍謹繳唐拓本監其野詞新政宏謨尚布寶書敬叩崇祺無任馳企

陶齋尚書使公節下備還承賜尚未知夏候消息西行不果積雨六旬豈又如會試蹭蹬耶君相造命何以處我復心觀察六親同運尚不能從梁節菴游亦望公一振之也前未致書江督說劉世兄未知已否料理其餘當位置者無萬數皆無益新舊之人每一念之且歎且笑附上致竹石一函及代索書啟一通乞便郵去

外呈墨子一部係江報嫌價昂不利寒士者公當今閩人故收以獻專頌道安並  
詢按行萍醴何日覩得一迎候

陶齋尚書使公節下天雨不止山人足魚長缺免彈短轅遂枕遙瞻鈴閣不任欽  
遞新政平和舊人新喜屢聞美授或狀元有就熟之思耶隨丁周玉松來自江西  
不嫌小就斫薪挑水頗著勤勞雖非愛才口不言去近年長工皆不安其室爭謀  
戈什籤子之為如此安貧至宜獎勵用特達之節下乞加錄用其志在江湖兩督  
之差知公不久留小地也昔田單師走卒而為名臣願留意焉

甸齋尚書節下長沙舍去先竟不謀躬涉鯨波亦既勞止兩江自公家物猶不及  
湖廣之熟輕徒令故民失所馮籍正深快望猥奉惠存不隔音容長得瞻禮慰問  
周至逮及豚犬甚為欣感豈比兩麻命贊詩歌輒成二律別紙錄上殊愧荒蕪孟  
浩然淺率去官秦中遂無生趣升公封疆第一乃不能容一狂生竊計兩司並無  
其比要當闊畧小節仍與周旋解鈴繫鈴在乎反手且勝之不武人才實難闡運  
輒妄欲上書勸以宏恕因未嘗親面莫測可否公既皆相交好當與調停察野人  
斤獻之非私知兩賢相危之無謂十部從事豈有意乎三兒荒唐敢闖華屋公不

依毓華之例而令從文石以游未知能否謹慎以副培植闡運初無嚴教但懼詒羞訓之拒之則深感企今年復有牽率將復上衡第十小女年已過笄尚無所適公門三千珠履有可平章否前託樊山心盒皆久未報禽尚五獄坐此淹留時無人才亦其一也春來晴雨相間花事頗佳湘中人雖暮塵地猶清絕流連正樂惜公急去前命作天心閣詩去冬亦有二律並呈求鑒十日內由湘至衡復由衡返湘湘又至衡道中作書敬頌福安

陶齋宮保使公節下軒然大波林無靜柯頗思東游又畏炸藥聞文石上謁談讌定歡抱冰詩鐘無此高雅遙望茶戟但有瞻依浩然將踵雅門前函求公平章儻得韓侯或因茲一會也又往年與公言鹽局當盡去夏程之流以便安插私人大彰公道文石之來實獲我心未及晤談為公招去今有復心甥彭生前在敝縣泥飯督銷更易求舅關說不說猶可說後被撤天理何在物論大譁茲令該生親至金陵請文石另委闡運不敢再說求公轉告以後闡運請託并求謹屬不准駁回以符前議如是則大比寒士廣作福田楊度孫汶皆消散矣附呈新刻二種聊伴荒函盛暑南征期以半月還衡之後再得奉箋專頌道安不具



致樊藩臺

樊山仁兄先生台席世年傾仰一旦披襟各放光明互相標榜人生此樂天下無  
雙七日九面已妨人妒翩然引去信其宜矣及至仙宮飛蓋灞上停驂黯然而離  
別之思忽爾生貪癡之戀金仙著於細軟泥絮逐夫春風誰之咎哉公所致也晚  
浴溫泉固嫌粉汙明馳渭驛似聽歌聲九日兼程遂投華館入山三日徧歷五峰  
西嶽之奇異於恆代擬難巧似意不能該古無名篇今何敢作然韓畢告哀之處  
鄜杜狀險之詞及至身經乃知過實此行上下絕不艱危午詒同行可以面問天  
移節候地主之施玉盆未冰蓮花餘雪貂狐不御松檜猶春夜夜月明峰峰霧散  
恐大雪氣應陽和變寒日行五十還於客館然鐙始照遞簡已來發函跪誦嘉詞  
絡繹他所未論詩則無馬假以時日恐猶難副何則科舉廢故昔游祝融屈於鄧  
彌之囊論華詩唯推魏承賞改名深卅年攻苦祇成登岱一篇今日驚人欲出謝朓  
之上既難急就又恐過時加以大敵在前衆人拭目誠非薄拙所可自期惟以郡  
縣迫促官差倚馬輒寫和一詞並嶽詞一首聊以報命明日瞻望茫然午詒亦即  
端還面申鄙款相見甚易彌祝珍頤行篋紙窮不盡觀縷

樊山仁兄先生道席別情載路思紀常新日日馳思駸駸歷序送猶如昨懷已經  
春還信之遲悟而自哂想初謀同軌神御點金總握路權定勝師法他時通道即  
得朝夕往來誠為幸事然閩運私意總在士元一席使湘人振贖發聾耳王祭酒  
欲翻趙案與徒徑赴學部奏駁存古打草驚蛇使南皮亦自却步近日明見萬里  
者唯有此奏惜仍由外擬非出心裁秀才可以任天下事黨禍將起矣故亟望明  
公之一拯也閩運還山後刻成易說一部寫定拙詩十二卷上已送上三禮箋續  
當有獻譚文卿少子求借台署所存文兄任內手批案牘已令邵牧面啟託閩運  
代陳想仁孝訓型必無不允仍希文案委員飭房檢卷或令程生照料尤感尤感  
衡湘大水幸未分秧雖不害田損失糧貨巨萬關中當得福蔭民庶安和學設專  
司未識何人分陝兩湖則梁張以外無稱此者矣鄙意不如起用康梁為直截但  
無敢發此端者橫流橫議俱親見之公當閱其老窮耶新情農興輒書三紙承請  
福安

樊山仁兄先生節下去春寄到大詞循誦已熟秦雲數至每道相思未面傾襟洵  
為佳話聞與叔兄屈指袁劉恨不移旆同城一振物恥非僅風流照耀異苔同岑

而已閩運披昌五十年方變時賢幸無尤悔近觀世變用倭亂學久欲上議自嫌  
名盛唐突三督搖撼二張何敢久旅南昌致違本意緣感虛禮聊復再游秋風漸  
涼歸與去矣升公兩疏朝陽鳴鳳得與同事非敝同年所敢汶也葆生將去憑寄  
一音敬謝垂念即頌雙福唯鑒不具

樊山先生仁兄節下仲冬有人關之興意請浴馬溫泉洗頭玉井升堂償世年來  
積思兼以接對升公觀其議論乃為午詒所強舍官為民行旅滯留僅及歲暮到  
家承問快讀五詩雖實汗顏聊且自喜生平受褒譏多矣公之許與蓋有特識而  
通氣類唯賢知賢則公之自命可知也將以撝謙不其飾與請後無為客詞直云  
莫逆可也叔兄復召當有大區畫豈欲侯羸我乎義不入都侯命於湘求密告之  
午詒送姑還里姑病小愈即當有信至秦班春多福且將與狀元相見亦吾黨也  
賀賀

樊山仁兄先生節下四月半上一牋並夏公父子二函未得夏復昨聞叔兄薨逝  
理當唁問計公早已周郵兼指示諸孤早辦歸裝矣還途以由武關為省便粗重  
少帶但媿屬親丁不至過累還家鄉人自有料理乞轉告午詒兄弟為幸公督路

政想日勤勞盡力所能必不竭蹶去今秦報有便寄我為望相撫不安其居未知何意水退旱成秋收不豐閩運於本月底還山當至長沙候夏旒謹書求飭送午詒一閱專此奉浼順頌台安

樊山先生道席錫良揭曉金鑠彌光既不姑容遂同歸去長城自壞短垣共踰華陰囂然固其宜矣不俟終日回首渭濱當霸橋垂柳之時吟屈子持蘭之句誠不可以曠達處之也聞今年曾有復書並和拙什至今未見企望皇然時事可知不圖至此或歸與張禹共打詩鐘伊可懷也不可限也閩運樂極悲來兒女萼榴自去臘送竈後日坐愁城獨處塊然殆難堪忍加以窮乏得我深山遠親日食萬錢一飯斗米世緣之苦今乃知之窮大失居四方靡聘思公談燕更益馳神幸不與瞿袁爭權猶可冀江湘相見雖迹行止願早相聞午詒還里後遂無消息營莫想在四月午橋改良不敢開通矣專肅奉問敬頌即安無任瞻仰諸希鑒照

樊山仁兄先生道席前得書知四月出遊日夕企望至今不見過鄂想未戒行也因循半年徒隔書問耳正暑時復往桂陽送葬以此亦株守東洲惟日以看報為樂報館認真我則遊戲惜楊翠喜不美不足作詩郭寶生血戰沈衛當又費一章

矣孝達乘閒遂得參知酬十年企望之心亦宜有佳章作賀閩運有新詩四篇至  
欲索和手錄呈鑒此間人人欲得公來一振聾發聵恐相人無緣承事但得望見  
顏色以為幸快何由出游若有新除便不自由矣午詒為閩運拉一書院自代發  
明不要之義若相與有成亦一快也續當詳報手頌寓安

致張署撫

筱船中丞大公祖節下聞任喜即擬奉箋酬應稍繇致稽時日陸帥決計歸田次  
公荆棘尚煩調護想乎民洽吏必已周妥湘士蒙福私中尤慶也閩運抵洪兩月  
未展一籌比之葉胡誠為多愧舊弁楊都司振清回來求事此間愛少嫌老無所  
用之湘中驅使需人明公恢闊整飭令遺詣轅叩見尚希賞一優差雖無大用亦  
不愧陳劉耳專此恭叩榮喜敬頌鈞安唯鑒不莊

致朱道臺

惠之仁兄先生節下去年幸會旋聞蒞湘及奉訪已還旌矣膏捐之約未之敢  
次公未能總攬以待今日想主持全局經營四省必臻妥善以裕財蘇民幸甚閩  
運通家尹生文儒之子家貧養母苦無菽水資其家在秀山去彝陵為近特介一

函乞於局卡司事分委量子一席俾得就便餬口仍不廢書知與公嘉惠鄉後之心必有合也閩運洪都小住酬對為疲將俟秋涼仍歸故里倘看女至衡冀得相見專頌台安不具

致蔡中郎

與循老弟道席金玉其音忽聞警歎歡喜把玩暑氣得涼幸甚幸甚次山入典大農湘士稍有黑白所患王張憂國復作訂謨黃杜遷延其小者也閩運客游過夏已及瓜期還山收租其名甚美如白露前不至大熱仍當於山塘聯句矣彭孫直懸大作波瀾雞駑千金殊為無味昨有翰林太守要述唐同作調人彼乃振振有詞決還速訟事非易了然以鄙人袒任則寬也看功兒書不恤寬其父老弟或不枉其親耶清官難斷而遇一米湯太史議廢科舉有由矣因彭復書敬頌近好

致唐知府

稚雲六哥同年親家養席章門促見雖快猶忙未得攀舫乃蒙賜簡循誦喜慰又復悵然世事全非相看俱老百里睽隔豈但舊歡秋炎久暢鄰封暫警賢子經畫訓政亦勞還山之期知尚未定閩運於昨月杪辭出公館暫寓許河帥故宅以俟

涼秋八月水平便當過返危局多變鄉里難安如兄必更有奏咨借重之時弟亦仍當奔逐殊非高隱人不遇暫避耳史繩之得薦又為張狀元所警苦海流轉何能有定疆飯含飴暇輒西笑為幸為企

致胡吏部

漱唐仁兄翰林台席奉別九歲靡日不思去歲到貴州詢都人士罕有知蹤跡者夏間得手書尉問殷勤兼聞閱議洋洋幾千言而未及近况後問伯嚴亦不知其詳及議鐵路朝士連名僅列大銜初無可否香元大老宜更不通消息矣大隱金門斯為長策敬佩敬佩聞運避地丞上遂及一紀欲去不可乃逢夏聘借此蟬蛻具呈督撫請罷學堂次山笨人不達時務憚於代奏懼其忤時旋謁學使柯君許為附達及後未奉詔飭知又隱沈既兩院同心老生何容瀆諫然總教不可為義彰彰矣以夏中丞特派大員來迎禮宜答謝躬往卻聘三月端歸到即暑假僅講禮記六篇堂中人士初無習氣欣然相得亦可有成然以名義不符故無留理夏公約堅不師而友旋又一往遂值遷移臘底到家坐雨到夏世事遷變一無所聞日俄最凶亦未肆毒仁兄近在輦下當有所聞臺省諸公仍復安否次山度遠尚

講學乎敝州浮動十年亦成見慣抵掌捩腕者富貴無階風氣稍向靜矣曹中依然印結無須入館二張近作何想香壽已成強弩得鐵郎一衰不負苦心足矣清暇時有吟詠無吝玉音答箋稽遲寸心常結手此奉問起居

復莊臬臺

心盦先生大公祖節下前聞旌旆晉省即遣信歡迎頃得賜書似未達鑒伏承鳴珂還里攬轡澄湘新紱塵囂重披雲霧甚為欣仰豈僅老民督府頌文猥蒙援簡禮宜恭命無可飾詞但恭祝吉詞體當端謹張文喜繁富下筆千言闡運懶祭已疲錦割都盡不能駢四麗六對白妃青曩者吳公好奇猶可偽摹揚馬若論博麗久不如人城中皮麓雲葉煥彬皆馘馘多文請以自代明公新從鄂過必見張公若屬意徵文則有李序為式如或志存經國意薄雕蟲取備充庭不計工拙尤不足煩公慮耳閨運因游九疑遂遭水厄東洲滌蕩精舍傾頽譚兵備議改學章又干部駁經費無出師範難優已徹舉比無勞熊掌中秋詣府暢敘離懷緣奉教言先此肅敬中丞尚未謁見乞轉達鄙忱湖北湘吏前議公祝督壽來索都製亦已謹辭張頌李文竟未寓目新學家方廢詞章或不能不隨時也如張指索都文則



往役義矣末伏風燥伏維安善自臣不勝頌禱

心盍使君世先生節下奉違忽已四月惟日以未預談宴為念時和序清可以小休整飭官方是今要政警學新軍抑其末也相更久頑願以剛介振之雅度含容下不知惠且自有能之者前求拂拭何鏡海之孫何緯因城中唯節下尚知鏡海餘皆不足語此女壻常國篤名條想尚在公筆筒中乞交袁公此君初來不似王石卿應接不暇也閩運因船山欲收學費無益取謗仍來主持俟秋初或可上府一頌積思近日搖鈴演說備諸醜態雖不效不免勞神政暇唯高曠自臣為頌

致鑛局協辦

孫咳仁兄道席自六月以來奔走歷違昨長君見過亦未相遇正欲憑船寄書一報新事適從兒女處展轉寄到二月間所賜手函竝政和三詩律法彌細笠雲二篇則當家合作厭倒廖王信乎詩各有宜不待調查也游記檢原稿未得輒錄五言一篇為裝冊之備以了前稿閩運因船山書院命終特來料理後事山川赫怒一夕蕩沒無存彭雪琴六萬金之工僅存泥沙天廢不興于茲微信鄙人遇災不懼後天奉時暫避城中俟九疑還舟仍歸山塘避暑昨過清泉學舍垣牆盡圯水

亭傾倒昔年觴詠地遂成泥坑亦不待裁教官改學司費青年英雄立憲也端撫  
一來湖南全省化為異族昔與郭筠仙論王文韶不能亡湘今端方竟能變湘弟  
之無能如此亦何顏更設皋比再列小腳唯有拜受康子之藥飽啖陽虎之豚以  
卒餘年而已表弟蔡溶春年老病盲還湘學稼薄田十畝子女八口不足自存閩  
運外家祇此一人賡堂先生之族零落如此方今疏通翰林之日仁兄猶念鄉黨  
未識卅局有三數金閒差令執鞭守門否若可位置比李次兒或較勝也來此兩  
月專待道州船便行雨既不止水又復漲上瀧升天未識何日然意興未減眠食  
愈安知起居益健以為至喜

孫咳仁兄先生道席得惠書恩恩未復間關到南昌已聞湘報子龍去而士龍來  
極天下平庸之選學堂瓦解朱唐失望王劉欣然復有生機染煥奎不待手誅胡  
子靖自然纏足真足以推倒豪傑開拓心胸也銀沙坐擁以聽浮沈不必私憂唯  
堪一笑應與鄙人同師漆園家摩詰詩云一生幾許傷心事不向空門何處銷鬱  
輪袍凝碧池一時涅槃城中冷熱人誰能解此闔運每於此參悟尤願與知我共  
之求差辭差俱為多事官中堂云混而已矣伯嚴昨來此一見夢猶未醒建議七

十五縣縣派兩生投倭以賓興經費供給老夫目笑存之昔黎樾喬見程晴峰陳說軍務程云四哥高見長沙圍城衆紳士同見欽差議大事既去或問何人何計羅蘇溪曰如麻雀嘴喳喳我並沒有聽他今以此法對三萬萬九千九百九十九人亦紅頂心傳也初到日對百容何足為勞因感遷移急書鄙見如有新事仍當續聞敬頌道安無任馳企唯珍衛開通為幸

孫咳仁兄先生道席七夕前得手書快若對面官士傳觀勝報紙之開通也子龍又投本初不知擇主豈天時所會非人力與卅局學堂以時鼓動得如吾兩人者鎮之居然頑固矣容不可久非若卅局自隨已於前月底辭館退居待水而西渡澧還湘踐珠泉之約然有急事不能刻待者平江李世兄之館次山許以幫辦老兄又以金諾乃係稽查何其輕當世士耶如次青者猶將十世館之況其諸子而今側陋想公明恕必不以後劫剛等一座鑛等千戶侯願無印利而不忍與耳專此仰干順頌道福展重陽當遇我於藩牆惟照不盡

孫咳仁兄道席千里遯歸踐珠泉之約乃主人先去又聞凍腳如杜子美雪陰積冷余亦閉門俟晴時出游不復作鄉里周旋矣我不負君猶可券乎以待來年是

所願也梁新學赴官將漢隆候缺貴局有文案襄辦各一席襄辦試與撫部為胡子瑞求之文案則有族孫名燾字毅平解元之子曾任舍監乞與當道一言俾全從學或公肯專政則尤佳也新入城想多新事總之不離笑話山中無一聞見又苦泥塗園菜盡蕩終日食肉容俟出月始能上省先此奉託即頌道祺不具

徐咳仁兄先生道席珠泉放筒屢遷期會山中銷夏暑氣全消舊居林密定勝新村乃自入火城輸我義皇一席中元日近想又還山矣八月十五看月或可同也端去思思不督為恨前五月相見已知其茶飯無心未料其遂從小兒乘桴也新使例請迴避此除或又是一計其人庸俗有餘亦士龍之流揣摩無益仁兄擁巨貲而坐觀成敗所謂振衣千仞罔權力過於倭人何混之有將少穆頗為郴人所警將有京控此公有官不做有錢不留而僕僕風塵當佐襍市僧之差殊不可解弟以其為亡友李申夫之知己因友及友頗欲進規無緣相值台端僕亦引為同黨乞將此書示之否則作為背後鬼話也聞學堂復變動何吾鄉無福至此東南宜廢學西北宜興學聖人復起必從吾言樊雲門文采可觀行事亦辣慕天賦之所為而心地未副得公賞鑒南北增光然直道難行眾人皆醉有轉移于樞機者

又有轉移樞機者總之見公銀沙則束手歸命十樊藩何能為閭運求圖書館不  
得更何敢望俞生但銀沙不能轉移我則差堪自信暫時課孫訓女以遺長日秋  
涼當一出發舒手復頌安無任馳企

孫咳仁兄道席去冬面許光臨新年埽榻每逢晴日企望清塵魚翅早煨舒鳧待  
刃及今踰月知已趨公雖不比魏其之快望武安亦如馮星槎之欽遲憲帥蓬門  
減色雲峰笑人春風催花中車將駕相逢又在夏秋矣去歲所假官粟未及揮霍  
而陝藩寄到殷官之數陝撫即墨今又詒我周星一時地上錢流遂不遑取用所  
餘五十二兩謹遣送還餘半斤未補以示真率有敬同年趙梅卿之孫家道小康  
欲嘗局味弟不干當道如有驅使處幸傳見察用重宴鹿鳴人於榜誼未敢忘不  
以停科改意也

孫咳老兄道席山塘簡率加有病人接待荒疏恕其倉猝旋因衡學將散議取膳  
資不忍十年之功廢於一旦由陸奔命庠內尚局仍復折還幸小女已有起色又  
復到館于佛生日開學打鼓上堂宗風復振望八年之漏盡不休誠可哂也夏叔  
公于六月朔下葬三世交情當一臨穴坐此淹滯讓公與黃小魯周旋詩句畫圖

不遺在遠展讀來章惟有欣企山中消夏亦足傲余欲罷不能則恐同病耳潭猛  
係岑所嫉因敗為榮又出一梁鼎芬非安都之比也辱承謬獎惟祝保晚節耳大  
世兄頃有書問亦以發財為恥志趣高遠具見淵源匡廬未若九疑猶綬臣之不  
及闡運倘于夏至後一訪舊遊便于夏杪上永一月聯鑣不更快乎九疑一行非  
百金不辦幸有學費無取卅金聊報瀟東亦壯行也書此奉約即候潭福惟鑑炤  
不備

孫咳老兄先生道席前奉書聞已還山且將高卧不出能否如願非所料也譚芝  
公近因兩司來詢役田甚不高興役田本起自曾監督成於王桐軒初言十萬金  
可立致乃得二萬元耳曾委員王師爺放散亦云萬金則又祁陽地棍土倡分之  
而曾王不過過交李馥先生此張亨嘉專稱之辭亦思染指不得乃斂費京控不意止成咨

案例不問也今委員提王范曾范在省謀委署想已投到范雖鄙人此事無干曾  
已遠颺王則現在但臬台明照此案殊不必認真慶振事尚可陰消何必掃道台  
之臉如其欲澈底澄清化咨為奏徒興大獄無益民生公與潭公舊僚新好乞以  
鄙意探之廉訪付之照例而已又彭剛直巡捕章家有一錢債細故闡運于前月

函託沈士登明府調停早結想已訊明今其家又專人云信並未到或係左子重  
之流匿不以達嚴洪橋不拆封左子重折亦求特住一問又譚心蘭學正係敝縣  
通儒有春秋日月表禹貢正義皆闡運所契合今其子不能自存曾與張雨珊言  
之雨珊向不攬事居然慨允以為應極力照拂天不成美旋即喪病方今首府岳  
常釐局皆可位置求轉告莊廉使一吹噓之或能于貴局委用更佳亦國粹也聞  
運重到東洲新興世兄聯絡月底將往水口山看鑛從此為公小友羣紀之交特  
科年伯有抵制矣大笑大笑四月極熱五月極涼是善化歸田之祥近有新聞匪  
夷所思然實意中事耳適將上堂不得多及專頌道安不具

湘綺樓箋啟卷八目錄

長沙湘潭王闈運字壬父著

夏巡撫四啟

陳道臺一啟

陳知縣一啟

宋道臺一啟

程知府一啟

陳巡檢一啟

程郎中一啟

曹參議一啟

朱藩臺一啟

任知縣一啟

秦提督一啟





湘綺樓箋啟卷第八

長沙湘潭王闈運字壬父著

致夏巡撫

叔軒仁兄侍郎道席青門重謁渥荷恩私繡領停驂復承遠送到家後即聞偶發舊疴旋加常膳子婦並會侍奉萬安修候稍遲實緣塵冗惟鑒為幸豫章奇變達官均罪知公福厚外事脩然閨運還山息機又為衡吏士所邀勒令改船山學務分設四科天意有違平地水湧牆壁盡圯遂成泥坑幸先已具舟暫避程塾諸女來覲且須從容端節後仍歸敬莊避暑若免荒旱或可安居此次水災連及三郡損失巨萬足償私款新議方建立學司多門煩費非狂非愚圖小利耳不值旁觀一哂也杜曲春深必多間適隨宜珍攝無任欽遲

叔軒先生侍郎節下車騎見過告以傳道依違不能任事之意比言如此處置人情不安未盡委曲敢申其說學舍濕漏將於暑假內因暇補修適有生蕭鶴祥在彼借寓屬令勘估據稱牆斜柱朽恐致傾覆親往復視東院有空屋三進曾無居人因令郭統軍營中湖南匠人文量得地寬八丈長一十二丈可造齋舍四重廿

間包造工成每間卅千用錢六百千比前補修估工三百千僅補鉅漏為費倍工百於計為得小小興修既不煩委員即不必開會總辦提調傳道任守皆不與聞以傳道來往親密偶知此說耳十三日拆去舊屋郭道主用營勇曾經詣轅稟聞十四日拆除用卅餘工至夜郭道言有留名臣祠不拆之說訝問其故云出自傳言即告以修祠不比毀祠仍照原議十五日辰刻得南昌沈守來函云名臣祠宜少留餘地且有遷主洪都之館之請深為駭愕以為謗議沸騰矣即復書告以一切照舊即刻停工初不謂節下又以為停工非是也此事始末無關傳道更無關郭道今傳道以依違見責郭道必以干預為嫌無故生波咎皆在我時昔之夜談讌款洽瞬息之際遂啟猜疑非所以安遠人且非所以示闊略伏願收回札諭仍飭任事如前不勝悚惶特此啟聞或與僚吏議其是否敬頌台安

### 致陳道台

復心世姻弟無恙聞坐困武昌屏息待雷王志不熟以致此苦欲出主意非所能用詩曰每有良朋丞也無戎天下大患莫過於諱其矢志而高言無悶遂巡歲月如坐針氈南皮即其人也尤而效之何哉請假桂陽庶一計乎宋芸子斷腸人對

斷腸人坐看張彪汪守之避審伊可懷也其書引弟為證故請轉致又江西土捐  
由軍贊成張督同任有咨贛撫文若待屬吏叔公平心駁之乃就範圍其詰宜昌  
設員粵關過境如何分別張言不知所運為銷某省故不必委員究竟作何登答抑以擱煞為繳人  
凡不答者想知就裏其家方撰行狀思以抗張為能尚希速復土局有查若見元辦  
請以捐官太大告之益慰其被劾余前有書云一掛彈章便成豪貴望風逖聽指  
日高陞可以移贈也因便附聞順頌邱吉

陳知縣

曉江仁兄太守執事庚年快晤還荷隆儀百金之昇山行安穩甫至清復紛傳寇  
警九州紛擾萬乘播遷求穴靡容閉門屏息遂不逞函謝竟似前生昨除夕書來  
茫然莫憶自檢日記乃憶大名又讀尊者角山六言詩撫時感愧老年忘事既悟  
恍然恩紀加親歡游如夢此又一好詩料也黃綬屢遷公私多慶海濱毀軫風物  
清嘉撫輯餘閒新年增福幸甚幸甚聞運入山養靜晚景頗佳于世無求虛承厚  
贈阿膠珍藥即分諸女朱提精鑑本擬附還緣前荷贈貽尚未申謝殷拳想念誼  
倍千金不復區分輒收全禮大集展讀兩過并序交情不敢贊揚想契尊旨故鄉

安靜稍為趙端所擾尚未至於搜括學堂亦新安分公費無出行當自廢拙者始編次付梓春杪或可刷印再行呈正先此奉謝敬頌多福不具

致宋道台

芸子仁弟無恙近歲老嬾於朋好多不復書屢承賤問惟一作復由郵局遞南昌頃得來訊似未達覽其為功兒所誤投無疑非郵局過也然一函百金乃竟浮沈是遺子滿巖尚不若一部從事此後惟憑局足耳論學則苦心精義可感可泣語曰誰為為之孰令聽之時無子蘭狗監其人屈馬之文猶無知者况文心耶前後論撰皆實叢雅言學亦大進強聒而不舍墨道也非莊旨也鄂渚重游語言無謂青油慎看人面未若鴉片燈前讀我書式微式微仍以盛宣懷腳下盤旋為善不必作學使丞參之想聊啟軒渠賢子長成近作得業元辨被彈作何覆奏相見為道愴記未別作書今年重到東洲與吾賢重作候補同所謂應付之學

致程知府

戟傳世弟權席山莊避暑正與陳郎談弟音信太疏適得來函及輶裘樊集之寄忻然相視因覽近作喜文字未廢暇日仍多甚慰甚慰樊山屢誇弟於吾知為出

色人物復承薦士益喜留心世事茫茫得寬閒自處不必計功過也去年曾得來書未及作答春間謂必入陝乃有波折秋涼水清當由武關至潼關三次游華之願爾時未必遽代將包關購稅耳墨子已刻今致兩部以一致毓觀察樊公俟面送也酷熱五十日來詩未暇評點亦俟面還湘中學務時冷時熱蕭生失館欲纂船山試也假名纂耳晉侯先殺申生故為商臣弟宜以稽查羈縻之無使作張元為喙新涼想寓館清娛為頌

### 與陳巡檢

芳畹老弟無恙幸甚去歲得書即欲從廖大令處匯花邊拾貳元交弟應用因恐廖不要還似乎把勢將交信局又可惜匯水其後孫女湘霞病故十女病重淹纏三月乃愈衡州書院要倒閉急忙來弄錢遂過半年並不暇問老弟蹤迹矣昨得來書又無日月所說尚似正二月間時事山中方七日世上已千年真前世事也兄破船多攬載輕諾寡信人來託事者日不暇給答應並不可靠不知誤幾多事矣行蹤無定時東時西非緊急並無回信如弟遠隔一混數月旋即忘之非緊起眉毛不得料理銀錢又不在身邊身邊有無一文之時故難應點也今託便寄上

前數衡州大布有無數種長者四五丈短者二三丈皆係白布不可要也寄兩元代之共十四元營盤街信不得到寄信當寄湘潭十八總杉灣雲湖馬頭公船上不能代出酒錢

與程郎

叔揆世講姻九弟侍福前聞尊公當到長沙留待數日未至今想已還家欲求代買各種交來下帶回恐尚在省故託轉稟自叔家譜一部奉贈前取尚書爾雅版片云須叔印未付今可檢付來手周易已否加工詩經業已排印成書出月當由江西寄來矣縣考定高列府考何時並問令弟均好

叔揆姻世講九弟侍福前函致尊公索易經想已寄來矣茲又付上一封面二詩本請發刻匠為要尹和伯云湘東岸有一大地穴在田中正對南岳請派人打聽何人田地定要買成如係親友家田則請以田易田請即問明回一的信陳八要借錢係在潭做來往即可隔遠六小姐不借我此時無錢也

致曹參議

東瀛仁弟台席前歲過豫迫歲暮不欲更遊旋聞琴徒不留賢子東邁所期如夢

為之愴然既而高步華京遂參卿貳杏林有望手版全拋才欲寄書旋承來訊殷  
殷之誼久遠彌親甚善甚慰長沙近為利藪自愛之士不欲入城老懶喜游蹙蹙  
靡聘去歲一至九疑迫暑未得登陟今擬更往因船山改學教習入都越俎代庖  
遂攝三講俟夏午詒葬畢到館才能放學新刻詩箋寄承覽讀聊報松山八經箋  
注此為差密日本學者但欲廣藏非能鑒別故不託寄也首夏濕蒸遂羨清曠惟  
珍重相念

致朱藩臺

菊尊世八兄方伯節下前聞特授旋慶榮遷時局益乖周旋不易想長材毅略必  
不隨俗轉移然積弱之餘動輒得咎剛柔之妙運在一心無隕修名是所祝也佃  
童劉南亭亦君鄉里久從坐營殊無出身曾薦與夏端兩撫未幾輒罷母老無子  
心獨憐之用特專函遣投樾陰江南地大物博關道取多用宏令或典船或充哨  
長使歲得潤庶副鄙懷又貴同年左幹青欲求繼蓮兄一優差弟久不通信乞面  
致鄙意酌與提拔并希無吝吹枯甚感甚幸專頌任喜不盡

致任知縣



績臣仁兄明府台席重游東洲遂遭大水聞敕縣被浸尤久躬親拯恤民說無疆  
頃年沈明府勤於救災至今頌聲洋溢劬勞倍至必軼前稱雖暫煩憂造福亦溥  
惟未能贊助以為深歉衡府積米不多兄所深照程旣樵兄有備荒屯米九倉在  
易俗河昨遭運被本地阻境已由譚兵備電請撫台札照冰案照護運衡倉粟亦  
先發驗誠恐阻米人不由分說堅持過糶特屬閩運加函奉託務希派差即日起  
運竝加護照飭役押送出境早到一日早受一日仁賜再有懇者本地穀米仍宜  
流通若似近日鄉間龍斷津要不許舟船來往則荒象立成殊非地方之幸此又  
望公主持調劑普協羣情或亦仁政之一助也閩運以船為家喜無損失山莊亦  
未被水但分秧時過穀價恐日昂耳專此代達敬頌蓋安不具

致秦提督

子質司使世仁兄節下去歲聞特命專閩即欲躬至萍瀘藉觀調度緣家人疾病  
因循度歲旋聞衣錦覲親信宿過返袁臨案堵省政軍敷瞻望柏台無任馳企洪  
都完善官吏習深自吳文節莫能振之都憲仰成滄公協力非大整理豈云善職  
遙聆輿頌但詠緇衣同縣婁秀才光耀昨來訴窮云在頌領曾荷夏范江西官報

書局雷監諸處監司例安插三數人專生詩文斐然不宜飢餓用特函告乞留一  
席俾得安硯吾鄉文人不多吳少芝甫得一館雨珊中風懼無主者劉詩人屈在  
釐棚猶費九牛之力維持國粹獨力難勝願達者之留意也內姪孫蔡仲奎其父  
子慶曾邀接納今在衡縣小館如失路來見亦乞吹噓黃宅安不見一人聞運日  
接百士孰是孰非江西想有公論也春寒連月伏維宣衛協和為幸

湘綺樓箋啟卷第八終

湘綺樓箋啟

卷八

五



湘綺先生十一經皆有注廿二史皆有贊周秦諸子亦各有校釋取精用宏故能經學精深直契心源獨開生面高出先儒之上史學直當雁行班馬詞章閱博奄有漢魏晉唐大家之長豈惟吾鄉耆宿實當代之山斗也先生躬萬夫之稟讀書輒過目不忘神識過人非偶然矣乃余親爰門牆因具悉其學力堅苦尤為殊絕又豈專恃天事以勝人者卓爾有立欲從末由竊於先生之書數觀止焉經子諸注詩文各集及湘軍志久矣風行海內外區區尺牘豈足以見先生然先生之文如白雲在天舒卷自如頃刻萬變又如黃河九曲一曲千里波瀾愈大豎一義石破天驚萬一詞海涵地負即尺牘中未嘗不可見其淵博闊富其文不拘一格無美不備大之有關於經世之閑謨小之有益於詞人之藻米精之足以為儒林之津逮粗之亦足以為世俗之鍼砭涉筆成趣自見化工先生真雄於文者也末學何能仰贊石詞輒出所藏以付梓人公諸同好云爾計箋啟八卷又文集八卷詩集十四卷合為全集三十卷

光緒丁未冬月弟子杏園敬跋